

EKALESIA FAAPOTOPOTOGA KERISIANO SAMOA

Matagaluega A'oa'oga Kerisiano



VASEGA MATUTUA FAAPITOA & AUTALAVOU LAITI 2018

**MANATU AOAO: A’OA’O IA LE TAMA E TUSA MA ONA
ALA**

**IANUARI: O LE FAAMOEMOE O LE FOAFOAGA A LE
ATUA (The purpose of the God’s Creation)**

28 **ASO SA TUPULAGA**
Faia le tagata i foliga o le Atua,
ina ia tapuai ia te ia Kenese 1: 26 – 31

FEPUARI:

4 E tāua le malolo mai soo se galuega mamafa
Kenese 2: 1 - 3

11 Ia fua tele ma ainā le lalolagi
Kenese 1: 1 - 12

18 Talia Iesu o le “Upu” ma le “Malamalama”
Ioane 1: 1 - 5

25 Ia iloa e le tagata le mea moni o le alofa o le Atua
Kenese 3: 1 - 13

MATI: O LE ATUA AMIOTONU MA FAAOLA

4 Ua lē manatu i pa vaeloto o le feitagai
Esoto 2: 1 – 10

11 Ia fealofani tagata uma o le Atua
Roma 12: 9 – 21

18 Ia e alofa i le tagata mativa ma le tagata ese (Love the
poor brothers and strangers)
Levitiko 25: 35 – 44

25 **ASO SA LAUPAMA**
O le ulufale atu o Iesu i Ieruselema
Ioane 12: 12 – 19

APERILA: O LE ATUA O LE FOU

1 **ASO SA TOETU**

O le tuugamau tuufua (The empty tomb)

Ioane 20: 1 – 10

8 Ia fai oe ma fa'aola i isi tagata (Let yourself to save other
people's lives) Kenese 45:1 - 7

15 O Keriso o le malologa lelei o tatou agaga (Christ gives
good rest for our weary souls)

Mataio 11: 28 – 30

22 Loto fa'amagalo e fa'asoina ai le ola o le uso a tagata
(Forgiven heart saves lives)

1 Samuelu 26: 13 – 25

29 Ua lilo i tagata le Atua e maua ai le ola (Failed to
recognize God) Luka 19: 41 - 49

ME: LE ATUA MA TINĀ (God and Mothers)

6 Fa'atalitali i le fa'aolataga a le Atua (Awaiting God's
redemption) Luka 2: 36 – 38

13 ASO SA O TINĀ

O le sao o tinā i le Talalelei (Mother's contribution to
the Gospel)

Galuega 16: 11 – 15

MALOLOGA O LE FONO TELE

**IUNI: O LE MALO, NUU MA AIGA MA LE
SIOSIOMAGA O TOFI MAI LE ATUA (Nations,
Villages, Families and the environment are heritage
from God)**

3 Fa'amamalu le nuu (Fa'amanatuina o le Tutoatasi)
(Honor the land) Iosua 6: 12 – 18

10 O tagata o le aiga o le Atua (People of God's family)
Mataio 12: 45 – 50

17 Filifili e auauna i le Atua (Choose to serve God)
Iosua 24: 14 – 22

24 Ia atinae le Malo o le Atua (Develop God's Kingdom)
Ioane 21: 15 – 23

IULAI: E AFIO LE ATUA I MEA UMA

- 2 O le Atua ua fetalai (God who speaks)
Kenese 1: 26 – 31
- 9 Ua sola Elia i le mauga o Orepa
(Elijah flees to Horep) 1 Tupu 19: 9 – 18
- 16 Ua valaauina Natanielu e Iesu (The calling of Nathaniel
as a disciple) 1 Ioane 1: 45 - 51
- 23 O le ma'i o Esekia (Hezekiah's illness)
Isaia 38: 1 – 8
- 30 E le lilo se tagata i le silafaga a le Atua
Salamo 139: 1 – 12

**AOKUSO: O LE ATUA MA ANA TOFIGA I TAMĀ (God and
is appointment of fathers)**

- 5 Ua fa'auuina Tavita e fai ma tupu (David is anointed to
be King) 1 Samuelu 16: 1 – 13
- 12 **ASO SA O TAMĀ**
E tofofi e le Atua tama e fai faiva i tagata
(God called fathers to fish for people)
Mataio 4: 18 – 22
- 19 Ua fa'amanatu e le Atua ia Esekielu lona tofiga
(Renewal of Esekiel's call as watchman)
Esekielu 33: 7 – 11
- 26 Ua tofia Saulo e fai ma Aposetolo o nuu ese
(Saul is chosen as an Apostle)
Galuega 9: 3 – 16

SETEMA: FOLAFOLA LE TALALELEI I NUU UMA

- 2 Ia fai nuu uma lava ma so'o (Make disciples of all
nations) Mataio 28: 16 – 20
- 9 Ua toatele ua filifilia i le galuega tala'i (Many are called
for the work of the Gospel)

- Galuega 6: 1 - 6
- 16 O le fa'asoa a Ietero (The counsel of Jethro)
Esoto 18: 14 – 26
- 23 Sauaina le Ekalesia, ua vave ai ona salalau le Talalelei
(Persecution leads to expansion of the Gospel)
Galuega 8: 1 – 13
- 30 Ua naunau mai Maketonia mo le Talalelei (Macedonia
demands the arrival of the Gospel)
Galuega 16: 9 – 15

OKETOPA: IA TUU MAIA O TAMAITI O MAI IA TE AU

- 28 O fa'aailoga vaaia o tagata o le Malo o le Atua (The
identity of people of God's Kingdom)
Mareko 9: 33 – 37

MALOLOGA O LE LOTU TAMAITI

NOVEMA: O LE ATUA MA TAULAGA (God and the Sacrifice)

- 4 Ou te mana'o i le alofa ma le amiotonu (To love mercy
and act justly) Mika 6: 6 – 8
- 11 Ave mea a le Atua i le Atua
(Give God what is God) Mareko 12: 13 – 17
- 18 Faitaulaga ma le loto fa'amaoni i le Atua
(Worship God with honor and with all hearts)
Isaia 29: 13 - 16
- 25 Aua e te fai taulaga i le Atua ma ou lima ua leai se mea

TESEMA: O LE TALA O LE OLIOLI TELE (The News of Great joy)

- 2 Ua osooso le tama i le manava (The baby leaped in the
womb) Luka 1: 39 – 45

- 9 Ua pepese agelu i le pese e sili ona malie (Angels sin the most harmonized song to hear) Luka 2: 8 – 20
- 16 O le nofoaga na soifua mai ai le Tupu Mataio 2: 1 - 2

.....

VASEGA MATUTUA FAAPITOA MA AUTALAVOU LAITI

ASO SA: 28 IANUARI 2018

MATAUPU: FAIA LE TAGATA I FOLIGA O LE ATUA, INA IA TAPUAI IA TE IA

SINI: Ia a’oa’o tamaiti ia latou iloa, o le tasi lea fa’amoemoe taua na faia ai le tagata i foliga o le Atua; ia iloa ona ola vivi’i ma fa’aeaea i le Atua.

TUSI FAITAU: Kenese 1: 26 – 31

FESOASOANI MO FAIAOGA:

O le fetalaiga a le Atua i le fuaiupu 26, e uiga i le faia o le tagata i lona fa’atusa pa’ia, o lo’o numera tele (plural) “Ina tatou faia ia o le tagata i lo tatou fa’atusa, ina foliga ia i tatou.” O le talitonuga e fa’apea, o lo’o fa’asino le numera tele i le TOLU TASI PAIA; O le Atua le Tamā, le Alo, ma le Agaga Paia. O le Atua lena o aofia ia te Ia paia ma mamalu mai le lalolagi nei se’ia pā’ia le lagi i luga, ma le atulaulau uma lava. O le fesili, “E fa’apefea la ona faia le tagata ia foliga i le Atua?” O le upu moni, e le mafai ona faia le tagata ia tutusa lelei ma le Atua i lona Paia ma lona Silisili ese. E le fa’apea e le mafai, aua e leai se mea e le mafai e le Atua; ae ona e leai se tino faa-le-tino o le Atua, se’i vagana o le fa’asusulu atu e le tagata o le mamalu o le Atua i lona olaga. Ma o le fa’ailoa atu ma le ta’uta’u atu lea e le tagata o le mamalu o le Atua, i so o se tafa o lona ola o fai nei, o lana fa’aeaea lava lena e fai ma vi’iga sili o le Atua.

E matuā le mafai le mafai lava, ona atoatoa ona tatou pei o le Atua, ona o Ia sa ia foafoaina tatou. Ae i ai lo tatou mafai e fa'aali atu ai le Atua; i lo tatou alofa, onosai, fa'amagalo, agalelei, ma le fa'atuatua. O lo tatou loto atu foi e fa'aailoa nei uiga faa-le-Atua i le lalolagi, o le fa'aailoga o lo tatou tali atu i lona alofa ma lona agalelei mai i aso uma. O le faia foi o le tamaloa ma le fafine i le amataga i foliga o le Atua, o lona uiga e tutusa, e le sili atu le isi nai lo le isi, ae tutusa aua o foliga lava o le Atua e to'atasi na faia ai i laua. Na faia i laua o le fa'atumutumuga o le foafoaga a le Atua. O le tofiaina fo'i e pule i mea uma, o le fa'amoemoe ia lagona le alofa i le Atua le pule sili, ma faia ai mea uma e tusa o lona finagalo. O lona uiga, e le o le pule e sau ai, ae ia fai ai ma sui o le Atua, e fa'aauauina lona alofa, ma lana tausiga lelei ia tumau le matagofie o le foafoaga.

O le tausisia la o la'asaga uma na faia ai e le Atua le tagata, ma lona fa'aailoa atu i lona ola, o foliga Paia, ma le mamalu o le Atua na faia a'i o ia. O le ola fa'ane'ene'e lava lona, fa'aeaea ma tapua'i i le Atua Le na faia o ia.

Tupulaga talavou, o lou usiusitai ma tausisi i mea o finagalo ai le Atua mo outou, o lo outou ola vivi'i lava lona, e fai ma taulaga mo lona suafa. O le taulaga fa'aola fo'i na maliu ai Iesu mo le lalolagi, o le taunu'uga o lona usiusita'i e fai le finagalo o lona Tamā, ae o le viiga sili lea o lona suafa.

GALUEGA FAATINO:

1. Tusiga Solo

Tusi mai sau solo, ia fa fuaiupu o le palakalafa e tasi, a'e 3 palakalafa o le solo atoa. O le solo e faatatau i le Alofa o le Atua, na ia fai ai le tagata i lona faatusa paia.

2. Taliga Fesili

Fetufaa'i ma le vasega i ni fesili ma tali e fai lava e outou, pe a tusa i lou finagalo, pe a talafeagai foi ma le taimi.

PESE: Ua ou vivii ma faafetai Iesu i lou alofa mai

A’OA’OGA:

1. Ia fa’aalia le Atua i lou tagata.
2. E matagofie foliga o le Atua.
3. Vivii ma faaneenee i le Atua.

.....

ASO SA: 4 FEPUARI 2018

MATAUPU: E TAUA LE MALOLO MAI SO O SE GALUEGA MAMAFA

SINI: Ia a’oa’o tamaiti ia latou iloa, o le galuega tele o le foafoaga, sa faia e le Atua. O le aso fitu, e fai ma aso malolo.

TUSI FAITAU: Kenese 2: 1 – 3

FESOASOANI MO FAIAOGA:

O le tala malamalama le tala o le foafoaga a le Atua, o fa’amauina i le tusi o Kenese. O le so’ona nunumi ma le gaogao sa i ai le lalolagi ao le’i foafoaina e le Atua, sa manino lelei mai ai lava; le tele o se galuega e fia fai, e aunoa ma le mautinoa, pe maua se taimi e malolo ai. O le mataupu muamua lava la o le tusi o Kenese, o lo o talatala manino mai ai le foafoaga mautu ma le atoatoa i aso e ono, e pei ona sa faia ai le tagata i lona faatusa paia. A o le aso fitu, o lo o fa’aalia manino mai ai e le Atua. “O le malolo, o le mea e matua tatau ma sa’o.” Afai sa malolo le Atua mai lana galuega, e le o se mea tatou te ofo ma tete’i ai, ae o le alāfua, e tatau foi ona tatou malolo mai a tatou galuega e fai. O lo o fa’aalia foi e Iesu le taua ma le tatau o lenei mea o le malolo, ina ua latou tuua ma lona au soo le motu o tagata, ae o ese atu i le mea tuufua na o i latou, se’i malolo ma aai. (Mareko 6: 31 – 32). O lo tatou taimi malolo, e fa’afouina ai i tatou mo la tatou auunaga. Ua le gata ina avea le aso fitu ma aso malolo mai galuega o le vaiaso, e sailiili malosi ai i le tino, le mafaufau, ma le loto, mo le Alii le Atua, e pei ona

fa'amamaluina ma fa'asaina le aso fitu (AsoSa). O le aso e tapuai ma mafaufau ai tagata uma i le Atua, ae malolo ai foi mai galuega uma o le vaiaso. E tāina tutusa le ata aoao lea o le malologa faa-sapati o le vaiaso atoa, ma malologa i le po o aso taitasi, auā feau ma tiute o le isi aso fou. Ua tatou mautinoa i le gasologa o le soifua auauna o tatou i ai nei, le sa'o ma le aoga o lenei malologa, sa fa'ataoto mai e le Atua mai le amataga. O se malologa foi ua matua atagia manino ai le alofa o le Atua i le tagata na ia fai, ma mea uma lava o le foafoaga.

O le fa'amanuia atu foi o le Atua i le aso-fitu po o le aso ua malolo ai. O lona uiga, ua ia faia fa'apitoa lea aso ia faapa'iaina, e pei ona taua mai i tulafono e sefulu (Esoto 20: 1 – 17); o lo o fa'amanatu mai ai e le Atua le tausia lelei o le sapati f.8 “Ia e manatua le aso sapati e te faapaiaina.” O le soifuaga o tatou ola ai nei, o se malaga umi o feau ma auaunaga eseese ua tofofi ai i tatou e le Atua; e manaomia ai lo tatou malolo. O le feau e tele, a'o fa'aauau pea le malaga o fai nei.

Tupulaga o tama ma teine, e taua tele le maua o ni taimi e malolo ai ma fesili i le Atua, mo le malosi ma le fa'asinoga o tiute mo le isi taimi o soso'o ai. O Iesu foi, o le tele o taimi e fa'ase'e ai i nofoaga tu'ufua, e malolo ai lona mafaufau ma fesili i lona Tamā, mo le fa'asinoga o ana feau o soso'o ai. O le taulaga fa'aola foi na ia maliu ma toe soifua mai ai, o le taulaga mo tatou, ia maua se malologa ma se toomaga mai le mamafa o le agasala, ae ia maua le manuia mai ia te Ia i le ola faavavau. E taua tele le malolo.

GALUEGA FAATINO:

1. Faailoa mai sou manatu

Tusi mai pe fa'ailoa mai ua e malamalama i le taua o le mataupu, e ala i lou toe fa'amatala mai i au lava upu faigofie, le taua o le mea na faia e le Atua mo oe.

PESE: Le malologa e lelei, le Aso Sa i lalo nei

A'OA'OGA:

1. Manatua le sapati e faapaia.

2. O le malolo, o le sailiga malosi mo le auaunaga o soso’o ai.
3. E lelei tele le Atua.

.....

ASO SA: 11 FEPUARI 2018

MATAUPU: IA FUATELE MA AINĀ LE LALOLAGI

SINI: Ia a’oa’o tamaiti ia malamalama ma iloa, nisi faamoemoe taua o le foafoaga, e pei fo’i ona ta’ua i le ulu mataupu. Ia fua tele mai ma tumu ai le lalolagi.

TUSI FAITAU: Kenese 1: 1 – 2

FESOASOANI MO FAIAOGA:

O le fuaupu muamua lava o le Tusi Faitau, “Na faia e le Atua le lagi ma le lalolagi i le amataga.” E le tasi se tala i le amataga o le lalolagi, auā e tofua le talitonu ma la latou mau. O nisi e tusa o a latou tala tu’u, ae maise nuu i Sasae, o lo’o amata mai i o latou atua na fa’atoilaloina manu fe’ai, ma fa’a’umatia nisi malosi na mafua ai ona le sagatonu le lalolagi. Mulimuli ane, ona fa’apea mai lea, o latou na mua’i faia ma fa’asagatonuina le lalolagi.

Peitai, o le aoao e lofia ai nei talatu’u fa’apaupau uma, o lo’o faimai ai le tusitala o Kenese i se talitonuga fa’avae o le foafoaga. O le Atua moni e to’atasi ma na o Ia lava, na te le’i manumaloina ni toa mata’utia o le lalolagi nunumi, ae ua na o le fa’asologa o lana foafoaga faa-tupu. O lana poloaiga lava lea ina ia i ai le lalolagi matagofie, o le malo e silafia uma lava, na ona Ia fetalai atu o ana fetalaiga foafoa uma lava, ona i ai lava lea o mea uma. Ona fa’aaau ai lava lea ona tumau ma pulea ai.

O le faia foi o le lagi ma le lalolagi i le amataga, o le finagalo alofa lava o le Atua na pogai ai. Auā o le foafoaga e le o se mea sa tatau ona fai (a need), ae o le finagalo alofa lava o le Atua, na ia filifili ai (choice) e fai le lalolagi.

I le fuaiupu e lua, O le māē'a ona faia o le lagi ma le lalolagi i le amataga, mai i le leai o se mea, ona taoto mai lea o se lalolagi so'ona nunumi ma gaogao (formless and empty) O lona uiga, e le fua mai (unproductive) ma e le ainā foi (uninhabited). Ona alo lea o le Atua e fa'aauau lana foafoaga, o le amataga lava lea o mea uma na Ia faia.

O le tala fa'aauau mulimuli ane, e feso'ota'i ai, pe fa'apefea i totonu o aso e ono, ona fa'avasega ma fetu'una'i e le Atua lea gaogao ma lea nunumi sa iai, ia avea ma lalolagi matagofie ma mautu lelei, e pei ona tatou va'aia nei. Ua avea nei fo'i ma lalolagi fa'amanuiaina, auā ua fua tele mai mea uma, ma ua ainā ma fa'atumulia e tagata ma meaola.

O se lalolagi foi sa pogisa, fa'anoanoa, tu'ufua, ma le ainā. Sa ufitia e le vai, ae o le Agaga o le Atua sa fa'agaioioi ai i luga o le moana sausau. (sami) O le Atua foafoa lava lea; Ua manatua iinei, o le malosi o i le Atua ua fa'atuputupula'ia pea, e pei ona iloa i le Faataoto 8: 22 – 31 ma le Ioane 1: 1 – 3 o tautala i le poto ma le upu o fesoasoani i le foafoaga. O le va'aiga aoao lava la e tusa o la tatou mataupu o lenei aso; O le tasi lea fa'amoemoe taua o le foafoaga a le Atua, ia fua tele mai le lalolagi, ma ia ainā.

Tupulaga o tama ma teine, o le alofa o le Atua na fa'apogai i le foafoaina o mea uma e aofia ai ma tatou, o le fa'amoemoe ia fua tele le matagofie o le lalolagi; o lea fa'amoemoe, o fa'alagolago mai iā tatou lana fanau. Ia fua tele mai i mea lelei e manuia ai aiga, nu'u, malo ma le Ekalesia; Ae le o mea matagā ua tele ina a'afia ai fanau i nei aso.

Uiga o Upu m Fuaitau:

- (i) fogatai - o le sami

GALUEGA FAATINO:

1. Taligā Fesili

- i) O a ni mea o ta'ua mai le Tusi Paia, sa fa'aaogaina e le Atua mo le foafoaina o le lalolagi i le amataga?

Tali: E leai se mea na fa'aaogaina e le Atua. Na o lona finagalo lava ia i ai, ona i ai lava lea o le lagi ma le lalolagi i le amataga.

ii) E fa’apefea ona e iloa e tusa o le tala, o le foafoaga sa fa’avae i le alofa o le Atua, ae le o se mea sa tatau ona fai?

Tali: E le’i fautuaina le Atua e se isi, a’o lona lava finagalo ma lana silasila, na pogai ai.

iii) O a ni fa’ailoga o ta’u mai i le Tusi Paia, e iloa ai sa le sagatonu, ma le saogalemu le lalolagi i le amataga?

Tali: O le gaogao ma le so’ona nunumi.

iv) Ina ua uma ona fa’asagatonu e le Atua mea uma e ala i le foafoaga; e fa’apefea ona fa’atumau lena fua pea, ma lena lelei sa iai i le amataga? Faamatala mai.

2. A i ai se isi activity e finagalo ai lau susuga i le faiaoga e fai, ona fai lea.

PESE: 8 (Pese ma Viiga) E lelei o mea uma

A’OA’OGA:

1. O le Atua le amataga o mea uma.
2. E matagofie le Alofa o le Atua.
3. E lelei le Atua.

.....

ASO SA: 18 FEPUARI 2018

MATAUPU: TALIA IESU O LE “UPU” MA LE “MALAMALAMA”

SINI: Ia a’oa’o tamaiti ina ia latou iloa, o le “Upu” na foafoa ai e le Atua le lalolagi, ma le “Malamalama” sa ia faamalamalama ai, o Iesu lava lena.

TUSI FAITAU: Ioane 1: 1 – 5

FESOASOANI MO FAIAOGA:

E lelei lo tatou mua'i iloa o le isi itu taua lea, e uiga i le tusitala o Ioane. O ana tusitusiga e tele i le gagana saotualua. (Dualistic style). Fa'ataitaiga, a tautala Ioane i le ola, o lo'o tautala fo'i ia Iesu. A tautala i le malamalama i isi taimi, o lo'o tautala foi i le lelei.

I le (f.1) "Sa i le amataga le Upu; sa i le Atua le Upu, o le Atua foi le Upu." O le Upu o faasino ia Iesu, o fa'aalia e Ioane iinei Iesu, o le tagata atoatoa lava (fully human), a o le Atua atoatoa foi (fully God). E ui o i ai Iesu i lona tulaga tagata a'ia'i lava, sa soifua foi o le tagata, a'e le aveesea ai lona tulaga Atua, o i ai pea lava. O le na foafoa mea uma; O lē foi e tumau ai mea uma, o le puna foi Ia o le ola fa'avavau. O le mea moni lava lea e uiga ia Iesu, ae o le fa'avae fo'i po o le tupuga o mea moni uma. Pei o le mafua'aga lea na tusia ai e Ioane lenei Talalelei (gospel), e faufau ai le fa'atautua ma le mautinoa ia Iesu Keriso. Ona mafai ai lea ona tatou talitonu, "sa iai moni lava ia, ma o ia foi le Alo o le Atua (20: 30, 32)." O le "Upu" o le puna o le feau a le Atua mo ona tagata, sa ala mai ana Perofeta ma tulafono. O le upu foi o fa'ailoa ai tulaga i lona mamalu. O le fa'amatalaga a Ioane i'inei, e fa'asino tonu lava ia Iesu (1: 14) O le tagata soifua na te iloa, ma e alofa fo'i i ai. O le taimi lava lea e tasi, o lē na ia foafoa le lalolagi (creator). O le fa'aaliga atoatoa foi o le Atua soifua ma le paia.

Ona o tatou na foafoa e le Atua; Na tatou iai, ona sa faia i tatou e le Atua. O le iai la o le Atua ia tatou, e ala ai ona tatou tulagaese ma taua, ae a aunoa ma le Atua, o tatou lava o le leai. Ona o "Iesu" la o le "Upu", a o le "Atua" foi le "Upu", le na faia i tatou. E leai la se ala, e tatau ai ona tatou le talia o ia; ae ao lava ina tatou talia ma fa'atuatua ia te ia e le aunoa. O le Atua o soifua pea e oo mai le aso, o lona Alofa foi e sili atu lona malosai nai lo so o se faigata lava o le ola nei.

(f 4 – 5) E le o manino po o le a le pouliuli, ae o lo'o uiga i le leaga iinei. O le leaga po o le pouliuli, e le mafai, ma na te le mafai lava ona manumalo i le lelei po o le malamalama o le Atua. O Iesu Keriso o le na ia foafoa le ola, a'o lona soifua o aumaia le malamalama i le tagata. O le malamalama o Iesu, ua tatou iloa tino ai o tatou lava tagata, "o tagata agasala e mo'omia le fa'aolaina." O Iesu na te ave'esea le

pouliuli o le agasala mai o tatou tagata; O le matuā tataua lava la ona tatou talia o Ia, auā na o ia lava le ala tatou te mama ma ola ai.

Tupulaga o teine ma tama talavou, avea tatou ma fanau tatou te fa'asusulu atu le malamalama o Iesu, ina ia fa'amalamalamaina ai nisi o tautoai i le pogisa. Tama ma teine lelei, usiusita'i i matua, ava i le Faifeau ma isi tagata. Ia amio māmā, ma fa'aaloalo; fiafia ma to'aga e fa'alogo i le tala ia Iesu, ona fai lea o oe ma malamalama.

Uiga o Upu ma Fuaitau:

- (i) Upu - O le fetalai mai o le Atua, i lona uiga faigofie; peitai o lona fa'auigaina i le mataupu, e fai si loloto atu. O lo'o fa'atatau ia Iesu; o le fa'aola; O Lē na te foafoa lo tatou ola i le lelei mai le leaga. O loo uiga foi i le Atua lava Ia.

GALUEGA FAATINO:

1. Faitau ia e malamalama lelei, i le fa'atonuga o le galuega e fai, ona fai ai lea; Afai o le uiga o le "Upu" o "Iesu", tago e toe tusi mai le Ioane 1: 1 – 5, ae sui i le upu "Iesu" upu uma lava, poo fuaitau, e te iloa o Iesu o uiga i ai.

Tali: (1) "Sa i le amataga, Iesu (i), sa i le Atua Iesu (ii), o le Atua foi Iesu (iii). (2) O Iesu (iv) lava sa i la Atua i le amataga. (3) O Iesu (v) na faia mea uma lava, e leai foi se mea e tasi na faia e lei faia e Iesu (vi). (4) Sa ia Iesu (viii) le ola, o le ola foi o le malamalama lea o tagata. (5) Ua pouliuli" – E fitu Iesu (7) e pei ona i luga.

2. O le a se upu o iai i le Ioane 1: 1 – 5 e tusa o lau faitau, e fetau pe a sui i le upu lea o le "oti"?

Tali: O le upu pouliuli.

PESE: 65 "Le malamalama e, ia e talia maia."

A’OA’OGA:

1. Fiafia e ola i le malamalama o le Alii.
2. O Iesu, o le Upu o le Ola.
3. Faalogo i le Upu a le Atua.

ASO SA:
25 FEPUARI 2018

MATAUPU: IA ILOA E LE TAGATA LE MEA MONI, O LE ALOFA O LE ATUA.

SINI: Ia a’oa’o le vasega ina ia latou iloa, e tumau lava le alofa o le Atua i le tagata, e ui ina faalogogatā ma le usitai.

TUSI FAITAU: Kenese 3: 1 – 13

FESOASOANI MO FAIAOGA:

O lo’o fa’apea mai le ulutala o le mataupu lenei e 3 o le Tusi o Kenese – “O le agasala muamua a le tagata.” Ua tatou iloa, so o se agasala lava, o le sese lava lena. O lona uiga, ua va-le-fogava’a ma ua le toe mafuta ma le Atua. Ua fulitua mai le tagata i le Atua, ona o lana agasala ua fai. O le ata lena o le mea o tupu, e pei ona sa tatou faitauina.

Manatua ua mae’a lelei ona tapena e le Atua mea uma mo le manuia ma le lelei o le tagata, ae maise le fa’ato’aga fua-feti’iti’i ma felanulanua’i laau, mo ia i aso uma. Ae tasi lava le laau o vaioa e le Atua, e ‘aua le pa’i i ai pe ai ai. O le la’au e iloa ai le lelei ma le leaga (Kenese 2: 9)

O le Kenese 3: 1 – 5, o le fa’amatalaina o le fa’aosoosoina o le fafine o Eva e le gata, ma faia’ina ai lava. O le atamai ia o le gata, na ia sufi tonu a le fafine i le mea o iai le vaivaiga faa-le-tagata. O le lagona fia sili lea ma le fia maualuga, ia pei fo’i o se atua. “E moni ea, na fetalai atu le Atua, lua te le aai i laau uma o le fa’atoaga?” (f.1) Ona tali lea i ai o le fafine; e leai, e taga laau uma, vagana le laau e tasi e sa, nei ma oti! “Lua te le oti lava,” o upu suamalie ia ma le tau fa’asese a le gata. E te

lua aai loa i le laau lena, pupula loa o oulua mata, ona avea foi lea o oulua pei ni atua, ua tutusa lava ma Ia. Ona gaua'i lea o Eva ma Atamu uluai tagata, i le upu a le gata, ae ua fa'aalia ai lo la lē usiusita'i i le fa'atonuga a le Atua, ma ua la agasala ai i ona luma.

O le f 6 – 13, O le tino atoa lena o le mana'o fia fa'amalieina o Atamu ma Eva, ae ua iloa ai le gau pule ma le fa'amauualuluga i luma o le Atua. Fai mai le fafine – “O le laau lelei ma le matagofie, e maua ai fo'i le poto, a'o lea e fai mai e sa; Ona tago lea o Eva i le fua o le laau, ua ia avatu foi ia Atamu ona la aai ai lea i le laau fa'asaina. O le lē usiusitai i le Atua, o se agasala matuiā tele lea. O le agasala ua na lepeti le va lelei o le Atua ma le uluai tagata.

Peitai, o le itu aso o le pa'ū maualalo o le tagata ona o le agasala, o le itu aso tonu foi lea, tatou te iloa manino ai, le tu mati'e ma le silisili ese o le Alofa o le Atua i le tagata. Auā na iloa lelei e Atamu ma Eva le Atua o afio mai i le fa'atoaga ma valaau, ae tali mai ua lalafi, ona e le gata ua le lavalavā, ae ua fefefe foi. Ua tu'ua'i solo le mafua'aga o le sesē. O le mea ia manatua, ma sa le tatau foi ona galo ia Atamu ma Eva, “E leai se mea i lalo o le la e lilo i le Atua.” O lona uiga, e lē mana'omia se lafi, auā o le lafi, o le tino lea o le pepelo ma le lē fa'amaoni. E lē mana'omia se lafi, aua, e le'i valaau le Atua, ona na te lē o silafia Atamu ma Eva. Leai, e pei a ona fai atu, e lē lafi se isi i le silafaga a le Atua. Ae na valaau le Atua e alofa; Na valaau le Atua e fia feiloa'i i lana tagata. Na valaau e 'aia le lafi ma pepelo, ae sau i luma ma tautala sa'o, tautino i le Atua le sese i le loto ua salamō. Ona fusi lea ma o'po'o e le Alofa saili mai o le Atua.

Tupulaga o teine ma tama, e i ai itu aso tatou te sese ai, o le finagalo o le Atua; salamō ma fa'atuatua. O le usiusita'i lava lena e fua mai i mea lelei e manuia ai aiga, nuu, malo ma le Ekalesia. O lou ola usiusita'i i ou matua ma le Atua, o se fa'ata'ita'iga sili lena ona lelei, e te fesoasoani ai i isi ou uso ma tuafafine, ma fai ma ta'iala mo latou. O le usita'i, o le tino lena o le Alofa.

GALUEGA FAATINO:

1. Taligā Fesili: Sa e fa'alogo i le faiaoga i le fa'amatalaina o le tala, fa'aaoga mai lau Tusi Paia, ona tali mai lea o fesili e tolu i

lalo. * Mafaufau lelei, i le uiga loloto o lenei tala masani ai tatou.

(i) Na oti Atamu ma Eva pe leai, e pei ona fai mai ai le f.3, auā na maua e le Atua ua aai i le laau sa faasa? Fa’amatala mai sou iloa!

Tali: Ioe! Na oti Atamu ma Eva, faa-le-Agaga, auā na agasala ae lei oti faa-le-tino, e pei ona masani ai tatou pe a le toe manava.

(ii) O le f 7, O le a lau faitau atu i ai, sa tauaso Atamu ma Eva pe leai? Fa’amatala mai sona uiga loloto e tusa o lau faitau.

Tali: E lē tauaso Atamu ma Eva, o mea uma lava e vaai i ai i le amataga, o mea lelei uma lava i o la manatu ma mafaufau. Ae ina ua agasala, ua aai i le laau e iloa ai le lelei ma le leaga; o i’ina lea e fai mai le fuaiupu- “Ona pupula ai lea o la’ua mata”, fa’atoa la fa’avasegaina ai lea o mea, ua la iloa le ‘ese’esega o le lelei ma le leaga.

(iii) “O fea o iai oe?” O le fesili a le Atua ia Atamu i le f 9. O fea le fa’amatalaga e sili ona sa’o, pe a fua i le fesili o i luga?

(a) Na fia silafia e le Atua po o fea o lafi ai Atamu, ona e faigata ona iloa, e telē tele le fa’ato’aga.

(e) Na fia silafia e le Atua, pe loto tele Atamu e ta’u atu o ia lava o le tagata sesē, ma ‘aua le lafi ae sau!

(i) Na fia silafia e le Atua, po’o i ai se teine ma Atamu i le fa’atoaga.

Tali: (e)

PESE: 167 “Ina tutu i luga, e tau aimo Iesu”

A’OA’OGA:

1. E le lafi le tagata usita’i
2. E silisili ese le alofa o le Atua
3. Salamo ma fa’atuatua i le Atua.

.....

ASO SA: 4 MATI 2018

MATAUPU: UA LE MANATU I PA VAELOTO O LE FEITAGA'I (*Boundary of discrimination has been over looked*)

SINI Ia a'oa'o tamaiti ia latou iloa ma malamalama, o le lē manatu i le tele o itu e 'ese'ese ai ma isi, o le fa'aailoga o le fa'amuamua o le alofa, e finagalo ai le Atua.

TUSI FAITAU: Esoto 2: 1 – 10

FESOASOANI MO FAIAOGA:

O le tala ua tatou masani ai le tala lenei, i le fanau mai o Mose, i le taimi tonu ua ta'oto le tulafono sauā, ma le mata'utia a Farao le tupu o Aikupito. Fai mai le tulafono; “O tama uma lava e fanau mai, ia outou lafo i le vaitafe, a o teine uma lava, ia outou fa'aolaina” (Esoto 1: 22) E fanau mai la le tama, ua a'afia lava ma saisaitia i le tulafono ua taoto. Peitai, e ui i le mata'utia o le tulafono e le'i mate ai le fa'amoemoe o le tinā, talu ai lona alofa isi ana tama. Ua mavae le tolu masina, ona lalaga foi lea o le ato kome e tu'u ai, ona ua faigata ona toe natia o ia ua matua. Ua tu'u le ato-kome i le vao 'utu'utu i le auvai o le vaitafe, ona tulimata'i lea, po o le a se isi la'asaga e soso'o ai.

O le agai mai o le purinise e fa'amalū i le vaitafe, o ia ma lana galue teine, na iloa atu ai le ato kome, ma amia loa e aumai. O le f.6 fai mai – “Ua ia tatalaina, ua iloa ai le tama, fa'auta foi, ua tagi le tama, ona alofa lea i ai, ua fa'apea ane. O so le fanau a sa Eperu lenei.” Ua matuā ta'utino i'inei le lagona o le purinise, “o le alofa lea i le tama.” O lo'o ia silafia lelei foi, o le sa Eperū le tama, ae o lo'o taoto foi le tulafono a lona tamā, e uiga i tama tane, peita'i, ua lē mafai e ia faigata ma ia pa vaeloto ona toe liliu le loto o le purinise. O lona alofa fa'amaoni i le tama, ua le manatu ai i lona tamā ma le tulafono a le malo.

Ua ave le tama e lona tinā Eperu e tausii lelei, se'ia matua ma malosi, ona aumaia lea. O le tama lava a le afafine o Farao. Ua fa'aigoa foi e

le puriniseese lana tama ia Mose, auā na ia toina a’e o ia nai le vai. O lavasiga ‘ese’ese, o le fe’avea’iina ma le tausia o Mose tusa o le tala; o lo’o laualuga mai ai lava o le alofa, le malosi na galo ai le matuitui o le tulafono, ma lē manatu ai i le poloa’iga a le tamā; lea ua ola ai le tama. A’o ia mea uma, o lo’o tautua ai le mana fa’aola o le Atua, le na finagalo ia ola Mose mo ana feau mulimuli ane.

Tupulaga o tama ma teine, ua fa’atupula’ia le vevesi ma le femisaa’i o fanau i nei aso. O le femisaa’i ma le lē fealofani, o pa vaeloto ia ua lē faigofie ona sologa ma soloia i lalo. O le fesili – E faapefea ona lepeti ma soloia i lalo ia ‘ese’ese? ‘Aua le manatu i le pola o motu i tua, ae agai i luma le fa’amoemoe; alofa, fa’amagalo, ma fealofani fa’atasi ma isi ou uso ma tuafafine, le afaina pe e te lua le ao’oga fa’atasi, pe e te lua le nuu foi, ae ia fetausia’i i le alofa, e sili lena i le Alii.

Uiga o Upu ma Fuaitau

- | | | | |
|-------|---------------------------|---|--|
| (i) | na (f 2) | - | fa’alafi po o le nana |
| (ii) | ato kome (f 3) | - | O le ato e lalaga i le kome. (O le kome o le vao e ola i auvai o vaitafe, e pei o le vaitafe o le Naila, e vaivai, ae a mago e malo e pei o le ofe) |
| (iii) | pulu emeri
pulu safeta | | Ua lē o maua lelei le atunuu na mua’i maua ai ituaiga pulu ia. Pau le itu o ataata mai, o pulu e uli. O la lanu e pei o le ta, (ta auala) ae o le matua pipi’i lava. O pulu ia e puluti ai le ato-kome, ina ia le saofia e le vai. |
| (iv) | vao utuutu (f 3)- | | O le vao e ola i auvai, ai lava o le kome lea. |
| (v) | Mose (10) | - | toina a’e mai le vai. |

GALUEGA FA’ATINO:

1. Fa’aaoga lau Tusi Paia, faitau lelei ma mafaufau i le uiga o le mataupu, e faigofie ai le mea e fia fai.

Lisi o tagata (i) O le tasi tagata (ii) afafine o Farao

(iii) afafine o Levi (iv) tuafafine (iv) fafine fai lelei (vi) tina o le tama (vi) Mose.

- E lua itu e fia vaevae i ai tagata ia, o le A (Itu a le Atua) ma le E (Itu a Farao); A uma ona faavasega, ona tali mai lea o fesili o i lalo, e uiga i la tatou galuega o fai!

(a) E toa fia e lavea i le “itu A”, ae toa fia foi e i le “itu E”?

Tali: E ono i le itu A, ae leai le itu E

(e) E iai se tagata e leai se itu e alu i ai? Ta;’u mai le mafua’aga o lau tali.

Tali: E toatasi le tagata e leai se itu e alu i ai, o Mose.

E mafua ona o Mose e leai sona manatu, o ia o lo’o finau ai itu e lua, po o ai na te avea.

(i) O ai le tagata autu o le tala, o aliali manino mai ai le uiga o le mataupu, “ua le manatu i pa-veloto o le feitaga’i?”

Tali: O le afafine o Farao.

PESE: 74 Toatasi le ua sili, i uo i lalo nei

A’OA’OGA:

1. E leaga le ola fefulituaa’i.
2. ‘Aua le amana’ia le pola motu i tua (fe’ese’esea’iga)
3. Ia autu mea uma i le alofa.

.....

ASO SA: 11 MATI 2018

MATAUPU: IA FEALOLOFAAI TAGATA UMA O LE ATUA

SINI: Ia a’oa’o tamaiti ia latou iloa, e iloa gofie tagata o le Alii, i le ola fegalegalea’i fa’atasi ma fealolofaa’i.

TUSI FAITAU: Roma 12: 9 – 21

FESOASOANI MO FAIAOGA:

O le mataupu leni, o loo agai le fa’amamafa a le Aposetolo o Paulo, (le na ia tusia le tusi), i le fa’atauaina lea o le tino mai o le olaga o aso fai soo, ma le lagona o fa’atino ai tiute i le va nonofo ai o tagata. O le fetausia’i ma le nofo lelei, o le faailoga o le i ai o le Atua alofa ia te i tatou.

O le f 9 – 13, o fa’atonuga mai le Aposetolo, o ave faa-fautauga, po o tuuina atu o se taiala, mo le manuia ma le filemu o tagata uma. “‘Aua nei faataga alofa, ia inoino i le leaga, ia pipi’i i le lelei.” O le vaioa o le ola fa’afoliga po o le tele o itu ua masani ai le tagata. Ae fai le mea o finagalo ai le Atua mo tatou, o le ola lea e moni ma fa’amaoni le alofa; Le alofa e fesoasoani i isi tagata, ina ia avea ai i latou ma tagata lelei. O lona uiga, o le alofa e alu ai o tatou taimi, alu ai a tatou tupe, alu ai lo tatou malosi, atoa ma o tatou tagata; e ui ina e le faigofie, ae mafai ina ua moni ona tatou taliaina Keriso i o tatou loto.

I le f 13, o loo atagia ai, “O le aga-alofa faa-Kerisiano,” e ese mai le fa’afiafia fa’a-laua’itele. O le faa-laua’itele, e taula’i i le o talimalo: O le fale ia matua matagofie ma mama; E tatau ona matua tapena ia lava ma lelei meaa, ma isimea. Ia iloa foi le o tali malo, o se tagata to’amalie ma aga-fa’afiafia. A’e o le aga alofa faa-Kerisiano, e taula’i i malo. O le a lo latou mana’o, po o se nofoaga e mapu ai, po o ni taumafa e ola ai? O le taliaina lelei, o nafa tausii ia o le Kerisiano o i ai le alofa. O le aga alofa faa-Kerisiano o le mea e tuu i so o se nofoaga lava, e le fa’ailogaina se taimi po o se nofoaga fa’apitoe e fai ai.

O f 14 – 21, o ta aofai ai le ute o le olaga faa-Kerisiano. Afai tatou te alolofa i se isi e pei ona alofa mai Keriso ia tatou, o le a tatou loto e fa’amagaloina atu. Afai foi ua tatou maua le alofa tunoa o le Atua, o le a mafai fo’i ona tatou ofo atu i isi. Manatua, o le alofa-tunoa, o le mea foa’i fua mai a le Atua. A tatou avatu se vai e inu ai so tatou fili, tatou te le manatu, ua tatou le manatu i ona fa’aletonu; Ae leai, o lo’o tatou

amana'iaina ia, fa'amagalo atu ia ia, ma alofa ia ia, le afaina ona sese ma agasala, e pei lava ona faia e Keriso mo tatou.

I le f 19 – 21 – O le fa'amagalo e aofia ai, e le gata o le lagona a o le fa'atinoga. A faigata ona e lagona le fa'amagalo atu o se ua na fa'atiga ia te oe, taumafai e tali atu i ai i se gaoioiga alofa. Afai foi e mafai, fai i ai i lona tagata e te mana'o e fo'ia ma fa'alelei lo oulua va. Ofo atu lau fesoasoani; ave i ai se meaalofo. 'Ata'ata ma lau fofoga fiafia i ai. O le tele o taimi, o le a iloa ai, o lona gaoioiga sa'o sa e faia, e i'u i lagona tonu ma matagofie.

O le faataoto i le f 20 – “O le fa'afaupu'e o malala-ola i luga o le ulu.” Manatu o lo o fa'asino i le aganu'u faa-Aikupito, o le tauaveina lea o se mea o tumu i malala ola i luga o le ulu, o se tagata, o se gaoioiga fa'alauaitale o le lagona salamo. O le uiga o le fa'ataoto i'inei i le manatu o Paulo; E tatau ona tatou feutaga'i ma o tatou fili i le loto alofa, ona e i'u i lo latou matamuli ma mamā, ona liliu 'ese ai lea mai a latou agasala. O le auala sili lava e le toe ta'ua ai i latou o ni fili, ae ua liliuina i latou e fai ma uo.

Tupulaga o teine ma tama talavou – O le fealofani ma le fegalegalea'i fa'atasi, o le tino lona o le alofa faale-Atua, o fusia ai fanau. O lo tatou vala'auina lea, ona o nei aso, ua tele le fe'aina'i ma le taua'imisa o tupulaga. Po o a lava mafua'aga 'ese'ese o le ola fea'ina'i ma le lē fealofani, e tasi lava le upu faigofie e fa'amatala ai. Ua leai se alofa, o le leai o se alofa, ua mafua ai le tau'i ma sui, le leai o se loto fa'amagalo; ua le lagonaina ai e le isi le mafatiaga o le isi ma lona tiute e tatau ona fai. O le taulaga na osia e Iesu e ala i lona maliu ma lona toe soifua manumalo mai le oti ma le tu'ugamau. O le alofa fa'avavau lava lona ma fa'amaoni o le Atua mo le lalolagi uma.

Uiga o Upu ma Fuaitau:

.i) fetu'u (f 14) - fa'amalaia/upu leagaina/le alofagia

GALUEGA FAATINO:

1. Fa'amatala mai i au lava upu, le uiga o le vavao o fa'atonu mai e Paulo i le f.19. Ia faigofie ma malamalama lau toe fa'amatalaina o le manatu lea o le Aposetolo.

2. Saunia e lau susuga ni nai fesili, e tuliloa ai le iloa o lau vasega i le mataupu.

PESE: 142 (Le Alii e ia mafaufau)

A’OA’OGA:

1. O le Alofa o le meaalofa mai le Atua.
2. Aua le tau i ma sui
3. E lelei le fealofani fa’atasi.

.....

ASO SA: 18 MATI 2018

MATAUPU: IA ALOFA I LE TAGATA MATIVA MA LE TAGATA ESE

SINI: Ia a’oa’o tamaiti ia latou iloa, e ui ina ‘ese’ese tagata i le tulaga tau tagata-nu’u, ma le tulaga tau le tamao’aiga, a o le finagalo o le Atua, ia fusia tagata uma i le Alofa.

TUSI FAITAU: Levitiko 25: 35 – 46

FESOASOANI MO FAIAOGA:

O la tatou mata’upu o lenei Aso Sa, o fa’asaga tonu lava i le tagata mativa, ma le tagata ese. O tagata tonu ia e pale feagai ma le lē amana’ia, ma e faigofie fo’i ona vavae ese mai le sosaiete. Peita’i, o le ugia lautele o le tusi lenei o Levitiko, e le gata o le tusi o mamanu mai ai tiute fa’a-ositaulaga ma sã Levi i le tapua’iga; ae o le ta’iala foi e lima ta’ita’iina ai le ola fa’apa’iaina mo Israelu.

Tasi la lea vaega o le ola fa’apa’iaina e finagalo ai le Atua mo ona tagata, lea e fa’asino tonu i ai la tatou mata’upu. “Ia alofa i le tagata

mativa ma le tagata ese.” O lo o fa’atulaga mai e le Tusi Paia le taua tele, ma le ave lea o le fa’amamafa, i le fesoasoani i le tagata mativa, ma lē ua le maua se fesoasoani, ae masie lava i latou ua matua oti, fafine ua oti a latou tane, ma i latou e le atoatoa le malosi, i le sosaiete o tagata Isaraelu. E leai ni galuega e maua ni tofogi mo tina, o lona uiga, o le tina nofo fua ma lana fanau e leai se mea e ola ai, e pei o tagata mama’i ma lē atoatoa le malosi. O tagata matitiva la ia e tatau i ai le fesoasoani e aunoa ma se tau e fa’amoemoe e maua mai ai. O le matafaioi a aiga ma tagata ta’ito’atasi, e ala i le fesoasoani mo tagata matitiva, o le matua taua lava, aua e leai se fesoasoani a le malo mo latou.

O le f 35 – 37, o lo’o manino lelei mai ai le finagalo o le Atua, o le vavao o atagia mai ai, o le agasala le le amana’iaina o tagata matitiva. E le fa’atagaina i Isaraelu le mativa fa’asoloatoa i le olaga. O aiga mautu i le tulaga tau tupe, o la latou matafaioi le fesoasoani ma fai ni fale mo tagata o mo’omia ia mea. Ona o le tele o taimi, tatou te le faia ai se mea, ona fa’apea ua leai so tatou alofa, ae leai, pei ua tatou nonofo i le fa’aletonu ma nofononofo ai lava ua le iloa le mea e fai. E le o le finagalo o le Atua, ia tatou palasi atu i le mativa ma fa’aletonu, ma matitiva foi o tatou aiga, ona o le fesoasoani i isi, leai! Ae o le a le mea e maua ma talafeagai e fa’aalia ai lou alofa ma lau fesoasoani, o le uiga lena o le manatu.

O le f 44 – 46, o lo o atagia ai, le fa’atagaina e le Atua, o le fa’atau mai e Isaraelu o pologa, i lalo o la latou tulafono e le tutusa le faiga o pologa o tagata e lē ni pologa, ma aloaia, ae le o ni manu, tulou. O lona uiga, o pologa a Isaraelu, e auai i mea tau le tapua’iga, malolo foi ma fa’amamalu le sapatu. E le o ta’ua lava i le Tusi Paia, faapea o fa’amagalalo pe le o amanaia sese o pologa; ae amanaia lo latou i ai. O lo o aumaia i tulafono a le Atua le tele o taiala, mo le faia lelei o mea totino a pologa.

Tupulaga o teine ma tama, o outou o le lumanai o aiga, nuu, ma le malo ma le Talalelei. Ia fai outou ma fa’aa’oa’o i tagata, i le mea o finagalo ai le Atua. O le fealofani moni lava, e le faailogaina se tagata, ae tutusa tagata uma i lau vaai ma lou alofa, le afaina le lanu, le malosi, po o le a lava le tulaga o i ai, ae o tatou uma o tagata soifua, na faia e le Atua e foliga ia te Ia. O le taulaga o le Fa’aolataga na faia e Iesu, e le gata ia fealofani, ae ia fa’aolaina tagata uma lava.

GALUEGA FAATINO:

1. Tatala mai lau ato ponapona
 - (i) Faitau lelei le vavao, po o le tulafono o aumai i le f 35 – 38, ina ia e matua malamalama lelei i ai, ona fa’amatala mai lea i au lava upu; Po o fea e pogai mai ai, ae po o le a foi le mafuaaga ua vaoia ai e le Atua lona nuu faapea, mai le sue o se mea fa’asili mai le tagata mativa ma vaivai?
 - (ii) O le a le mafua’aga o le fa’asa e le Atua ona koloni, pe fai pei o ni pologa isi tagata Isaraelu e isi e tele tupe, seia aulia le tausaga o le Iupeli, po o le tausaga o le saolotoga?
- Note – Mafaufau i le tala i Aikupito ma le ō ese mai o Isaraelu, e fa’atupu manatu ia te oe ma lau tali,.
2. Fai e lau susuga nisi fesili e te finagalo ai, tou te fetufaa’i ai ma le vasega.

PESE: 71 (Ua ou vivii ma fa’afetai Iesu i lou alofa mai)

A’OA’OGA:

1. E le fa’apologaina se tasi e le Atua.
 2. O le Atua, o le alofa lava ia
 3. E lelei le fealofani faatasi.
-

ASO SA: 25 MATI 2018 (ASO SA LAUPAMA)

MATAUPU: O LE ULUFALE ATU O IESU I IERUSALEMA

SINI: Ia a’oa’o tamaiti ia latou iloa ma malamalama, o le ulufale atu o Iesu i Ierusalem; o le taeao lava na atofa, o vavala mai ai malama o le Fa’aolataga tele mo le lalolagi.

TUSI FAITAU: Ioane 12: 12 – 19

FESOASOANI MO FAIAOGA:

E lelei foi pe a tatou amata le mata’upu o lenei Aso Sa i se fesili. O i ai se taua o le ulufale atu o Iesu i Ierusalem, a o le a se fa’amoemoe ma se lelei mo tagata?

O le tali mo le fesili, ou te manatu o la tatou mataupu atoa lena. O le upu moni, e le mafai e lo tatou vaivai ma le lē āuga, ona fa’amatala le loloto ma le pa’ia o fuafuaga a le Atua. A’o lona lava foi Agaga mana, e fa’amatala loto mai i lo tatou vaivai, lea e mafai ai ona tatou iloa le taua ma le fa’amoemoe o le Atua, e pei ona ulufale atu Iesu i Ierusalem.

Toe pau a lea, po o le vaiaso mulimuli lea o le galuega a Iesu i le lalolagi. O le vaiaso tonu foi o le tumutumu o le aai, ona o le fa’amanatuina o le paseka, po o le aiga o fa’amanatu ai le lavea’iina ma le faaolaina o Isaraelu i le po na fasia ai ulumatua uma a Aikupito. O lona ulufale la i Ierusalem o ti’eti’e atu i le tama’i asini, a’o matamata ma molimau le faitau afe ma afe o Iutaia i lona afio atu. O ia lava o le tupu na valo’ia, o le Mesia o faatali i ai Iutaia; O le ala lea o lo latou vivi’i i le Atua, Alalaga Osana, ma talotalo atu ia te Ia. O lo o sa’o lava le manatu o Iutaia, o Iesu ua afio mai o lo latou tupu, ae sese i lo latou taofi, o le tupu faa-va-o Malo, na te fa’aatoatoa le mamalu ma le malosi o Isaraelu, i le tulaga tau militeli (military force). O le lē malamalama lea o Iutaia i le uiga moni o le misiona a Iesu, na mafua ai ona toe liliu isi ma toe tete’e atu ia te Ia.

Peita'i, o le ulufale lava ia o Iesu i Ierusalemā, o lo o talafeagai lelei le taimi, aua o lea o le a taualuga lana galuega fa'aola (galuega lavea'i) na afio mai e fai. O le taimi fo'i ma aso, ua uma lava ona ia tautala i ai, e pei ona sa ia mua'i ta'u atu. Ae le'i iloa e ona so'o ma le au Iutaia ia mea i le fuata'iga, po o le ulua'i taimi. Na fa'atoa latou manatua ma iloa, ina ua o'o Iesu i lona mamalu. O le taua la lena o lona ulufale i Ierusalemā le ogatotonugālemū o le tapua'iga, o i'ina fo'i e osi ai le taulaga. O le fa'amoemoe fo'i o le Taulaga a Osia, ia ola le lalolagi, ma o le mea e sili ona lelei mo tagata uma o le lalolagi. E ui lava fo'i ina tete'e le toatele, ae ua le mafaitaulia fo'i i latou ua mau loto ma mulimuli ia te Ia, aua sa vā'ai tino i le toe fa'atuina e Iesu o Lasalo mai le oti, ma latou aga'i fa'atasi mai ai ma ia i Ierusalemā. Tagata molimau nei, ua gugulu ai le au-faresaio ma fai ane ia Iutaia, "Tou te le iloa ea, ua le aoga sa outou mea e fai? Faauta, ua mulimuli atu le lalolagi ia te ia".

Tupulaga o tama ma teine, ia avea tatou ma molimau fa'amaoni i le Fa'aolataga na faia e Iesu, e pei ona ia ulufale atu ai i Ierusalemā, fasiotia ma tanumia, ae na toetu manumalo mai le aso tolu, e pei ona sa ia mua'i ta'u atu. O le fa'amoemoe o lea Fa'aolataga na faia e le Atua e ala ia Iesu lona Alo pele, ia ola manuia ma lelei tagata o le lalolagi.

GALUEGA FAATINO:

Taliga Fesili

1. O le a le mafua'aga na alalaga ai tagata Osana ma fa'aalia lo latou fa'aaloalo ia Iesu ina ua afio atu?

Tali: Aua sa latou talitonu, o le latou tupu lea ua afio mai, le Mesia sa valo'ia.

2. Ae aisea na toe ita ai ma fa'asatauro ia te Ia?

Tali: Ona ua ese lo latou manatu; o se tupu malosi ma logologoa i mea tau taua; ae leai o le tupu o le filemu ma le malosi tau le loto ma agaga.

3. O le a le taimi na iloa ai e so’o Iesu ma talitonu ia te Ia?

Tali: E le o le taimi muamua, ae ina ua o’o iesu i lona mamalu.

4. O le o’o Iesu i lona mamalu, o le a le uiga?

Tali: O lona toetu manumalo mai lea i le oti, ua fa’aeaina ma ua mamalu, aua ua na fa’atoilao e Ia le toe fili, o le oti lea.

5. O ai molimau maumaututu ia Iesu i lona ulufale atu i Ierusalem?

Tali: O i latou na vā’ ai tino i le toe fa’atuina e Iesu o Lasalo.

PESE: 23 “Sauni atu tatou nei...”

A’OA’OGA:

1. Ia mamalu le Atua i lou loto

2. O Iesu o le Fa’aola

3. O ai lou tupu?

.....

MANATU TAIALA APERILA: O LE ATUA O LE OLA FOU *God is the Source of Life)*

ASO SA: 01 APERILA 2018 (ASO SA TOETU)

MATAUPU: O LE TU’UGAMAU TU’UFUA.
(The empty tomb)

SINI: Ia a’oa’oina le fanau ina ia malamalama, o le tu’ugamau tu’ufua o le fa’ailoga o le ola fou.

TUSI FAITAU: Ioane 20: 1 – 10

FESOASOANI MO FAIAOGA:

E 'ese'ese uma lava le fa'amatalaina e le au fai evagelia o lenei tala uiga ese, e uiga i le tu'ugamau tu'ufua, ma le toetu mai o Iesu nai e ua oti. Fai mai le isi vaega e to'alua tina na o i le tu'ugamau i le taeao o le Aso Sa, ae fai mai isi e to'atolu. A'o Ioane e na o le to'atasi. Ae ui i ia 'ese'esega, ae le ave'eseina ai le taua o le tala ua molimauina, o le toetu mai o Iesu, ma le tu'ugamau ua avanoa.

O le mataupu o lenei Aso, o le a tatou va'ava'ai ai i nisi o mea taua na iloa i le tu'ugamau tu'ufua, ma le uiga o le tu'ugamau tu'ufua, e tusa o le molimau a Ioane. f. 2. O lo'o taua i le fuai'upu lea le tala a Maria na ia fai atu ai ia Peteru ma le so'o na alofaina e Iesu. Fai mai a ia, *"Ua latou ave'eseina le Ali'i i le tu'ugamau; matou te le iloa foi le mea ua latou tu'uina ai o ia"*. O le mea muamua o lo'o atagia mai i le fuai'upu lea, o le lē iloa e Maria o le mea ua ave i ai Iesu. O i o lo'o atagia mai ai le lē talitonu ma le ola masalosalo o le auso'o i fetalaiga a le Ali'i. Aua o lea ua mautinoa lava e leai se tasi na mafaufau i le uiga o fetalaiga a Iesu e uiga i lona maliu ma lona toetu. Ae o lea ua tu'ufesili po'o fea ua ave i ai e tagata Iesu.

O le fa'ai'uga o upu a Maria o lo'o fa'apea mai ai, *"..... matou te le iloa foi le mea ua latou tu'uina ai o ia"*. E foliga mai i le fa'a'upuga lea, e le na o Maria na alu i le tu'ugamau, ae e i ai ma nisi tagata. Aua o le fa'a'upuga lea a Maria o lea na fai ia Peteru ma Ioane, o uluai so'o na logo i ai e Maria lenei tala mata'utia. f.6&7. *"Ona o'o atu lea o Peteru, sa mulimuli atu ia te ia, ua ulu atu ia i totonu i le tu'ugamau, ua va'ai atu i ie na tanuma'i ua tu'u, ma le solosolo sa i lona ao, e le'i tu'ufa'atsi ma ie na tanuma'i, a ua tu'uese, ma ta'ata'ai i le tasi mea"*.

O le fa'a'ailoga lea o le uiga ese o le malosi o le toetu, ua le mafai ai e le tu'ugamau ona taofi mea a le lagi, ae ua na o mea a le lalolagi. O a mea a le lagi, ae o a foi mea a le lalolagi? O Iesu Keriso, o ia o le mea e patino i le lagi. Ae o ie ma solo na aui ai Iesu, o mea ia a le lalolagi. Lea lava ua na o le pau ia o mea ua gata ai le malosi o le tu'ugamau. Peita'i o Iesu, ua le mafai lava e le malosi o le tu'ugamau ona taofi ia te Ia. Ae o le fa'aaliga lea o le malosi Silisili Ese o le Atua, e le mafai lava e se mea o lenei lalolagi ona vaoia.

Ae o le uiga lea o le tu'ugamau tuufua e pei ona tau fa'amatalaina mai e Ioane. E ui e le o tu'ufua le tu'ugamau, aua o lo'o i ai lava ie i totonu o le tu'ugamau. Peita'i, o mea ia e pala ma avea ma palapala, ma avea ai

le tu'ugamau ma mea tu'ufua. Ae o le Alii toetu, o ia lava e le o'o i ai se pala e tusa ma le molimau a le tusi o Salamo. (*Sal. 16:10*) O le tu'ugamau tu'ufua la e pei o le tatou autu o lenei aso, o le fa'ailoga o le malo a'ia'i o lo tatou Ali'i i le oti ma le tu'ugamau.

GALUEGA FAATINO:

Ia fa'atino e le vasega le tala, ona saunia lea e lau susuga ni fesili e tulituliloa ai le mataupu.

A'OA'OGA:

1. Ia atagia i lau amio o aso uma, o oe o le tama ma le teine manumalo, ae le ose tagata faiaina.
2. Faafetai i le Atua ona o le meaalofa o le tu'ugamau tu'ufua, ua avanoa ai le faitotoa o le ola fa'avavau mo tatou uma.

.....

ASO SA

8. APERILA

MATAUPU:

IA FAI OE MA FA'AOLA I ISI TAGATA

SINI:

Ia a'oa'oina le fanau ina ia latou iloa le taua o le fai ma faaola i isi tagata, tusa lava pe agaleaga mai.

TUSI FAITAU:

Kenese 45: 1 – 7

FESOASOANI MO LE FAIAOGA:

Manatu ua malamalama lelei lau susuga i le faiaoga i le tala lenei ia Iosefa ma ona uso, ma le mea leaga a uso o Iosefa ma fai ia te ia, se'ia o'o lava ina fai Iosefa ma fa'aola ia te i latou. Ae ua na o ni nai motugā afa e ta'atia atu i ou tafatafa e fesoasoani ai i le fa'amalamalamaina o le mataupu i le fanau.

O le Tusi Faitau o lenei taeao, o lo’o talanoa i le taimi ua le mafai ai e Iosefa ona toe nanā o ia i ona uso. Manatua fo’i o Iosefa na agaleagaina e ona uso, ona latou fa’atau atu lea o ia i tagata o Mitiana, se’ia o’o lava ina o’o Iosefa i totonu o Aikupito, ma avea ai o ia ma tagata fa’atuatuaina e Farao le tupu o Aikupito. Ae o le o’o mai o le vaitau o le oge i Kanana, na afua ai ona auina e Iakopo lana fanau e o atu i Aikupito, e fa’atau mai ai ni meaai ma latou. O i’ina la na toe feiloa’i ai Iosefa ma ona uso.

Fai mai sa le mafai e Iosefa ona ta’u sa’o i ona uso, o ia o Iosefa. Ae sa ia taumafai e su’e ona uso, pe moni lava lo latou saili fesoasoani mai i Aikupito. O le ala lea na auina atu ai i latou e Iosefa, ina ia toe foi i Kanana e aumai lo latou uso la’itliti, o Peniamina e fai ma fa’amaoniga o i latou lava o tagata saili fesoasoani. Na toe fo’i tama i Kanana ma ta’u atu i lo latou tama mea uma lava e pei ona poloa’i atu ai Iosefa, a e le i iloa e i latou o Iosefa. Sa manatu lava i latou o se Aikupito o ia.

E ui lava sa faigata si toeaina ona fa’amatu’u atu Peniamina e o ma i latou, ae sa iu lava ina talia ona o le augani a Iuta, ma lana ta’utinoga na fai, afai ae le toe fo’i mai Peniamina, ia malaia lava o ia. Na toe fo’i atu tama fa’atasi ma Peniamina lo latou uso la’ititi i Aikuputo, ma latou toe feiloa’i ai ma Iosefa, fa’atasi ai ma Simeona o le isi o le auuso na fa’afalepuipuiina e Iosefa.

O le mataupu la e 45, o lo’o fa’amatalaina ai le ta’u sa’o atu lea e Iosefa i ona uso, o ia o Iosefa. E ui ina fefefe le auuso uma, ae na fa’amafanafanaina i latou e Iosefa. Faimai a ia, “Aua ne’i tiga outou , pe fai ma mea leaga ia te outou, ina ua outou fa’atau mai ia te a’u i le mea nei; aua na auina mai a’u e le Atua e muamua ia te outou e fai ma fa’aola”

Ioe, e ui ina leaga le mea na faia e uso o Iosefa ia te ia, ae le’i ave’eseina ai lona alofa i ona uso. E le i manatu fo’i e tau ma sui atu i lo latou agaleaga ia te ia. Ae peitai, e le’i va’ai Iosefa i se itu leaga o le mea na faia e ona uso, ae sa ia va’ai mamao, ose mea lelei ma ose mea foi na faia e le Atua, aua aso leaga fa’apenei.

Sa ia le toe manatu i mea na tutupu ae ua manatu, o se avanoa lelei lea ua saunia e le Atua, e fai ai o ia ma fa’aola mo lona aiga ma lona nuu. Ae o i foi ua ta’u mai ai ia i tatou, o le Atua e mafai fo’i ona ia fesoasoani mai i le tagata, ini auala e faigata ona talia i le loto. Ae o i’ina, e fa’aalia ai lona mana ma lana pule aoao i mea uma lava.

GALUEGA FAATINO:

Ia saunia e lau susuga a le faiaoga ni fasi pepa, ona tufa lea i tamaiti. Tu'u le avanoa e tago ai le tamaitiiti ia e tusi mai se mea e mana'o e fai e le isi tamaitiiti ia te ia. E tatau ona fa'alilolilo le tusiga o pepa. A mae'a ona ao lea e lau susuga i le faiaoga pepa a tamaiti, Ona e tago lea e lau ta'itasi mea na tusi i pepa.

Fa'ataitaiga: O oe o Simi, a'o a'u o Toma. O le mea lea na ou tusia i la'u fasipepa; "*Ou te mana'o e sau Simi e salusalu o'u atigivae*". O le mea la e fai e lau susuga i le faiaoga, o le fai lea ia Toma, e alu e salusalu atigivae o Simi. O le uiga o le ta'aloga lea, aua e te faia se mea e te le mana'o e fai mai e se isi ia te oe.

PESE: *Aapa atu ma fa'aola se agaga ua leiloa.*

A'OA'OGA:

1. Ia fai i tatou ma tagata e ola ai nisi tagata, tusa lava pe agaleaga mai.
2. Aua le ola tau'i ma sui, ae ia ola fa'amagalo
3. E tele auala e fesoasoani mai ai le Atua ia i tatou.

.....

ASO SA

15 APERILA

MATAUPU:

O KERISO O LE MALOLOGA LELEI O Ō TATOU AGAGA

(Christ gives good rest for our weary souls)

SINI:

Ia a'oa'oina le fanau ina ia malamalama ia Iesu o le malologa sili mo ō tatou agaga.

TUSI FAITAU:

Mataio 11: 2

FESOASOANI MO LE FAIAOGA:

f.28. *“Ia outou omai ia te a’u, o outou uma o ē tigaina ma mafatia i avega, o a’u fo’i e malolo ai outou”.*

O le upu “avega” o lo’o ta’ua i le fuaiupu lea, e le o se avega e pei o avega ua masani ona tatou vaai i ai. E pei o avega popo, fafie, ulu ma isi lava mea mamafa e mafai ona tauamoina i o tatou ua. O avega na, tatou te matua lagona lava le tigaina ma le mafatia o ō tatou tino, pe a mamafa tele. Peitai o le avega o lo’o taua e Iesu i lana fetalaiga lea, o mea ua fai ma mea mamafa i loto o tagata. Aemaise lava i le tausiga o tulafono o le lotu Iutaia, lea e pei ona ta’ua e Iesu i le fa’aiuga o le mataupu e lima. Tulafono na aumai i le Feagaiga Tuai, ae ua fa’auiga sese e ta’ita’i o le lotu Iutaia, ma ua le maua ai se saolotoga o tagata lautele, ona ua fai mea ia ma avega mamafa ia i latou.

Mea la na, o lea e fa’atatau i ai le fetalaiga a le Alii o Iesu. O avega e le mafaia lava e se tagata ona fa’amāmā, sei vagana lava lo tatou Ali’i fa’aola. Aua o avega masani e pei ona ta’ua i luga, e mafai e le tagata ona fa’amāmā e fua i lona malosi. Peitai a mamafatū loa se mea i o tatou loto, e le mafaia lava la e se poto ona ave’ese le ituaiga mamafa lea, sei vagana lava Iesu.

f.29. *Ia outou amoina la’u amo, ma ia outou fa’aa’oa’o ia te a’u, auā o a’u lē agamalū ma le loto maualalo; ona maua lea e outou o le malologa mo outou agaga”.*

O le amo a Iesu, o le loto maualalo ma le agamalu. O lona uiga o lea e faimai Iesu, ia tatou ola i le loto maualalo ma le agamalu e pei o Ia. Aisea? Aua foi ona pau lea o le auala e mafai ai ona tatou maua le filemu. Po’o le a lava le pepesi mai o fa’afitauli, ma taufa’aleaga mai nisi tagata ia i tatou, ae a tatou maua le loto maualalo ma le agamalu, e leai lava se mea o le a tatou popole ai. E faigofie foi ona tatou faia fa’aiuga lelei, mo le manuia o isi tagata.

O le tagata loto maualalo ma agamalu, e le gaoiā, e filemu ma onosa’i, e loto alofa foi, e le fia tauai ma sui, e fiafia. Ae o foliga na o le tagata ua maloloina lona agaga. Le tagata e fiafia lava o ia i le Atua i taimi uma. Na te le amanaiaina le lalolagi ma ona leaga, ae naunau i le alofa ma le fa’amaoni.

f.30. *“Aua e avegofie la’u amo, o la’u avega foi e māmā ia”.*

E pei ona taua i luga, o tulafono, o avega mamafa ia o lo’o fa’atatau i ai le fetalaiga lea a Iesu. Ona o mea ia ua fai ma ala o le ola saisaitia ma le ola pologa o tagata. E manuia ai lava le au faitulafono, ae ua taotaomia ai le ola vivi’i o tagata i le Atua.

Lea la ua fetalai Iesu, e avegofie lana amo, o lana avega foi e māmā ia. E le o le uiga o le fetalaiga a le Ali’i a mea o avega mamafa ua faigofie ona tauamo, e leai. Ae o le uiga o le fetalaiga a le Alii o Iesu, o le avega e tauamo i le alofa, o le alofa foi e māmā ai mea mamafa uma. A tatou iloaina o la tatou avega o le alofa i le Atua ma alofa i le uso, ona pei lava lea o mea mamafa, ose pese ia i tatou.

Sa i ai se toeaina sa ia va’aia pea lava le galuega a se tasi alualutoto, o le amoina lea o se isi tamaitiiti pipili. Sa fai atu le toea’ina i le tamaitiiti lenei, “Sole! Ua fai ma au avega mamafa le feamoa’i solo o lena tamaitiiti pipili i lou ua” Na tali mai si nei alualutoto, “E le o se avega mamafa ia te a’u si o’u uso pipili”. O le avega e fai i le alofa, ma tauamo i le alofa, e le taitai ona mamafa, ae māmā pea i taimi uma, e tusa po’o le a le umi ma le mamao e tauamoina ai.

Manatua, e ui lava ose avega mamafatu na tauamoina e lo tatou Ali’i o Iesu, e ala lea i agasala a le lalolagi, ae sa māmā lava ia te Ia, ona o lona alofa na fa’atino ai lana galuega fa’aola. O le malologa sili foi lea mo agaga ua fa’apologaina i le agasala, pe afai e talitonu ma fa’atuatua le tagata i lea fa’aolataga na ia faia.

GALUEGA FAATINO:

Ia saunia pea e lau susuga i le faiaoga ni fesili e tuliloa ai le malamalama o tamaiti i le mataupu.

PESE: Tulei ese, tulei ese.

A’OA’OGA:

1. O Iesu Keriso e fa’asa’olotoina i tatou mai i le pologa i le agasala.
2. O le alofa, o le amo malosi lea e mama ai avega o ō tatou agaga..

3. Talitonu ia Iesu, o le malologa sili lea mo ō tatou agaga.

.....

ASO SA: 22 APERILA.

**MATAUPU: LOTO FAAMAGALO E FAASAOINA AI LE
OLA O LE USO A TAGATA.**

SINI: Ia a’oa’oina le fanau ina ia latou matua malamalama lelei i le taua o le loto fa’amagalo, e laveai’ina mai ai se ola ose tasi tagata.

TUSI FAITAU: 1 Samuelu 26: 13 – 25

FESOASOANI MO FAIAOGA:

O le fa’alua le ona maua e Tavita o Saulo, ma ia fa’asaoina lona ola. E pei ona ta’ua i le mataupu e 24 o le tusi lava lenei, le sesele ‘ese ai e Tavita o le pito ‘ofu o le ‘ofu o Saulo i totonu o le ana o Enokati. E ui ina taumafai pea Saulo e tulituliloa ia Tavita ina ia fa’ao’o ia te ia le oti, peita’i e le i faia lava i ai e Tavita se mea leaga ia Saulo, ona sa ia mafaufau o Saulo o le auauna fa’au’uina e le Atua.

O le avanoa lona lua la lea sa tatau ai lava ona fasioti e Tavita le tupu o Saulo, lea e pei ona i ai le tala o lenei taeao. E ui ina sa fa’asaoina e Tavita le ola o le tupu o Saulo i le uluai taimi i totonu o le ana, ma ta’utino ai e le tupu nate le toe faia se mea leaga ia Tavita, peita’i o lea lava ua toe lamalama fo’i o ia ina ia fasioti lava ia Tavita. Ae e le’i tu’ulafoai’ina e le Ali’i lana auauna o Tavita.

E le tasi se fa’afitauli o lo’o feagai nei ma Tavita. E le gata o le lamalama o Saulo e fasioti ia te ia, ae o lona solasola ese ma Saulo, ua avea foi lea ma ala o lona alu ese mai lona aiga, ma lona nu’u, aemaise lava, o le tapua’iga e masani ai i lona Atua. Ae manatua foi, o le taimi lea ua uma ona fa’au’u Tavita e fai ma tupu o Isaraelu, ina ua le fa’alogo ma le usitai Saulo i le Atua.

O le maua fa’alua la lea o Saulo e Tavita, ma ua manatu ai Apisai le tama a Seruia, o le avanoa lelei lea, e oti ai Saulo i le lima o Tavita. O le

manatu o Apisai, o lea ua tu'u mai e le Atua i lima o Tavita, lona fili o Saulo ina ia fasiotia o ia i lea aso. Peita'i, ua manino mai i le tali a Tavita, o ia ose tagata agamalu ma le loto mauualalo. Ae ose tagata foi e onosai ma fa'apalepale, atoa ai ma lona mata'u i le Atua. O lana lava lea tala, e le o'o lona lima i le ua fa'au'uina e le Atua. E ui lava ua iloa e Tavita ua uma ona fa'au'uina o ia e fai ma tupu o Isaraelu. I lona tulaga fa'atupu la, ua na le faia ai se fa'aiuga mo Saulo, ae ua ia tu'u atu pea i le Atua o le na ia filifilia Saulo e fai ma tupu, nate faia se fa'aiuga mo Saulo.

O le loto fa'amagalo la o Tavita, ua fa'asaoina ai le ola o Saulo, o le na manatu e fa'ao'o le oti ia te ia talu le mana'o e fai Ionatana ma tupu. Peita'i, o le loto o le tagata, e le o le finagalo lea o le Atua. Ua a'oa'oina foi i tatou i lenei tala i le taua o le onosa'i ma fa'atalitali atu i le Atua. E pei ona taua, o Tavita ua uma ona fa'au'u e le Atua e ala ia Samuelu lana perofeta, e fai ma tupu o Isaraelu. Ae aisea na le ave'esea ai loa Saulo i lona taimi ae tu'u loa i ai Tavita? Manatua, e i ai lava le taimi o le Atua. Tusa lava pe ua filifilia i tatou i ni tofiga, e i ai lava le taimi e tatou te tapenapena ai ma saunia lelei i tatou, ae tatou te le'i o'o atu ina fa'atino se vala'uina. O lona foi tapenaga, tatou te fetaia'i ai ma le tele o lu'itau ma fa'afitauli e tofotofoina ai tatou, pe tatou te lavatia ona onosa'i ma fa'atalitali atu i le Atua ma le loto fa'amaualalo.

Uiga o Upu:

- i) f 19. Ului: fa'aoso
- ii) f 20 Koli: o le manu pei se 'oti, e sola lava ia i tumutumu mauga e sao ai mai ona fili.

GALUEGA FAATINO:

N.B: E lelei ona vaelua le vasega, ona fa'atino lea e le isi vaega le sesele'eseina e Tavita o le pito ofu o Saulo, i le mataupu e 24, ae fa'atino e le isi vaega le ave'eseina e Tavita o le tao ma le faguvai a Saulo i le mataupu e 26. A ma'e'a, ona fesiligia lea o le vasega ini o latou manatu i fa'atinoga e lua, ma ni aoaoga fou ua maua mai ai.

PESE: A'apa atu ma fa'aola, se agaga ua leiloa.

A'OA'OGA:

1. O le loto fa'amagalo, e laveai'ina mai ai se soifua mai i le oti.
2. Ia maua le onosa'i e fa'atali ai i le Atua mo se fa'aiuga lelei.
3. Aua le ola taulamalma i le isi uso.
4. Tauai atu le leaga i le lelei.

.....

ASO SA 29. APERILA 2018

MATAUPU: UA LILO I TAGATA LE ATUA E MAUA AI LE OLA

SINI: Ia a'oa'oina le fanau ina ia latou iloa ma malamalama lelei i le mafua'aga o le tutulu o le Ali'i o Iesu, fa'atasi ai ma le taua ole iloa o le Atua o le ola.

TUSI FAITAU: Luka 19: 41 – 44

FESOASOANI MO LE FAIAOGA:

Na o le Evagelia lava lenei a Luka, o lo'o taua ai le tutulu o le Alii o Iesu, a'o aga'i atu i lana malaga faa-Tupu i Ierusalem a le aai paia. Ma e pei e foliga mai ai ua fa'alavelaveina le ulufale atu o le Tupu i totonu o lana lava aai, le ogatotonu o le tapua'iga Iutaia.

Peitai, e i ai le fe'au na mafua ai ona fa'amatala e Luka, le tutulu o le Ali'i o Iesu. Manatua foi o lea ua tu lalata le Ali'i i le fa'ataunu'uina o le fatu o lana galuega fa'aola. Ma o le fa'amoemoe maua luga sa i ai i lona finagalo, e tata ona o'o ane i le taimi lea, ua aloa'ia e ona lava tagata lona afio mai o ia o le Tupu, ma lona ulufale atu i le aai pa'ia.

O le tutulu la o Iesu ina ua silasila atu i le aai o Ierusalem, o le ata lea o le vai o le a tafe ifo mai i le lagi, ma tineia ai faiga pi'opi'o ma le le alofa ua sasao faa-afi i totonu o Ierusalem. O le ala lea o le tutulu o le

Ali'i o Iesu, ona ua silasila atu i le aai pa'ia sa fai ma olataga o so'o se Isara'elu, ua le o toe i ai se ola, ae ua na o le oti. Le aai sa saili i ai le manuia o tagata, ae ua leai se manuia e toe maua ai, ua na o le malaia. Ua amata mai lava i ta'ita'i o le lotu Iutaia ona le fa'amaoni i o latou tiute. Ua latou fa'asili i latou ma lo latou lelei, ae ua taotaomia ai le lautele o tagata. O le ala foi lea o lo latou te'ena o le Ali'i o Iesu i lana galuega fa'aola, ma latou le talia ai o Ia o le Mesia valo'ia, ae ua latou manatu ua na o se tagata fa'atauva'a lava. Ua latou le lagonaina i o latou loto le afio mai o Iesu e aumai le manuia mo lona nuu. O le nuu sa fa'amoemoe i ai le Alii o le a latou matua talia lelei lona afio mai, ae leai, ua taulamua i latou i le tetee ia Iesu.

O le uiga lea o lana fetalaiga e pei o le tatou Tusi faitau o lenei taeao. Ua lilo i loto ma mafaufau o tagata Iutaia, o le manuia lea mo latou, ma ua galo ai ia i latou le Atua ua afio mai e aumai le ola.

O le fuaiupu e 43 ma le 44, ua vavalu mai ai e Iesu le mea o le a tupu i le aai o Ierusalem. O le malumalu fo'i na fai ma o latou mitamitaga, o le a le toe vaai i ai, aua o le a matua olopalaina lava ma lepetia. Ma e le mafai lava ona toe sao se tasi pe a o'o mai lea aso, ae matua faaumatia lava, e le toe pule foi se tasi i le lalolagi o tagata, aua o lea ua afio mai le pule Silisili ese nate pulea le lalolagi uma. Aua o lo latou teena o le Alii o Iesu, o lo latou matua teena lava lea o le Atua e maua ai le Ola.

GALUEGA FAATINO: Li'o mai upu nei totonu o le paso.

Lisi o upu

- | | |
|-------------|--------------|
| 1. Latalata | 8. iloa |
| 2. Silafia | 9. taomia |
| 3. Lilo | 10. ita |
| 4. Atiinae | 11. olopala |
| 5. Tagi | 12. vaai |
| 6. Aso | 13. tapuaiga |
| 7. Atua | 14. toa |

L	A	T	A	L	A	T	A
I	T	A	I	M	O	A	T
L	U	O	F	U	L	P	I
O	A	T	A	G	I	U	I
V	U	P	L	K	M	A	N
V	A	A	I	R	T	I	A
F	E	O	S	A	I	G	E
O	L	O	P	A	L	A	S

PESE: 143 (Pese & Viiga)

A’OA’OGA:

1. Aua nei galo le Atua o le ola
2. O Iesu o le Tupu
3. Tatou te maua manuia, pe a talitonu ia Iesu.

.....

**MANATU AUTU O ME: O LE ATUA MA TINĀ
(GOD & MOTHERS)**

ASO SA: 6 ME 2018

**MATAUPU: FA’ATALITALI I LE FA’AOLATAGA A LE
ATUA**

SINI: Ia a’oa’o tamaiti ia latou iloa; O le fa’atalitali i le loto talitonu fa’amaoni ma le fa’atuatua i se mea, o le olioli moni lava lona taunuuga, ma o le vi’iga sili lena mo le Alii.

TUSI FAITAU: Luka 2: 36 – 38
FESOASOANI MO FAIAOGA:

O Ana, o le Perofeta fafine (tinā) o taua i la tatou mataupu; o le afafine o Fanuelu, mai le ituaiga o Asera. O Asera, o le tama lona valu lea o le fanau e toasefulu ma le lua a Iakopo. O lo’o ta’ua foi i le mataupu lava lenei o le tusi a Luka, se tasi o tama e igoa ia Simeona. E mafai ona taua fa’atasi Ana ma Simeona i’inei, o tagata matutua sa faatalitali i le faaolataga, ma o la loto talitonu fa’amaoni i le Atua. O le fa’aolataga, o Iesu Keriso lava lena le Mesia sa valoia o le a afio mai.

O le a taoto la Simeona, ae o le a taulai pea la tatou vaai, ma mafaufau ia Ana, le tinā loto talitonu ma fa’atuatua i le Atua. O lona tupuaga e pei ona ta’u atu muamua o Asera. O Asera o lona uiga; “O le Amuia” (Kenese 30: 13). O le fa’amanuia a Mose i ituaiga e sefulu ma le lua o Isaraelu a o le’i oti, (Teuterenome 33: 24 – 25), e tulaga ese foi le fia fa’amanuia mo le ituaiga lea e tupuga mai ai Ana, o Asera. “E manuia o ia i ana fanau.” O Ana la e lavea i le fanau lea, o lo’o atagia mai ai le manuia faa-le-agaga, o le loto talitonu ma le tumau i le Alii. E manuia foi i tulaga faa-le-tino, auā o ana mea ai e tamaoaiga ma silisili. (Mealololo Kenese 49: 20). O ia na te avatu mea lelei ma le matagofie mo tupu. Le matagofie lea o alia’e mai lona soifua; O le loto talitonu ma le fa’atuatua ua ia avatu i le Atua, mo lona tupu o Iesu le fa’aola, lea lava ua vaai tino iai, ina ua aumai i le malumalu.

E le faigofie le soifuaga o lenei tinā, pe a fua i le olaga masani o aso uma. Ua leva ona leai se tane ua maliu, ma nofo toatasi mai ai lava. Ua matua ua valusefulu ma le fa tausaga o le soifua. A o lea lava e alu i le malumalu i aso uma e tatalo ma anapogi e pei ona taua. O lo’o iloa ai, o le tagata manuia, ae pogai mai le loto fa’atuatua moni i le Atua. Tagata sa matuā fa’atalitali ma le mautinoa i le Alii, e fa’afofoga ma silasila mai le Atua ia te ia (Salamo 40: 18)

O Ana, o le tasi o i latou, e na avea ma uluai molimau ia Iesu. o le aganu’u faa-Iutaia fo’i, e sili ona amanaia ma fa’atauaina tagata matutua. Ona o Ana la o le tagata matua, o ana Perofetaga, o aofia ai le tele o mea loloto ma taua.

Tupulaga o tama ma teine talavou, o le lolofi mai o suiga fou o nei aso, ua pei lava o le taifaana’e, ua lofia ai tupulaga. O le a’oa’oga taua o maua mai lenei tala, o le tutumau ma toaga i le Alii, e ala i le tatalo ma le anapogi, toaga i le lotu. O se fa’aa’oa’o aoga mo tupulaga, ae maise le au faatuatua i le Alii. O le Taulaga fa’aola na saunia e Iesu, o le

taulaga o le Alofa Tunoa, e matagofie mo tagata uma; e maua fua ai le fa'amanuiaga o le ola fa'avavau, pe a talitonu ma fa'atuatua ia te Ia.

GALUEGA FAATINO:

Taligā Fesili (fa'aaoga lau Tusi Paia)

1. E fia tausaga sa nofo fua ai Ana, talu ina maliu o lana tane?

Tali: E le o mafai ona iloa mai le tala.

2. O le a le matua o Iesu, ae vaai loa iai Ana?

Tali: 8 aso e tusa o le tulafono ona aumai ai lea mo le taulaga o le fa'apaiaina i le malumalu.

3. O Ana e nofo ai lava i le falesa pe leai?

Tali: E leai! a'e toaga tele i le malumalu mo ana anapogi ma tatalo.

4. O ai le togiola lea ma faatalitali iai Ana ma isi?

Tali: Mesia/Iesu

PESE: 219 “E manuia lava, o e talia lelei”

A'OA'OGA:

1. Fa'atalitali ma le loto fa'amaoni i le Atua.

2. E mafai mea uma i le fa'atuatua.

3. O le fa'aolataga moni, o Iesu.

.....

ASO SA: 13 ME 2018 (ASO SA O TINĀ)

MATAUPU: O LE SAO O TINĀ I LE TALALELEI

SINI: Ia a'oa'o tamaiti ia latou iloa lelei lava, O le mausali ma le atoatoa, o le sao i so o se

fa'amoemoe, e pogai mai le loto ua pulea e le Alii, ae le mai se isi lava malosi.

TUSI FAITAU: Galuega 16: 11 – 15

FESOASOANI MO FAIAOGA:

O le fa'alaniga masani o tinā o Samoa lava ia, "o le itupa vaivai", ai pe fa'apogai mai i le tala a le Tusi Paia, o le tinā, na faia e le Atua mai le ivi o Atamu le tamā. O le a le afaina lea, auā e tutusa tagata uma i le Atua. Ae o le sao o tinā i le sosaiete, e le fa'atauva'a, lea tinā – "O tinā e 'au la latou inailau;" "O tinā foi o le pae ma le auli." O lo'o ta'u mai lenei fuaitau, le sao taua o tinā i le sosaiete faapea fo'i le Talalelei, Aua e fa'amoemoe i lo latou malosi ma le fai mea mafai, le tino ma le taunu'u manuia o so o se fa'amoemoe. O latou e sologa lelei ai mea fai, ma toafilemu ai mea uma.

I le aganuu fa'a-Iutaia, e fa'anoanoa ma mafatia lagona i le tulaga o tinā, ona e le taua tele i la latou sosaiete. Fai mai e faitau fa'atasi le taua o tinā ma aseta. Peitai, e le avea le aganuu a Iutaia e pei foi o isi atunuu, ma ala e tineia ai, pe fa'aitiitia ai le sao taua o tinā i le lalolagi, aemaise le talalelei. O tinā lava uluai molimau i le toe soifua manumalo mai o Iesu Keriso. O latou o uluai ave feau o lea tala manaia, auā o le tala lava lea o le faaolataga, atoa ma le tele o isi molimau i sao taua o tinā i le Talalelei.

O lenei la Aso Sa, o le tala manaia i se tasi o tinā mai le nuu o Tuatira, o Litia lona igoa. O le salalau lemu atu o le Talalelei i Maketonia, o lo'o manino lelei mai ai foi le sao taua o lenei tinā o Litia. Aua o Filipi, o le uluai aai lea o Maketonia na agai Paulo e talai i ai le Talalelei, e pei na ia vaaia le fa'aaliga (Galuega 16: 9 – 10). E iai le mau e fa'apea, o lo'o vane po o tusia i nisi o pou tetele i fafo o le aai o Filipi ni fa'aaliga, e fa'asa ai le aumai i totonu o le atunuu, ni fa'atuatuga po o ni tapuaiga e le aloaia. Atonu o le ala foi lea o le fai i tua i le auvai o le vaitafe le mafutaga tatalo lenei a ē tapuai ona e le gata ina sa, ae atonu foi e lei i ai se maota tapuai aloaia i lena taimi. E foliga mai o le toatele o tagata o le potopotoga lenei, o tinā. O le tasi la o nei tinā, o Litia le igoa, lē o fai mai, "Ua tatalaina e le Alii lona loto ia naunau i upu na tautala ai Paulo" (f 14). Ona pulunaunau mai lea o ia, ina ia avea lona fale ma maota e

fai ai le tapuaiga, ina ua uma ona fa'amauina aloaia o ia ma lona auuaiga, i le aiga o le Alii e ala i le papatisoga.

E iai itu taua o iloa mai le galuega tala'i a Paulo iinei, o tinā na ia mua'i feiloa'i i ai, ma fa'amaopoopo ai le aiga o le Alii i lea vaega o Filipi. O lo'o iloa ai, e le gata ia Paulo le fa'avasega o ni ituuiga, (tane po o le fafine) po o le fai foi o ni tuaoi i tulaga tau le aganuu. O le Talalelei ia Paulo, e mo tagata uma, lanu ma so o se gagana. O le alia'e foi o tinā ma lo latou sao taua i le Ekalesia i Filipi, o se lesona taua foi lea mo i latou o manatu, (ae maise lava Iutaia) e leai se lotu pe a leai ni tamaloloa.

Tupulaga o tama ma teine, ae maise le itupa o tamaitai, e tutusa uma lava tatou i le Atua, o le mea taua, ia fa'aaogaina tataua le ola, e fai ai se sao mo le Talalelei a Keriso. Ae mafai sou sao mo le Talalelei, pe a talia ma moni le fa'atuatua i le Alii. E taua foi lo tatou talatalanoa lemu i o tatou tinā, aua o le Aso Sa lenei o fa'apitoa mo latou, ma fa'asino i ai le taua o le sao o Litia i le galuega a le Atua. Manaia ae faapea oe tinā, ma lo tatou aiga uma. O le maliu o le Alii o Iesu, e le o se fa'aolataga mo na o se vaega o tagata, ae mo tagata uma lava, o e fa'atuatua i lona suafa.

GALUEGA FAATINO:

Taliga Fesili (Fa'aaoga lau Tusi Paia)

1. O ai na fai ia Paulo e o i Maketonia?

Tali: O le Agaga o le Atua e ala i le fa'aaliga (f 9 – 10)

2. O ai tagata na faia le aulotu i le taimi na taunuu ai Paulo?

Tali: O tinā.

3. Sa iai so latou fale-tapua'i i le amataga pe leai?

Tali: E lei i ai se fale-tapua'i, sa fai lava tapua'iga i luga o le vaitafe.

4. A o fea la ua fai nei ma o latou falesa?

Tali: O le maota o Litia

5. O Litia e mauoloa pe leai?

Tali: E tele ana tupe, auā e taugata ie o ia fa'atauina.

PESE: 160

A'OA'OGA:

1. Ia avea oe tinā ma molimau o le Talalelei.
2. E tutusa tagata uma i le Alii.
3. Alofa i le Atua.

.....

MANATU TAIALA O IUNI: O NUU, MA AIGA MA LE SIOSIOMAGA O TOFI MAI LE ATUA (*Nation, Villages, Families and the environment are heritage from God*)

O malo, o nuu, o aiga ma le siosiomaga o mea ia ua ta'ua o tofi mai le Atua. O meaalofa ua foa'iina mai mo le tagata e atia'e, e fa'amamalu, e tausī, e leoleo ma puipui. O le fa'amoemoe o nei mea uma, o tagata ia tau fai maua uma le agaga e tasi, e galulue ai e fa'atumauiina le lelei o mea uma. Auā a lelei tagata e manuia foi le aga'i i luma o mea uma.

ASO SA: 04 IUNI 2018
(ASO FA'AMANATU TUTOATASI)

MATAUPU: FA'AMAMALU LE NU'U
(Honor the land)

SINI: Ia a'oa'o le vasega ina ia malamalama o le mea tatau mo tagata uma ona fa'amamalu le nu'u o le tofi mai le Atua. Ia atia'e i mea lelei, ma tausī i ai e fa'amanuia mai ai le Atua.

TUSI FAITAU: Iosua 6: 12 – 18

FESOASOANI MO FAIAOGA:

O lo'o fa'atauaina e le malo, pulega mamalu, maopoopo ma lelei, a tatou nuu taitasi. O se nuu e pulea lelei amio, ma tausa'afia ona tagata, ma va'aia ai ni atina'e lelei, ma ola fiafia ona tagata. O le nu'u foi lea ua latou fa'amamaluina lo latou tofi.

Ia usita'ia e tagata uma poloa'iga mo le fa'ato'ilaloina o Ieriko. A uma ona fa'ato'ilaloina Ieriko, fa'asaina ona avea e se tagata se mea totino e tasi mo ia lava. Auā o le 'ele'ele ma tagata ma mea uma o i ai i le aai, ua fa'atoina mo le Alii. Ua na o Raava ma lona aiga ma mea uma o i le fale e fa'asaoina, auā sa natia e ia e na a'uina atu. E o'o lava i ario uma ma auro ma ipu apa memea ma uamea e fa'asaina mo le Alii.

O le finagalo o le Atua, ia 'aua nei tosina loto i mea ia, auā o mea na maua mai i tagata agasala, ma mea mo latou tapua'iga fa'apaupau i o latou atua tupua. Ia 'ave esea tagata, ma soloi esea mea uma i le fogaeleele na faia ma atia'e e tagata fa'apaupau ma ola i le agasala, a ia fa'aavanoa le lau'ele'ele, e toe foafoa ai e le Atua se amataga fou i le nu'u folafolaina mo Isaraelu.

Ia fua tele ma matagofie, ma ia taunu'u ai ana folafolaga. O le nu'u folafolaina o le nu'u e tafe ai le suasusu ma le meli. Ioe, ia fa'amamalu le nu'u na foa'i mai e le Atua, e fai ma tatou tofi. O le Atua e mamalu e tatau foi ona fa'amamalu e le nuu. Ia pulea ma tausa'afia tagata uma. Ia fusia tagata uma i le alofa o le Atua. Ia usita'i ma fa'atino galuega lelei mo le manuia o tagata uma. Ia fiafia e tapua'i ma mafuta i le Atua tagata uma, ona tafe mai ai lea o fa'amanuiaga. O foliga va'aia lava lena o le fa'amamaluina e tagata o le nuu, o lo latou tofi mai le Atua. O le fa'amoemoe foi lea o le malo o Samoa, ua latou fa'ataua ai pulega mamalu a alii ma faipule o nu'u taitasi i pulega lelei ia ola manuia tagata uma.

O Iesu Keriso le Alo o le Atua, ua affio mai, e fa'aailoa ma a'oa'o mai amio tatou te ola ai, e mamalu ai pea le nu'u fa'avavau ua folafola mai e fai mo tatou tofi.

Uiga o Upu ma Fuaitau:

- i) Iupeli - 50 tausaga po o le amataga fou
- ii) mulia'u - taimuli
- iii) faatoina - fa'amalaiaina, fa'aumatiaina

GALUEGA FAATINO:

Ia fa'aailoa amio e fa'atinoina e fa'amamalu ai le nuu.

PESE: Lo ta nuu moni ta te fiafia

A'OA'OGA

- 1. Amio pulea tagata.
- 2. Ia fusia tagata i le alofa.
- 3. Ia atia'e galuega lelei mo le manuia o tagata.

.....

ASO SA: 10 IUNI 2018

MATAUPU: O TAGATA O LE AIGA O LE ATUA

SINI: Ia a'oa'o le vasega ina ia malamalama i ituaiga tagata o le aiga o le Atua.

TUSI FAITAU: Mataio 12: 45 – 50

FESOASOANI MO FAIAOGA:

O le mataupu leni e sefulu 12 o le tusi a Mataio, ua fa'atonu ai e Iesu tagata i mea e tusa ona fai i le sapatu. Ua fa'aailoa atu ma fa'atino e Iesu le amio ma fa'atinoga o galuega e tatau ona faia e tagata o le aiga o le Atua, e le gata i le Aso Sa ma aso uma. E tatau ona agalelei atu ma fa'atino le alofa i tagata ua puapuagatia ma mafatia i ma'i ma so o se mafatiaga ua tauau ina fa'aumatia ai le ola. E sili ona fiafia le Atua e silasila mai o lo o tatou faia galuega alofa e fa'asaoina ai le ola o le uso a tagata, na i lo tatou mamapo e tausi le Aso Sa, e pei o le fa'amuamua

a le ‘au tusiupu ma le au faresaio. Ua fa’amalolo e Iesu tagata mama’i, ma tutuli ese temoni ma agaga leaga mai tagata i le Aso Sa. Ua le fiafia ai le au tusiupu ma le au faresaio aua ua soli e Iesu le sapati. Ua fetalai Iesu, “E tatau ona agalelei i le sapati” O le vaega o le mataupu e 12: 46 – 50. Ua fai ma tatou mataupu i lenei Aso Sa, ua taunu’u atu le aiga o Iesu i le lalolagi, o lona tinā, ma ona uso ma tuafafine, e ave’ese mai o ia ma taofia lana galuega o lo o faia. O le fa’ailoa le a’oa’o ma fa’atino galuega e tatau ona faia e tagata o le aiga o le Atua.

O le manatu ma le finagalo o Iesu, ua tatau ona malamalama lelei lona aiga, o lona tina, ma ona uso ma tuafafine i lona fanau mai i totonu o lo latou aiga. E molimau foi lona soifua fa’atino ma amio fa’aalia i aso uma o lo latou nonofo ai, i le uiga moni o le finagalo o le Atua i lona afio mai i le lalolagi.

A o lea ua o’o ina amata lana galuega fa’aola mo le lalolagi, a ua fia foi i latou ma isi tagata e fa’alavelave ina le galuega fa’aola a le Atua mo le lalolagi. Ua logo atu e so’o o Iesu lona tina ma ona uso ma tuafafine ua taunu’u atu. A ua silafia lelei e Iesu le mafuaaga o lo latou o atu, e taofi ana a’oa’oga ma galuega o vavega o le Alofa Tunoa o le Atua o lo’o ia faia.

Ona tali mai ai lea o Iesu i ona so’o i le fesili; O ai lo’u tina ma o’u uso ma tuafafine? O lo’u tina, ma o’u uso ma tuafafine, aua o le faia le finagalo o lo’u Tama o i le lagi, o lo’u uso lea ma lo’u tuafafine ma lo’u tina. Ioe, e ese a le aiga fa’alelalolagi, e ‘ese foi le aiga fa’alelagi. O tagata o le aiga o le Atua, e amio i amio a Iesu. E loto alofa, e agamalu, e loto maualalo, e amio pulea ma amio tausa’afia. E toaga i le lotu. E fiafia e tatalo ma auai i mafutaga a le Ekalesia. E ola usiusita’i i matua ma ava ma fa’aaloalo i tagata matutua ma so o se tagata.

O le afio mai o Iesu mai le lagi, ina ia a’oa’o tagata uma i le fa’atinoga o le alofa o le Atua, ma amio mama, ma ia fiafia e fa’atino mea lelei uma, ina ia avea tagata uma ma tagata o le aiga o le Atua.

GALUEGA FAATINO:

Fesili i le vasega e fa’ailoa mai amio e tagata o le aiga o le Atua.

PESE: Pese ma Viiga 380

A’OA’OGA:

1. Ia naunau i le Alofa.
2. Ia ola usiusitai i matua.
3. Ia alolofa i e puapuagatia.

.....

ASO SA: 17 IUNI 2018

**MATAUPU: FILIFILI E AUAUNA I LE ATUA
(Choose to serve God)**

SINI: Ia a’oa’o le vasega ina ia malamalama e tataui i tagata uma ona filifili e auauna i le Atua, ona e maua ai manuia o le solo lelei i aso uma.

TUSI FAITAU: Iosua 24: 14 – 22 (mo le Faiaoga)
Iosua 24: 14 & 15 (mo le Vasega)

FESOASOANI MO FAIAOGA:

O lau filifiliga ma la’u filifiliga e fa’amoemoe i ai lo tatou ola manuia i aso uma ma le lumana’i. Ina ua toea’ina Iosua, ua lata mai foi lona taimi e tuua ai le lalolagi. Ua ia toe avatu ai le fa’amanatu lelei i lona nuu o Isaraelu.

Ua masani lelei Iosua ma amioga a lona nuu. O tagata e tosina gofie o latou loto i tu ma aga fa’apaupau a nuu o lo’o latou tuaoi. E fiafia e fa’atino tu’inauga o le agasala e pei ona faia e nuu tuaoi. O le naunau alofa o Iosua ia tumau pea ona manuia Isaraelu i manuia o le Atua, o lea ua ia tu’uina atu ai se lu’itau mo i latou. Ua ia tu’uina ai nei mo latou, ina ia fai i ai la latou filifiliga. Ia filifili i latou i le aso nei, po’o ai e auauna i ai? Pe afai foi e leaga ia te outou ona auauna i le Alii, ina filifili ia outou i le aso nei, po’o ai tou te auauna i ai, po’o atua na auauna i ai o outou tamā, o e sa i le la itu o le vaitafe, po o atua o sa Amōrī, e o latou le nuu ua outou nonofo ai, a o au nei ma lo’u aiga, matou te auauna i le Alii.

Ona tali mai ai lea o le nuu uma o Isaraelu, “Ia mamao lava ia te i matou ona matou tuua o le Alii, ina ia auauna i atua ‘ese, auā o le Alii lo tatou Atua, o Ia lava na aveina ae i tatou ma o tatou tamā, ai le nuu o Aikupito o le mea sa nofo pologa ai, o Ia foi na faia i o tatou luma o ia fa’ailoga tetele, ma ana leoleo mai ia te i tatou i le ala uma na tatou o mai ai, ma nuu uma na tatou ui mai ai.

O Iosua o se ta’ita’i e mata’u i le Atua. Ua ia iloa lelei lava e matuā manuia lava Isaraelu, pe afai e filifili e auauna ma le fa’amaoni i le Atua. E le gata e matua mamalu ai le nuu, ae liligi fa’aua mai ai e le Atua mo i latou fa’amanuiaga ma ola fiafia ai.

A o le aogā lea o le tatou mataupu i lenei Aso Sa. Ia tatou filifili i mea e manuia ai. Ia filifili faatasi ma le Agaga o le Atua, ona mautinoa lea o lo tatou lumanai manuia.

O Iesu Keriso na filifili i le faia o le finagalo o le Atua lona Tamā, ina ia fa’aolaina le lalolagi ia te Ia.

GALUEGA FAATINO:

Ia tuu le avanoa i tamaiti, e faamatala mai ai ni a latou filifiliga na manuia, ma filifiliga na i’u leaga.

PESE: Ia filifili ia Iesu.

A’OA’OGA:

1. Ia filifili mea e manuia ai.
2. Ia filifili fa’atasi ma le Agaga Paia.
3. Ia filifili e auauna fa’amaoni i le Atua.

.....

ASO SA: 24 IUNI 2018

**MATAUPU: IA ATIAE LE MALO O LE ATUA
(Develop God’s Kingdom)**

SINI: Ia a’oa’o le vasega ina ia malamalama ia atia’e le malo o le Atua, o le galuega lea a le Talalelei ia liliu mai tagata i le Atua.

TUSI FAITAU: Ioane 21: 15 – 23

FESOASOANI MO FAIAOGA:

Ia atia’e le malo o le Atua, o se uiga faigofie lea e fa’aupu ai fetalaiga a Iesu i lona so’o o Peteru, e pei o le vaega o le tusi faitau ua fai ma tatou mataupu i lenei Aso Sa. E fa’atolu ona fetalai Iesu ia Peteru. A o ia fetalaiga, o lo o fa’atonu ai e Iesu, Peteru i mea e lua e na te faia, e atia’e ai le malo o le Atua,

Muamua, ia fafaga i tamai mamoe. Ma lona lua, ia leoleo i mamoe.

O nei matafaioi e lua ua tu’u atu e Iesu ia Peteru, o lana galuega lea sa fai i taimi o lana galuega fa’aola. Sa ia fafaga i tagata i mea ai fa’aletino, a o mea ai o le fa’aleagaga. Na ia leoleo foi i tagata, i ana fa’amalologa i ma’i ogaoga ma tutuli temoni ma agaga leaga, ma ua Ia a’oa’o atu foi o le Malo o le Atua.

O le fetalai fa’atolu atu o Iesu ia Peteru, o se fa’amanatu lelei i lona fa’afitia o Iesu i le taimi o puapuaga. O se lu’itau foi mo Peteru ma ia ‘aua ne’i toe to’ilalo ma faia’ina i mea o le lalolagi nei, e le mafai ai ona atia’e le Malo o le Atua.

O le fafaga ma leoleo mamoe o le galuega lea le Talalelei ua tuuina atu i faifeau, a’oa’o fesoasoani, faiaoga Aso Sa ma tiakono. A o se galuega foi mo tatou le fanau, ina ia tatou leoleo ma fafaga i isi tamaiti o lo’o latou le iloa le tala ia Iesu ma lona fa’aolaina o le lalolagi.

Na maliu lava Iesu i le satauro ona o lana galuega o le fafaga ma leoleo tatou ina ia tatou ola ia te Ia. O lona toe soifua manumalo mai, ua fai ai i tatou ma tagata o le Malo o le Atua.

GALUEGA FAATINO:

Fa’atino le tala.

PESE: Pese ma Viiga 380

A’OA’OGA:

1. Ia fai tatou ma tagata e atia’e le Malo o le Atua.
2. Ia fafaga ou uso

.....

MANATU TAIALA O IULAI: E AFIO LE ATUA I MEA UMA

Na a’oa’oina mai lava i tatou, a o tatou laiti i a’oga a faifeau, i le mataupu silisili lenei, “E afio le Atua i mea uma na Ia faia. Ua matua fa’amamafaina e le manatu a’oa’o o lenei masina, lea lava mataupu silisili e afio le Atua i mea uma na Ia faia, e na te le tuulafoa’iina i lana foafoaga, aemaise lana tagata na Ia faia i lona faatusa.

ASO SA: 01 IULAI 2018

MATAUPU: O LE ATUA UA FETALAI

SINI: Ia a’oa’o le vasega ina ia malamalama, ua fetalai le Atua i se vaega o lona aiga paia i le lagi mo le faia o le tagata.

TUSI FAITAU: Kenese 1: 26 – 31

FESOASOANI MO FAIAOGA:

Ona fetalai ane lea o le Atua, “Ina tatou faia ia o le tagata i lo tatou fa’atusa, ia foliga ia i tatou. O le fa’ailoga lea, ua tatou iloa ai, o lo o i ai le aiga paia o le Atua, o lo o fa’atasi ma Ia i le lagi. E pei ona molimau mai foi le tusi a Iopu 38: 7, 1 Tupu 22: 19 ma le Ieremia 23: 18 – 23.

O le gagana o lo o aumai e le tusitala i le vaega o le tusi lenei, o lo o fa’ailoa mai ai le Agaga moni o le Atua mo le foafoaina o le tagata. Ina tatou faia ia le tagata i lo tatou fa’atusa. O le fa’ailoga o le taua tele i le Atua, o le faia o le tagata.

O le gagana foi, Ina tatou faia ia le tagata, o se feau fa'a-perofeta. O lea feau fa'a-perofeta, o le fa'amoemoe o le Atua mo le tagata, na Ia fetalai ai, "Ina tatou faia ia le tagata i lo tatou fa'atusa." O le fa'amoemoe o le Atua, ia fa'asoa atu lana pule i le tagata i nisi o mea o le foafoaga na Ia faia. E pei ona fetalai le Atua, ia pule foi latou i i'a o le sami, ma manu felelei ma manu vaefa, ma le laueleele uma, atoa ma mea fetolofi uma e fetolofi i le 'ele'ele. O le fa'amoemoe foi o le Atua mo lana tagata, ua la fai pa'aga ai, i lana foafoaga aoao. Ua ia tu'u ai le tagata i le fa'atoga i Etena e galue ai ma leoleo ai. O le sao lea o le tagata i le foafoaga. Ia galue ma leoleo ina ia fa'atumauina le matagofie o le foafoaga.

O le pule lea na aumai e le Atua i le tagata, lea na faoa e lei tiapolo, ina ua ia fa'asese ia Eva ma ua soli ai le poloa'iga e tasi lava, ia aua nei o la aai i le fua o le la'au e iloa ai le lelei ma le leaga. Ioe, le tatou vasega, o lo o fetalai mai pea le Atua i lona fa'amoemoe na Ia faia ai i tatou. O i tatou o aloalii ma perenise ma purinise o le Malo o le Atua. Ia tatou tauivi e fa'atoilalo le tiapolo, e ala i lo tatou tete'e malosi atu i mea leaga uma, o lo o fa'aosoosoina ai i tatou e le tiapolo. Aua ua fetalai le Atua i lona aiga paia ina ia o latou faia le tagata e foliga ia i latou, e pule i isi mea o le foafoaga, ma fai pa'aga ma Ia i le fa'aauauina o lana galuega foafoa.

A tu'u lava i se isi fa'a'upuga, o le finagalo lava o le Atua mo tatou ola uma, e aofia ma tatou mai lava i le amataga, o i tatou lava o aloalii, o perenise ma purinise o le malo o le Atua.

Tamaiti, e avea i tatou ma aloalii ma purinise o le malo o le Atua pe a tatou alolofa i le Atua ma isi tagata. Na Afio mai Iesu mai le lagi, o le Alo o le Atua, o Ia foi na fetalai i ai le Atua, "Ina tatou faia ia le tagata i lo tatou fa'atusa. O Ia o le Aloalii ma le perenise o le malo o le Atua, e fa'atino mai amio e faia e le aloalii ma le purinise o le lagi.

GALUEGA FAATINO:

Fa'amatala mai i au lava upu le fa'amoemoe o le Atua na Ia faia ai le tagata.

PESE: 8 (Pese ma Viiga)

A'OA'OGA:

1. Ia fai i tatou ma aloalii ma purinise e o le malo o le Atua.
2. O i tatou o pa'aga a le Atua mo lana foafoaga.

.....

ASO SA: 08 IULAI 2018

MATAUPU: UA SOLA ELIA I LE MAUGA O OREPA

SINI: Ia a'oa'o le vasega ina ia malamalama, e le mafai ona sola ese se tagata mai le silafaga a le Atua.

TUSI FAITAU: 1 Tupu 19: 9 – 18

FESOASOANI MO FAIAOGA:

O le vaega o le mataupu e 1 Tupu 19: 9 – 18 ua fai ma tatou mataupu o lenei Aso Sa, ua taunu'u le sola'aga a Elia i le mauga o Horepa, ona o lona fefe tele i le masiofo o Isapela ua fa'amata'u mai, na te fa'aumatia lona ola ae le i mavae le 24 itula.

Ua o'o Elia i le mauga o Horepa, ua ia maua le ana ona nofo ai lea o ia. Ua naunau Elia e taunu'u i le mauga o Horepa, ua ta'ua o le mauga o le Atua, na mua'i fa'aali ai lona mamalu ia Isaraelu (Esoto 19: 18 – 25), o le isi igoa o le magua o Sinai. O le mauga foi lenei na feiloa'i ai le Atua ma Mose (Esoto 33: 22). O le manatu o Elia, afai e taunu'u i le mauga o Horepa, ona fa'asaoina lea o lona ola mai ia Isapela, auā o le mauga ua tele mea ofoofogia ua tutupu ai. Peita'i, ua faate'ia Elia i le leo ua faapea mai, “Elia e, se a lau mea e fai iina?” Ua fai atu o ia, ua ou matua ma'elega au ona o le Alii le Atua o 'au, auā ua tu'ua e le fanauga a Isaraelu lau feagaiga, ua latou soloia i lalo ou fata faitaulaga, ua fasiotia foi e i latou au perofeta i le pelu ua toe na o a'u lava, ua latou fia fasioti foi ia te a'u.

Ua toe fa'alogo i le leo, ua fa'apea mai, Ina alu ia oe i fafo, ma e tu i le mauga i luma o le Alii. Ua afio ane le Alii, o le matagi tetele foi ma le malosi, ua lepetia ai mauga ma momomo ai papa i luma o le Alii, e le'i i ai le Alii i le matagi, o le mafuie e lei i ai le Alii i le mafuie, e mulimuli

i le afi o le leo filemu ma le itiiti. Ua fa’alogo ai Elia, ona ufiufi ai lea e ia o ona mata i lona ofu tele, ma alu i fafo ma tu i le gutu o le ana; faauta ua o’o mai ia te ia le leo ua fa’apea mai, Elia e, se a lau mea e fai iina? Ona toe tali foi lea o Elia i lana tali muamua. O le tali e pupuni ai lona sola ese, ae tu’u le galuega na valaa’uina ai o ia e le Atua, ona o lona fefe tele ia Isapela.

O le mea ua iloa e Elia, e le mafai ona sola ‘ese se isi i luma o le silafaga a le Atua. E tele foi mea faigata sa feagai ma Elia, ae na fa’asaoina lona ola, ma manumalo i fa’afitauli uma, ona o le Atua na i ai faatasi ma ia.

Ua sola ese mai ma Isapela ona o le pala’ai, ae le fa’alagolago i le Atua na faia vavega tetele i ona luma, o Ia lava na lavea’iina o ia mai le sauva o Isapela. O le manatu o Elia, o le a tau ai atu e le Atua se leaga ia Isapela. A e peita’i, o le fa’ailoga o le matagi tetele, o le mafuie ma le afi, e le o i ai le Atua, e le finagalo le Atua, e fa’ao’o se leaga ia Isapela. A o le leo filemu ma le itiiti o le Alii, o le auala lea e maua ai e Elia lona filemu mai lona ola atuavale. A o le auala foi lea ua fa’ailoa atu ia Elia e fofu ai le ma’ema’eā o Isapela, e pei ona fai mai le upu – O le tali filemu e liliu’eseina ai le ita.

Ua fa’afesaga’i Elia ma le Atua, ona lagona ai lea e Elia lona fa’atauva’a. Aua ua fai mai o ia ua totoe na o ia, ua latou fia fasioti foi ia te ia. Ua tali atu le Alii, e te fa’au’uina Elisaia le atalii o Safata o le Apelemeola, e sui a’i oe e fai ma perofeta, auā ua ou fa’atoe ia te au i Isaraelu, e toa fitu afe, o i latou uma o e ua le to’atutuli ia Pa’ala o i latou uma foi ua le sogi ia te ia.

Ua a’oa’o mai lenei tala ia Elia mo i tatou ina ia ‘aua nei tatou pala’a’ai i mea faigata o le ola nei. Tatou fa’amoemoe ma fa’atuatua i le Atua e maua lo tatou malosi e tauivi ai ma mea faigata uma. O Iesu le fa’ata’ita’iga moni mo i tatou. O a puapuaga ma tigā na la fa’afesaga’i, ae na tauivi pea se’ia o’o i le oti. O lona taunu’uga, o le toe soifua manumalo ma ua pule i mea uma lava i le lagi ma le lalolagi uma.

Uiga o Upu

i) maelega - sogasoga, fa’amaoni

GALUEGA FAATINO:

Fesili ma Tali

1. Aisea na sola ai Elia i le mauga o Horepa?

Tali: Ua fefe ia Iesepela

2. O a mea na muamua iloa e Elia, a e lei afio ifo le Alii?

Tali: O le matagi tetele ma le malosi, o le mafuie ma le afi.

3. E to'a fia tagata Isaraelu o totoe e le'i to'atutuli ia Paala.

Tali: E toa fitu afe.

PESE: Sola ese, sola ese, sola ese, mai ia Satani

A'OA'OGA:

1. Ia loto tele ma faatuatua i le Atua

2. O le tali filemu, e liliu'ese ai le ita

3. E lavea'i e le Atua i tatou mai pule saua a isi tagata.

.....

ASO SA: 15 IULAI 2018

MATAUPU: UA VALA'AUINA NATANIELU E IESU.

SINI: Ia a'oa'o le vasega ina ia malamalama ua vala'auina Natanielu e Iesu e fai ma ona so'o.

TUSI FAITAU: Ioane 1: 45 – 51

FESOASOANI MO FAIAOGA:

E `ese'ese lava auala o lo tatou vala'auina. O le tele o vala'auina e tu'u sa'o mai lava i lē e ana le vala'au. A o le tele foi o isi vala'auina, e mafua mai i tala'iga a isi tagata.

O le vala'auina o Natanielu e fai ma so'o o Iesu, na mafua mai i le

tala'iga a Filipino le tasi so'o. Ua maua e Filipino lana uo o Natanielu, ma fai atu ia te ia, "ua matou maua o Ia lē ua tusia e Mose i le tulafono, atoa ma le 'au perofeta, o Iesu lea, o le atalii o Iosefa, o le Nasareta." Ua fai mai Natanielu, "E mafai ea ona tupu se mea lelei mai Nasareta?" Ua tauanau pea e Filipino ia Natanielu, i lona vala'auina, "Ina sau ia, ina matamata."

Ua te'i Natanielu i le fa'afeiloa'i mai o ia e Iesu, "Fa'auta o oe o le Isaraelu moni, e leai sona pepelo." Ua fia mautinoa atili e Natanielu, pe fa'apefea ona silafia e Iesu o ia o le Isaraelu moni. Ua fesili ai, "Na e silafia au i fea? Ua fetalai atu Iesu, "Na ou iloa, na ou iloa oe i lalo o le mati, a o le'i vala'au atu Filipino ia te oe. Ai o lalo o le mati sa malolo ai Natanielu i le taimi na feiloa'i ai ma Filipino.

O le fetalaiaga lea a Iesu, na fa'ateia ai Natanielu ma ofo tele ai, ma lagona ai i lona loto fuatia ifo, e moni lava le molimau a Filipino, ua latou maua lē ua tusia e Mose i le tulafono, atoa ma le 'au perofeta. O le fetalaiaga a Iesu ia Natanielu, "Na ou iloa oe i lalo o le Mati, a o lei vala'au atu Filipino ia te oe. Ua lava ma totoe mo Natanielu le fa'amaoniga o Iesu o le Alo o le Atua, sa valoia mai. Ua iloa foi e Natanielu, o lo o ia Iesu le silafia ma le poto na te silafia ai mea uma, e pei ona silafia ai foi e le Atua soifua. Aua o le Atua e afio i mea uma o le foafoaga.

O le mea lea ua talia ai e Natanielu lona vala'auina e fai ma so'o o Iesu, i lona tali atu, "Rapi e, o oe lava o le Alo o le Atua, o oe lava o le tupu o Isaraelu. E fa'apena foi tatou le fanau, e tatau ona tatou matua talitonu o Iesu o lo tatou Fa'aola. O Ia lava na te fa'aola mai ia i tatou. Ia tatou usiusita'i i ana poloaiga ma tatou ola ai i aso uma, ina ia ta'ua tatou o so'o o Iesu ma ana uo i tatou. E tatou te va'aia foi mea silisili ma le ofofofia i o tatou olaga pe a tatou filifili e aveia Iesu ma ou Alii, ma aveia ma ona so'o.

GALUEGA FAATINO:

Fa'atino le tala.

PESE: Ua ou filifili e mulimuli ia Iesu.

A'OA'OGA:

1. Ia e filifili e fai ma so’o o Iesu.
2. ‘Aua le masalosalo o Iesu le Fa’aola.
3. Ia aoga lo tatou ola mo le galuega fa’aola.

ASO SA:
22 IULAI 2018

MATAUPU: **O LE MA’I O ESEKIA**
(Hezekiah’s illness)

SINI: Ia a’oa’o le vasega ina ia malamalama, na ma’i le tupu o Esekia, o le a oti ai, ae na toe fa’aola e le Atua, ma toe fa’aopoopo i ai isi tausaga e 15 e ola ai.

TUSI FAITAU: Isaia 38: 1 – 8

FESOASOANI MO FAIAOGA:

O le vaega o le mata’upu 38 ua fai ma tatou mata’upu i lenei Aso Sa, o le ma’i o le tupu o Esekia ma lona toe fa’aolaina e le Atua mai i lona ma’i. E maua Esekia i le ma’i, ae le’i osofa’ia Ierusalem e le tupu o Asuria e pei ona fa’amatalaina i le mata’upu e 36 ma le 37. Ua mulimuli le fa’amatalaina e Isaia o le ma’i ma le fa’amalologa o le tupu o Esekia, ina ia sosolo lelei mea na tutupu i le mata’upu 39, ma fai ma tomuaga o mea e tutupu e pei ona fa’amauiina i mataupu e 40 – 66.

Ua ma’i le tupu o Esekia, ua latalata ona oti. Ua o’o mai le perofeta o Isaia ua logo mai ia Esekia le fe’au mai le Atua, “Sauni sana mavaega i lona aiga, auā o le a maliu o ia i lona ma’i, e le toe ola. Ona liliu atu ai lea o Esekia ona fofoga i le pa o le fale, ua tatalo atu o ia i le Alii, ua fa’apea atu, Le Alii e, ou te aioi atu, ia e manatu mai i lo’u savali i ou luma ma le fa’amaoni, ma le loto atoa, ua ou faia foi mea ua e finagalo i ai. Ona tagi lotulotu ai lea o Esekia.

Ua fa’afogaina e le Atua le tatalo ma le tagi lotulotu a le tupu o Esekia, ona mutimutivale ai lea o lona alofa. Ua fetalai foi le Atua ia Isaia, alu ia, ina e fai atu ia Esekia, o lo o faapea ona fai mai le Alii le

Atua o Tavita lou tamā, Ua ou fa’alogo i lau tatalo, ua ou iloa ou loimata; fa’auta foi, ou te fa’aopoopo i aso o lou ola o tausaga e sefulu ma le lima, ou te lavea’i foi ia te oe ma le aai nei ai le lima o le tupu o Asuria. Ua tu’uina atu foi e le Atua le fa’ailoga, e fa’amaonia lona amiotonu i ana folafolaga ua fetalai mai ai.

Ioe, e moni lava, o le Atua o le Alofa lava Ia. E tele pea lona alofa mo i tatou. O Esekia o le tupu e mata’u ma fa’atuatua i le Atua. Ua ia faia le amiotonu i luma o le Alii. Ua ia ave’eseina mea maualuluga, ua ia tu’ipalaina foi tupua, ua na vavae i lalo foi tupua o Asaira (2 Tupu 18). Ua tu’inini’iina le gata ‘apa memea na faia e Mose, ua ifo i ai tagata.

O galuega ia a le tupu o Esekia ua ia tatalo ai i le Atua ia manatu i lona savali i ona luma ma le fa’amaoni ma le loto atoa, ua ia faia foi mea ua finagalo ai le Alii.

Ua iloa lelei e Esekia, o le Atua o le alofa lava ia. E na te le manatua ni a tatou amio leaga, ae manatu mai ia i tatou i le tele o lona alofa. O Esekia e le o se tupu na atoatoa sona lelei i luma o le Atua. Peita’i, e le i ifo ia i se tupua e pei o isi tupu o Isaraelu.

Ua tatou iloa ma le mautinoa nei, o lo tatou ola e pulea lava e le Atua, aua o Ia lava na manava ina mai le ola ua tatou ola ai lava.

O le fa’afualoa mai le Atua lea. O ma’i ma mea faigata o lo tatou ola o feagai ai, ua na o le Atua e maua ai lo tatou malologa lelei. O Iesu Keriso i lona afio mai i le lalolagi, ua tatou mautinoa ai le leai o se mea e faigata i le Atua. Pau lava le mea o le talitonu ma fa’atuatua i le Atua. O le fa’atuatua e tupu lou fiafia e tatalo. O le tatalo foi e mafanafana ai foi le mafutaga ma le Atua le Tamā, Iesu Keriso le Alo pele ma le Agaga Paia.

GALUEGA FAATINO

Fa’atino le tala.

PESE: Pese ma Viiga 5

A’OA’OGA:

1. Ia tatalo ma le fa’atuatua.
2. O le Atua lo tatou malologa lelei.

3. Ia fa’ailoa i le Atua ou mana’oga.

.....

ASO SA: 29 IULAI 2018

MATAUPU: E LE LILO SE TAGATA I LE SILAFAGA A LE ATUA.

SINI: Ia a’oa’o le vasega ia malamalama e leai lava se tagata e mafai ona lafi ma sola ese mai le Atua.

TUSI FAITAU: Salamo 139: 1 – 12

FESOASOANI MO FAIAOGA:

O le Salamo lenei ua fai ma tatou mata’upu i lenei Aso Sa sona vaega e fa’apea o le Salamo ua fa’ailoa mai ai e Tavita le tulaga ese ma le maualuga ma le ofoofogia o le Atua.

O lo’o aumai ai ni upu se tolu, e silafia e le Atua mea uma i lona potu (Omniscience), e afio le Atua i mea uma i le lagi i luga ma le lalolagi i lalo nei (Omnipresence) o lona malosi ma lona mana e leai se mea gata mai ai (Omnipotence).

O le mafanafana o le mafutaga a Tavita ma le Atua, ua ia matuā iloa lelei le natura lea o le Atua. O ana gaoiga uma foi, e leai se mea lilo i lana silafaga, e o’o i ona manatunatuga lilo i totonu i lona loto e silafia uma e le Atua.

E tele mea leaga na fa’alilolilo ona fa’atino e Tavita peita’i, na silafia uma ia mea e le Atua, ma Ia fa’asala mai ia te ia. O le mea lea ua manatu ai Tavita, e le mafai lava e se tagata ona sola ‘ese mai fofoga paia o le Atua. Ua ia fatu ai nei fa’aupuga e fa’ailoa atu i tagata uma, o le Atua e afio i mea uma (Omnipresence), e silafia e le Atua mea uma i lona potu (Omniscience), o lona malosi ma lona mana e leai se mea e gata ai (Omnipotence). Ua alaga ai le fai-Salamo i ana fesili. Afai ou te alu a’e i le lagi, o i ai lava oe, afai ou te fofola so’u moega i seoli, fa’auta, o i ai lava oe.

Ioe, o le talitonuga ma le mautinoa i le fa'atuatua o le fai-Salamo, o le Atua pule aoao, o le mata'isau o mea uma o le foafoaga na ia faia i lona potu ma lona atamai. O Lē afio i ana mea uma na fai. O lona malosi ma lona mana e leai sona gata'aga. Ia tatou ola ma le iloa, o a lava mea tatou faia, e silafia uma e le Atua ia mea. O mea uma foi ua tatou faia ma manatunatuga o tatou loto, e fa'amasinoina ai i tatou uma. Ia toa'aga e faitau le Tusi Paia, auā e fa'atonu mai i tatou i mea e tusa ona tatou faia.

GALUEGA FAATINO:

Ia a'oa'o tauloto le fuaiupu muamua e o'o i le fuaiupu e tolu.

PESE: Pese ma Viiga 8

A'OA'OGA:

1. E afio le Atua i mea uma.
2. E silafia e le Atua mea uma.
3. O le malosi ma le mana o le Atua e leai se mea e gata ai.

.....

MANATU TAIALA AOKUSO: O LE ATUA MA ANA TOFIGA I TAMĀ

O le manatu aoao o lenei masina, ua fa'atau ai tofiga a le Atua i tamā, e auala mai ai lona finagalo alofa i ona tagata lautele. O lo'o matilatila ai i nei tofiga o tamā, lo latou tulaga fa'ata'ita'i, fa'atasi ai ma lo latou tulaga auauna a le Atua. E fai ma fa'ata'ita'iga i tagata, so o se fa'atinoga latou te faia.

ASO SA: 05 AOKUSO 2018

MATAUPU: UA FA'AU'UINA TAVITA E FAI MA TUPU

SINI: Ia a'oa'o le vasega ina ia malamalama, o le avea o Tavita ma tupu o Isaraelu o le tofiga mai le Atua, e ta'ita'i le nu'u e sui ai Saulo le tupu muamua.

TUSI FAITAU: 1 Samuelu 16: 1 – 13

FESOASOANI MO FAIAOGA:

Ina ua fetalai le Atua ia Samuelu e tula'i ma alu e fa'au'u se tasi o le fanau a Iese le Petele'ema e fai mai o tupu o Isara'elu e sui ai Saulo. Aua ua silafia e le Alii le Atua i atalii o Iese le tasi e na te fai ma tupu. Na fefe Samuelu e alu, ne'i iloa e Saulo, ona fasioti lea o ia. Ona fetalai mai lea o le Atua ia Samuelu, ia e faia le auala fa'alilolilo le mea leni. Ia e avatu se tama'i povi, ma fai ane, ua ou sau e fai le taulaga i le Alii. E te fai foi ia Iese e alu ane i le taulaga, ao a'u le Alii le Atua, ou te fa'ailoa ia te oe le mea e te faia, ona e fa'au'u lea i le ou te fai atu ia te oe.

Ona faia lea e Samuelu le mea na fetalai mai ai le Alii. Ua feiloa'i Samuelu ma toea'i'ina o Petele'ema, ona fefefe ai lea o i latou, ma latou fesili i ai i lona alu atu, pe o le filemu o alu atu ma ia? Ona tali lea o Samuelu, ua alu atu o ia ma le filemu e fai ai taulaga i le Alii. O le mea e le'i iloa e toea'iina, o le taulaga ua faia i le Alii, o le fa'au'uga lea o Tavita e fai ma tupu o Isaraelu, auā e leai se tala a Samuelu e fa'ataatai i le uiga o le taulaga ua faia.

O le manatu o toea'iina, o le fa'au'uina o Tavita, mo le fa'amoemoe o le Atua, mo se galuega fa'apitoa. Auā o le tasi lea o uiga o le fa'au'uina o se tagata e le Atua na te tofofi mo se galuega fa'apitoa. Pau lava le tagata, o lo o malamalama lelei i le fa'au'uina o Tavita, o Samuelu. Ua faia e le Atua leni auala fa'alilolilo mo le saogalemu o le ola o Tavita aemaise foi Samuelu le ositaulaga.

Na amata mai lava i lea taimi, le i ai i luga o Tavita, le Agaga fa'au'uina o le Atua ia Tavita. E fa'amaonia lea i le manuia o mea uma na faia e Tavita, ua atagia ai le i ai ia te ia o le poto ma le agava'a na te ta'ita'iina ai ona tagata i le manuia.

Ioe, afai e tofofi mai i tatou e le Atua ma ia foa'i mai taleni mo le manuia o lou aiga, o lou nu'u, le atunu'u aemaise le Ekalesia, ia tatou faia ma le fa'amaoni. Auā o lo o i ai fa'atasi ma le Atua, e ala i lona Agaga fa'au'uina e fesoasoani mai, ina ia manuia ai isi tagata i le tofiga ua foa'i mo i tatou.

O Iesu i lona vala'auina e fai ma Fa'aola o le lalolagi, sa i ona luga le Agaga fa'au'uina o le Atua, ma na ia usita'i i ai, ma fa'amaoni i lona vala'auina. Ua tatou 'ae'ae ai nei i manuia o le ola nei, ma tatou saofagā atu ai i lona malo fa'avavau.

GALUEGA FAATINO:

Fesili ma Tali

1. Aisea ua fa'au'uina ai Tavita e fai ma tupu?

Tali: Ua lafoa'i e le Atua ia Saulo, ina ia le fai ma tupu o Isaraelu.

2. E to'afia atalii o Iese?

Tali: E to'avalu

3. E lona fia Tavita i le fanau tama a Iese?

Tali: E lona valu

4. O le a le auala fa'aliloilo na faia e Samuelu e fa'au'uina ai Tavita ma tupu?

Tali: Ua ave le tama'i povi, ma vala'aulia Iese ma toea'iina e o ifo i le taulaga mo le Alii.

5. O le a le 'ese'esega o le va'ai a le tagata ma le silasila a le Atua?

Tali: E va'ai tagata i le tino, ae o le Atua e silasila i le loto.

PESE: 180 (Pese ma Viiga)

A'OA'OGA:

1. Ia fa'amaoni i lou vala'auina

2. Ia maua le loto tele e fa'atino ai le vala'auina

3. Ia fa'alagolago i le Atua i mea uma.

.....

ASO SA: 12 AOKUSO 2018

MATAUPU: E TOTOFI E LE ATUA TAMA E FAI MA FAIFAIVA I TAGATA (*God called fathers a fishers of men*)

SINI: Ia a'oa'o le vasega ina ia malamalama e totofi e le Atua tama e fai ma fai faiva i tagata, ia maua e i latou le onosa'i, sogasogā, le loto tele ma le fa'apalepale, ina ia maua agaga o tagata mo le malo o le Atua.

TUSI FAITAU: Mataio 4: 18 – 22

FESOASOANI MO FAIAOGA:

O le vala'auina e Iesu Simona Peteru ma Anetere'a lona uso, o Iakopo ma lona uso o Ioane, o le fanau a Sepetaio, ia tu'ua e i latou lo latou faiva, ia mulimuli atu ia te ia, na te faia i latou ma fai faiva i tagata.

O le filifilia e Iesu o nei taulele'a, e le o ni tagata popoto ma le lauiloa foi, a o fai faiva, e fagogota i aso uma e saili i'a e fafaga ai o latou aiga ma fa'atau atu e maua ai tupe e atia'e fuafuaga fai i aso fai so'o. O tagata fai faiva e i ai le onosa'i. O le onosa'i e fa'atalitali ai pea se'ia aina lana maunu e i'a, ma maua mai mo lona fa'amoemoe na mafua ai ona fagota. O le so'o moni o Iesu e onosa'i ia maua agaga mo le Atua.

O le tagata fai faiva e i ai le sogasogā, e le fiu gofie, ae taumafai pea ia manuia lona faiva. E fa'apena foi le galuega tala'i, o le tagata fai faiva e i ai le loto tele, pe matagi ma louloua le tau, e tauivi pea e fa'aauau lona faiva aua o lo o fa'alagolago ia te ia lona aiga.

O le so'o moni o Keriso o le tagata ua sauni e fetaia'i ma puapuaga. O le so'o ma le tagata tala'i moni o le Talalelei, na te iloa lelei le lamatia o le ola i le ta'u atu o le amiotonu a le Atua i tagata. O le tagata fai faiva foi, e na te iloa lelei le taimi sa'o e alu ai lona faiva, ma le ogasami e

tatau ona fagota ai. E tatau foi ona tosina mai ma fiafia i'a i ana maunu ma fiafia e aai, ia ma maua i'a o lona faiva. O mafua'aga ia na filifilia ai e Iesu nei taulele'a e mulimuli atu ia te Ia, ina ia fa'aaoga o latou ola e fa'asaoina mai ai agaga o tagata uma ina ia i ai i totonu o le Malo o le Atua.

Ioe, o le tofofi mai lava lea e le Atua o i latou e fai ma fai faiva i tagata. Ia fa'aaoga nei lou ola ina ia fa'aolaina ai se tagata ua goto uga atu i le agasala.

GALUEGA FAATINO:

Fa'atino le tala.

PESE: Ua ou filifili ou te mulimuli ia Iesu

A'OA'OGA:

1. Ia fai i tatou ma fai faiva i tagata.
2. Ia folafola atu ma le loto tele
3. Ia fa'aaoga lelei taleni ua foa'i mai mo tatou.

.....

ASO SA: 19 AOKUSO 2018

MATAUPU: **UA FA'AMANATU E LE ATUA IA ESEKIELU LONA TOFIGA** (*Renewal of Ezekiel's call as watchman*)

SINI: Ia a'oa'o le vasega ina ia malamalama e fa'amanatu mai lava e le Atua ana tofiga ua ia tofofi ai i tatou.

TUSI FAITAU: Esekielu 33: 7 – 11

FESOASOANI MO FAIAOGA:

O le mata'upu lenei ua toe fa'atualga ai se itulagi fou e aga'i i ai le galuega a le perofeta o Esekielu o se tagata va'ai. I le mataupu 1 – 24, sa folafola ma valo'ia e Esekielu le fa'amasinoga a le Atua ia sa Iutā ma ona nu'u tua'oi, ona o lo latou ola agasala.

Ina ua taunu'u le fa'atafunaina o Ierusalemā, na susu'e ai e Esekielu se itulau fou o lana galuega fa'atagata va'ai, mai le folafolaina o le malaia ma puapuaga e feagai ma tagata ona o le agasala, i valo'aga ma perofetaga i le o'o mai o le fa'amoemoe o le Atua mo ona tagata. I taimi muamua o le galuega fa'atagata va'ai a Esekielu, na fa'atunuina ai e le Atua, ia folafola i tagata lapata'iga i malaia ma puapuaga e o'o mai ona o le ola i le agasala.

O le vaega o le mata'upu e 33 ua fai ma mata'upu i lenei Aso Sa ua fa'atunuina Esekielu e folafola le feau o le fa'amoemoe o le Atua mo tagata uma. Ua toe tofofi ai e le Atua Esekielu i le galuega o le tagata va'ai mo le fa'amoemoe ia fa'afo'isia mai i latou, o lo o tumau pea le fa'atuatua ma talitonu i le Atua, ma i latou o agasala pea, e i ai le fa'amoemoe mo i latou, pe afai e salamō ma gaua'i mai i le Atua.

Ia e matua folafola atu i tagata uma, e oti lava latou tagata amio leaga pe afai latou te le liliu mai i le Alii. Afai ua e le folafola atu upu mai ia te a'u mo latou, ua le mafai ai ona liliu mai, e oti lava i latou i lo latou amio leaga. A o lo latou toto e i luga o lou ulu, ou te tau i atu lea ia te oe.

Ia fa'amaoni ona folafola atu le fe'au o le fa'amoemoe o le Atua mo tagata uma, ina ia fa'asaoina o latou agaga. Afai e o'o atu le galuega folafola a le Atua ae tumau pea le tete'e ma lē gaua'i mai, ona fa'aumatia lea o i latou, ae fa'asaoina lou agaga. Ua fetalai le Atua ia Esekielu, 'Ia ta'u atu i tagata uma, o lo o fetalai mai le Alii le Atua, ou te ola A'u, ou te le fiafia lava i le oti o lē amio leaga, a ia liliu mai le amio leaga ai lona ala ma ola ai'.

Ioe, o le fa'amanatu lea a le Atua ia Esekielu e tusa ma lona tofiga o le tagata va'ai. O le finagalo tutasi o le Atua, ia 'aia nei fano se tagata na Ia faia i lona fa'atusa, a ia ola ma maua le olioli fa'atasi ma Ia e fa'avavau.

GALUEGA FAATINO:

Fesili ma Tali

1. O le a le ta'u o lo o fa'a'upuina ai le galuega a Esekielu?

Tali: Tagata va'ai

2. O le a le mea e o'o ia Esekielu pe afai e le fa'amaoni i lana galuega?

Tali: E tauia e le Atua.

3. O le a le fa'amoemoe o le Atua mo ona tagata uma?

Tali: Ia ola tagata uma.

4. O le a le ta'u a le Atua o lo o fa'a'upu ai Esekielu?

Tali: Atalii o le tagata.

5. O ai le tagata o le Feagaiga Fou o lo o fa'alagi i le fa'aupuga lea o le Atalii o le tagata?

Tali: O Iesu.

PESE: 122 (Pese ma Viiga)

A'OA'OGA:

1. Ia fa'amaoni i tofiga ua aumai.

2. Tu'u le agasala e oti ai.

3. Ia salamō ma foi i le Atua e ola ai.

.....

ASO SA: 26 AOKUSO 2018

MATAUPU: UA TOFIA SAULO E FAI MA APOSETOLO O NU'U ESE.

SINI: Ia a'oa'o le vasega ina ia malamalama, o le tofiga o Saulo e fai ma aposetolo o nu'u ese, o le tofiga ua tu'u sa'o mai lava i luga i le lagi, ia Iesu Keriso, le Ao o le Ekalesia.

TUSI FAITAU: Galuega 9: 3 – 16 (mo le Faiaoga)
Galuega 9: 10 – 16 (mo le Vasega)

FESOASOANI MO FAIAOGA:

O lo o amata la tatou mata'upu lenei i le malaga a Saulo ma lana vaega, e o i Tamaseko, e tapu'e mai ma saisai tagata o lo o tala'i ma ua talitonu ia Iesu Keriso, le Alii o le Toetu. Peita'i, ua latalata i Tamaseko, ae fa'afuase'i ona fetai'a'i ma Iesu Keriso, e ala i le pupula fa'atali'oli'o mai o le malamalama mai le lagi. Ona pa'u ai lea o ia i lalo i le 'ele'ele, ua fa'alogo atu i le si'ufofoga, o lo o fa'apea mai ia te ia, Saulo, Saulo e, se a le mea ua e sau mai ai ia te a'u? Ua fesili atu Saulo, Le Alii e, o ai ea oe? Ua fetalai le Alii, o a'u o Iesu ua e sau mai i ai, o le mea faigata ia te oe ona a'a i tui. Ua gatete Saulo ma ua mata'u, ua fa'apea atu, "Le Alii e, se a le mea e te finagalo ai ou te faia?"

O le fesili lea a Saulo i le Alii o Iesu, se a le mea e te finagalo ai ou te faia? Ua manino mai ai le matuā lafoa'i e Saulo o lana misiona e tapu'e ma saisai le auuso Kerisiano i Tamaseko ma ave i Ierusalem, a ua fia fai ma so'o o Iesu. Ioe, o le fa'ao'o sala i le au Kerisiano, ua fai nei ma so'o moni ma Kerisiano auuliuli i se taimi fa'afuase'i. Ua fa'atonu e alu i le aai e faatali ai le mea e tusa ona fai.

Ua iloa e Anania le fa'aaliga, ina ia alu i le ala e igoa o Sa'o, e saili le tagata e igoa ia Saulo, o le Taso, o lo o tatalo. Ua na iloa atu foi Anania i le fa'aaliga ua ulufale atu ma fa'ae'e ona lima i ona luga, ina ia toe va'ai. Ua fai atu foi Anania ia Iesu, "Le Alii e, ua ou fa'alogo i tagata e to'atele, i lenā tagata i mea e tele na ia faia i ou tagata paia i Ierusalem".

A ua fetalai atu le Alii o Iesu, "Ina alu ia, aua o le ipu lava o ia ua filifilia mo'u e momoli lo'u igoa i luma o nuu 'ese, ma tupu ma le fanauga a Isaraelu. Na amata mai i lea itu aso ona ta'ua Saulo, o le Aposetolo o nu'u 'ese. O le manatu o Saulo, o Iesu Keriso ma ona so'o ma i latou ua talitonu ma mulimuli ia te ia, o le tete'e lea i le Atua o Isaraelu ma ana tulafono. O lea ua ia matua mautinoa, o Iesu Keriso o le Alo o le Atua, na fa'asatauroina ma tanumia i le tu'ugamau. Ua toetu manumalo mai, ma ua ia aumaia ai le ola fou atali. Ua ia lafoa'i ai mea leaga uma o lona olaga tuai. Ua ia u'umauina ma auauna fa'amaoni i

aso uma o totoe i lona tofiga o le Aposetolo o nu'u 'ese mai lona Alii o Iesu Toetu. Fai mai a Saulo, e le o toe ola a'u, a o Keriso o lo o ola i totonu ia te a'u. Ia tatou fa'ata'ita'i i suiga fou ua suia ai le olaga o Saulo.

GALUEGA FAATINO:

Faatino le tala.

PESE: 380 (Pese ma Viiga)

A'OA'OGA:

1. Ia fai ma so'o o Iesu
2. 'Aua le fa'asauā i so o se tagata.
3. Ia to'aga e tatalo ia Iesu.

.....

MANATU TAIALA SETEMA: "FOLAFOLA LE TALALELEI I UN'U UMA"

O le folafolaina o le Talalelei, o le galuega mo so o se Kerisiano i so o se vaipanoa o le lalolagi. O le poloa'iga a Iesu mo tatou uma ina ia fa'ailoa ma tala'i atu lana Talalelei, ina ia so'o ai le lalolagi uma. O le fa'amanatu foi lea mo i tatou uma ina ia fai lo tatou tiute o le fa'ailoa atu o Iesu i a tatou uo, aiga ma so o se tagata o lo o nofo pea i le pogisa. O lo tatou vala'auina foi lena, ina ia fai i tatou ma ave feau a Keriso e tala'i atu lona finagalo i le lalolagi uma.

ASO SA: 2 SETEMA 2018

MATAUPU: IA FAI UN'U UMA LAVA MA SO'O.

SINI: Ia a'oa'o tamaiti ina ia latou iloa le taua o le poloa'iga sili, po'o le fa'atonuga tu'u sa'o a Iesu i ona so'o, ina ia o atu ma fai nu'u uma lava ma

so'o. O le fa'atonuga e mo tagata uma e aofia ai foi ma tamaiti. O le fa'atonuga ina ia fa'ailoa atu ma tala'i atu le Talalelei i tagata uma e aofia ai nu'u ma atunu'u uma o le lalolagi.

TUSI FAITAU: Mataio 28: 16-20

FESOASOANI MO FAIAOGA:

O le poloa'iga sili po'o le fa'atonuga tu'u sa'o a Iesu i ona so'o ina ia o atu e fai un'u uma lava ma so'o, o lo o fa'avae mai i luga o mafaufauga o le tusi o Tanielu 7:14, o lo'o fa'apea mai ua foa'iina atu ia te ia (Le Atalii), le pule mai Lē ua mai anamua ona aso (Le Atua), ma o tagata uma foi latou te ifo ma vivii ia te ia, o lona malo foi, e leai sona gata'aga. O le poloa'iga sili o lo o tulimata'i ai le fa'ataunu'uina o le fa'aaliga na iloa e Tanielu i lana miti i le taimi talafeagai ma le finagalo paia o le Atua (in God's own timing). O Iesu e pule i mea uma i le lagi ma le lalolagi atoa ma le Ekalesia aua o mea uma ia na ia faia (Kol. 1:15-18). O ia o le fa'atusa o le Atua e lē va'aia, o le ulumatua o mea uma ua faia. Po'o le a lava le ituaiga va'ai tatou te va'ai ai ia Iesu, o le mea ua mautinoa, o ia ua i ai le pule sili i le lalolagi. Na taumafai le tiapolo e fa'aosoosoina Iesu e ifo atu ia te ia ona foa'iina lea o le pule i malo uma o le lalolagi ma o latou matagofie (Mat. 4:8). Ae, ona o le usita'i o Iesu i le Atua le Tamā, o le ala lea ua tu'uina ai ia te ia le pule sili, ua le gata i le lalolagi nei, ae ua fa'apea foi ma le lagi i luga (Mat. 28:18). O lea ia ua ia Iesu le pule uma lava i le lagi ma le lalolagi mai le Atua. Le pule lea ua ia fa'atonuina ai ma poloa'iina ai ona so'o ma tagata uma ua talitonu ma fa'atuatua ia te ia, ina ia o atu e fai nuu uma lava ma so'o, ma papatiso atu ia te i latou i le suafa o le Tamā, ma le Atalii, ma le agaga Paia. O e tala'i ma fa'ailoa atu le Talalelei ia Iesu Keriso i tagata uma ma le lalolagi atoa.

O le poloa'iga ma le fa'atonuga ina ia fai le au so'o ma faifaiva i tagata, o se poloa'iga e fa'amalosia, e mauaa ma mausali (Mat. 28:19). O le poloa'iga e mana'omia ai lo latou o ese mamao mai i o latou vaa, upega ma ia. O upu o le poloa'iga o lo'o fa'aautu i upu galue e lua, o le *o atu* ma le *fai*. I le poloa'iga ma le fa'atonuga muamua a Iesu i ona so'o (Mat. 10:1-10), o le upu "o" o lo'o patino lava i tagata ma le aiga o Isaraelu. A'o le pololaiga sii lea, e mafai ona tatou fa'apea o se poloaiga

e matua fa'amalosiā, ma e tatau ona fa'ataunuūina. O lo'o telē se fa'amamafa o lo'o tu'uina i ai, e le gata i le o, a ia topetope, fa'avave le savali ma le o, a'e le o le savalivali ma fa'atuai. O le fa'avave ona taunu'u, fa'aioa ma fa'asalalau atu, o le vaega taua lea o le galuega fa'aso'o. E tatau ona tatou o i tagata uma, e le na o se vaega o tagata, ae o nuu ma atunu'u uma o le lalolagi ina ia latou iloa le Talalelei ia Iesu Keriso. E le gata i lea, ae ia a'oa'o atu ma tausi i mea uma ua poloa'iina ai i latou.

O le taualuga o le poloa'iga, o le fa'amalosi au i le mautinoa lea o lona auai faatasi ma ona so'o i aso uma e o'o lava i le iuga (Mat.28:20).

O le taua foi lea o le poloaiga sili (Great commission) mo i tatou uma, e lavea ai foi ma i tatou le fanau. O le faatonuga ina ia faatinoina e so'o se tagata Kerisiano ua talitonu ma talia Iesu Keriso e fai ma Alii ma Faaola. O lo tatou tiute foi lea e tatau ona fa'atino, o lo tatou o atu e fai i tatou ma so'o e tala'i ma fa'aioa Iesu Keriso i a tatou uō ma aiga ma so'o se tagata. Ia fai i tatou ma so'o moni e fiafia e talatalanoa i le alofa o Iesu i aso uma ae lē o le tele o le taimi e talanoa ai i isi mea e lē aoga. Ua mautinoa foi lona fa'atasi mai i ai tatou i aso uma e o'o lava i le gataaga.

GALUEGA FAATINO: Fa'aaliga manatu

1. Fesiligia le vasega e toe fa'amatala mai i a latou lava upu po'o le a le uiga 'O le Poloa'iga Sili' ma lona fa'apapalagiina? "O lenei, ia outou o atu e fai un'u uma lava ma so'o, ma papatiso atu i le suafa o le Tamā, le Atalii ma le Agaga Sa". E lelei foi lena e iloa ai po'o malamalama lelei i le Mata'upu.

Fesoasoani mo le tali: O le poloa'iga sili (The Great Commission), o le poloa'iga po'o le fa'atonuga tu'usa'o a Iesu i ona so'o, ina ia o atu i nu'u uma lava (un'u e ese mai nai lo o Iutaia ma Samaria) e tala'i atu ma fa'aioa atu le finagalo o le Atua e ala i le Talalelei ia Iesu Keriso ma papatiso atu i ai latou i le suafa o le Tolu Tasi Paia (suafa o le Tamā, le Atalii, ma le Agaga Paia. O le fa'atonuga e tatau ona fa'atino e tagata uma o ē ua talitonu ma talia Iesu Keriso e fai ma Alii ma Fa'aola. O lo tatou tiute foi lea ua fa'atonuina ai i tatou. E aofia uma ai foi ma

tatou, e le gata i a tatou uo, aiga ma un'u, ae fa'apea foi atunu'u ma le lalolagi atoa. Ia tala'i ma fa'aioa atu i ai le Talalelei ia Iesu Keriso.

PESE: Pese ma Viiga - 185

A'OA'OGA:

1. O i tatou uma o so'o o Iesu.
2. Aua le mā ma augata e tala'i atu Iesu i isi tagata, i lona alofa ma lona agalelei, ae maise le fa'aolataga na ia faia, e ala i lona maliu ma lona toe tū manaumalo mai le oti ma le tu'ugamau.
3. Ia tatou fiafia e ta'uta'u ma fa'aioa atu le alofa o Iesu i a tatou uo, aiga ma so'o se tagata.

.....

ASO SA: 9 SETEMA 2018

MATAUPU: UA TO'ATELE UA FILIFILIA I LE GALUEGA TALA'I

SINI: Ia a'oa'o tamaiti e le na o le au Aposetolo ma tagata Iutaia ua filifilia, ae ua aofia ai foi ma tagata o un'u ese.

TUSI FAITAU: Galuega 6: 1 – 6

FESOASOANI MO FAIAOGA:

Fai mai ua tupu ma fa'ato'ateleina le aofa'i o le numera o tagata ua liliu e avea ma Kerisiano, ma o le mafua'aga lea ua tupu ai se fa'aletonu ma se fe'ese'esea'iga i le va o le au Kerisiano Eperu ma le au Kerisiano Elenisi. O le au Elenisi ua taua o tagata o nu'u ese, o tagata nu'u o le malo o Eleni. E manatu nisi, o le au Eleni e fa'asino ia i tagata sa Iutā atoa ma isi tagata o lo'o nonofo solo i isi atunu'u e ese mai i Iutaia. O i latou nei e tautatala i le gagana Eleni po'o le Kuliki (Greek). O le au Eperu o tagata moni ia o sa Iutā o lo'o nonofo ma aumau i Ierusalemā

ma Iutaia. O la latou gagana o le Eperu (Hebrew). E ui a la o isi tagata Elenisi o tagata sa Iutā, ae, e pei e vaai maualalo i ai le au Eperu i le au Elenisi ona o tagata o lo’o nonofo ma aumau solo i isi nu’u, e le o ni tagata na fananau ma o lo o nonofo i Ierusalemā ma Iutaia, toe e se le gagana e tautatala ai, gagana Eleni. O le ala lea o le taua o i latou o tagata o un’u ese.

O le fa’aletonu ua tula’i mai, ua muimui le au Elenisi ma tu’ua’ia le lē lelei ona fa’asoa ma tufatufa meaai ma tupe i o latou fafine ua oti a latou tane. O le mea ua tupu ua le mafai e le au Aposetolo e toasefulu ma le toalua ona fa’atino le galuega o le tufatufaina o meaai ma oloa ona ua fai si tóatele o le au Kerisiano ua fa’aopopo, pe ā ma le 5000 le aofa’i o i latou ua liliu ma avea ma Kerisiano i le taimi lea. Ona manatu lea o le au Aposetolo, e sili ona filifili mai ni tagata se toafitu ua ta’uleleia, e tutumu i le Agaga Paia atoa ma le potu. O i latou nei o le a gafa ma le faiva o le faasoasoina lelei o meaai ma oloa. Ua manatu le au Aposetolo, e lē mafai ona latou tu’ua le folafolaina o le finagalo o le Atua ae tufatufa i oloa. E foliga mai e tele se taimi o le au Aposetolo o lo’o alu ai. Ae e lelei ona tofi nisi e agava’a e tau’aveina ia tiute taua ae fa’aavanoa le tele o lo latou taimi e lauga ai ma tala’i ai le finagalo o le Atua. Ua lelei foi lea tonu i manatu o tagata ona filifili lea o i latou ia Setefano, o le tagata ua tumu i le fa’atuatua ma le Agaga Paia, ma Filipino, ma Pokoro, ma Nikanora, ma Timona, ma Pamena, ma Nikolao o le Anetioka sa lotu i le lotu a sā Iuta.

O igoa o tagata nei e to’a fitu, o igoa Elenisi uma. O lona uiga, ua le na o sā Iuta ua filifilia, ae ua filifilia foi ma tagata o nu’u ese e galulue ma tala’i le finagalo o le Atua. O Setefano lea na avea ma ulua’i tagata na oti fa’amaturu ona o le talitonu ma le fa’atuatua ia Iesu Keriso (Gal. 7:54-59). O Filipino lea na mua’i tala’i le Talalelei i Samaria (Gal. 8:4-8). O Filipino foi lea na tala’i atu Iesu Keriso i le eunuka, le auauna sili a Kanake le tupu tamaiti’i o Aitiupe (Gal. 8:26-40).

Ioe tamaiti, o le Talalelei ia Iesu Keriso e mo tagata uma e aofia ai ma tagata o nu’u ese. E mafai foi ona tu’ua i tatou o tagata o nu’u ese auā e le o tatou o ni tagata Isaraelu po’o tagata Iutaia. Ae ona ua tatou talia Iesu Keriso e fai ma Alii ma Fa’aola, ua avea ai foi i tatou ma Kerisiano, o e ua talitonu ma fa’atuatua ia Iesu Keriso. O i tatou foi ua fa’aopopo i le fa’ato’ateleina o le numera aofa’i o tagata Kerisiano i le lalolagi atoa.

GALUEGA FAATINO: Fesili ma Tali:

1. O ai tagata ia e toafitu na filifilia? A’o fea foi e o mai ai? Ni tagata o sa Iuta po’o ni tagata o nu’u ese?

Tali- O tagata ia e to’afitu o tiakono na filifilia e fesoasoani i le au Aposetolo i le tufatufaina o oloa ma meaai. O i latou o tagata Elenisi- tagata sa Iuta o lo o nonofo i isi nuu e ese mai ia Samaria ma Iutaia, po’o tagata Kuliki foi (Greek) ma isi tagata o isi atunuu ae ua liliu e avea ma Kerisiano. O la latou gagana o le gagana Eleni.

2. O a mea taua e tolu na fua i ai le filifiliina o tagata e toafitu e agavaa?

Tali: O ni tagata e ta’uleleia, tutumu i le Agaga Paia, atoa ma le potu.

3. O le a le eseesea o le au Eperu ma le au Elenisi? Aua e iai le manatu o tagata lava e tasi, o le au sã Iutã (tagata Iutaia).

Tali- O le au Eperu, o tagata nuu moni lea o Iutaia o lo o nonofo ma aumau i Ierusalem ma Iutaia (native Jews). Latou te fa’aaogaina le gagana Eperu (Hebrew language).

A’o le au Elenisi- o tagata Eleni. O Eleni lea ua suia nei lona igoa ia Greece. O se atunu’u malosi tele, ma sa pulea le lalolagi i ia ona po i le vaitaimi o le tupu o Alesana le Sili.

E mafai la ona faapea, o le au Elenisi e lavea ai foi ma tagata Iutaia o lo o nonofo solo i isi nuu e ese mai i Ierusalem ma Iutaia, ma o lo o i lalo o le puleaga a le au Eleni. O le latou gagana, o le gagana Eleni (Greek language po’o le Kuliki). E lē gata la i tagata Iutaia lava latou o lo o nonofo i fafo atu o Ierusalem ma Iutaia atoa, ae e aofia ai foi ma isi tagata o isi nuu ma atunuu o loo pulea e Eleni i ia ona po. O tagata uma nei sa ta’ua o tagata o nuu ese po’o le au Elenisi, ona o lo o pulea, ma i lalo o le va’ava’aiga a Eleni o latou atunuu.

PESE: Pese ma Viiga -256.

A’OA’OGA:

1. Ia avea i tatou ma tagata aoga e fiafia e galulue (auauna) mo Iesu Keriso ma lona finagalo.
2. Ia fa'amaoni i tiute ma tofiga ua tofia ai. Fa'amaoni i mea iti, e tofia ai e pule i mea e tele.
3. Ia tatou to'a'aga e galulue mo le atia'eina o le malo o le Atua ia tele ni agaga tatou te maua mo Ia.

.....

ASO SA: 16 SETEMA 2018

MATAUPU: O LE FA'ASOA A IETERO

SINI: Ia a'oa'o tamaiti ina ia latou iloa e tele le fesoasoani e aumai i isi tagata pe afai ua mamafa tū se avega ma se galuega o lo o faia.

TUSI FAITAU: Esoto 18: 14-26
FESOASOANI MO FAIAOGA:

O Ietero o le tamā ia o Sepora le avā a Mose. O ia o le ositaulaga o le un'u o Mitiana. E ese foi lo latou talitonuga ma atua e tapua'i i ai. Ae ina ua talatala atu i ai e Mose o mea uma na faia e le Atua ia Farao ma Aikupito, atoa ai ma le lavea'iina o Isaraelu e le Alii. Na matua olioli Ietero ma ana iloa ai e silisili lava le Alii i atua uma lava. Ua ia faia foi o taulaga mu ma taulaga fa'afetai i le Atua. Ua latou aai fa'atasi foi ma Arona ma toea'iina uma o le nuu i luma o le Atua (Esoto 18:6-12).

Ua o'o i le taeao ona nofo lea o Mose e fa'amasino i le nuu; ua laulaututū foi le nuu i luma o Mose e afua mai i le taeao ua oo lava i le afiafi. Ua iloa e Ietero e le faigofie ia Mose ona fa'amasino fa'apea i le nuu. E tigaina ma faigata. E le gata mo Mose, ae faapea foi le nuu atoa i lo latou laulaututū mai i le taeao seia oo ina po. E le mafai e Mose ona ia fa'amasino to'atasi i le nuu.

O le ala lea o lona fa'asoa atu ia Mose ina ia filifili ai le nuu atoa ni tagata loto tetele, o e matata'u i le Atua, o tagata fa'amaoni ma ino'ino i le leaga; ma ia tofia e pule i ai latou, e fai ma alii o taito'aafe, ma alii o

taito’aselau, ma alii o taito’alimagafulu, ma alii o taito’atinogafulu; ma ia fa’amasino atu i le nuu i aso uma lava. Ua na o mea tetele lava e aumai ia Mose, ao mea iti uma latou te fa’amasinoina; ona faamāmā ai lea ia te ia o lana galuega, o le ta’itai’ina ma le fa’amasinoina o le nuu i aso uma.

Na usita’i Mose ma fa’alogo i le fa’asoa a le tamā o lana ava. Ua ia faia foi e pei ona fa’atunuina ai o ia e Ietero ma ua faigofie ai foi lana galuega. Ua na o mea tetele ua avane ia Mose e na te fa’amasinoina, ao mea laiti ua fa’amasino lava e le nuu.

Tamaiti, o le fa’asoa a Ietero, o le mea lava mai i le Atua. Ua fa’aaogaina e le Atua le ositaulaga o le nuu o Mitiana e auala mai ai lana fesoasoani mo Mose. Manatua tamaiti ina ua fa’amatala atu e Mose o mea uma lava na faia e le Atua ia Farao ma Aikupito, na matua talitonu lenei ositaulaga fa’apaupau, na olioli lona loto ma ia faapea ane ai, e leai se isi atua e sili atu nai lo le Alii. Na liliu Ietero ma avea ma tagata talitonu i le Atua.

E taua tele le fa’asoa atu ma fa’ailoa i isi tagata o lo o mana’omia la tatou fesoasoani. O le fa’asoa a Mose na liliu ai ma avea Ietero ma tagata talitonu i le Atua. O le fa’asoa a Ietero na faigofie ma māmā ai le galuega ma le avega na tau’aveina e Mose i le fa’amasinoina o le nuu o le Atua.

GALUEGA FAATINO: Taliga Fesili:

1. O ai le isi igoa o Ietero le tamā o le avā a Mose?
Tali: Reualu (Esoto 2:17).
2. O le a le fa’asoa a Ietero na fai ia Mose ina ia faigofie ai lana galuega o le fa’amasino i le nuu? Fa’amatala lelei mai (fuaiupu e 17-23).
3. O le a le tali a Mose i le fa’asoa a le tama o lana ava? Na usita’i Mose pe leai? Fa’amatala lelei mai (fuaiupu e 24-26).

PESE: Pese ma Viiga – 380.

A’OA’OGA:

1. Ia fa'asoa atu ma fa'aiiloa atu ni mea lelei ma ni galuega lelei mo le manuia o isi tagata.
2. Aua le mā e talanoa ma molimau i mea lelei ua fai e le Atua i au uo ma aiga.
3. Fa'alogo lelei i fautuaga e aumai i matua ma i latou ua matutua e manuia ai.

.....

ASO SA: 23 SETEMA 2018

MATAUPU: SAUAINA LE EKALLESIA, UA VAVE AI ONA SALALAU LE TALALELEI

SINI: Ia a'oa'o tamaiti ia latou iloa o le vave o le o'o o le Talalelei i isi nuu o le lalolagi, na mafua ona o le tā'ape'ape ai o le au Kerisiano ina ua sauaina. Sa sosola i isi nuu ma atunuu ma nonofo solo ai. E le gata la o le nonofo ai mo lo latou saogalemu, ae sa tala'i ma fa'aiiloa atu le Talalelei ia Iesu Keriso i tagata o ia nuu.

TUSI FAITAU: Galuega 8: 1-13

FESOASOANI MO FAIAOGA:

O le māe'a ai o le fasiga o Setefano, na amata ai ona matua sauaina le au Kerisiano ma le Ekalesia i Ierusalem. O le mafua'aga lea o lo latou sosola ese ma fa'ata'ape'apeina ma fa'asalalauina i nuu uma o Iutaia ma Samaria. Ua atili ai le sauā o Saulo, ua ia ulufale i lea fale ma lea fale ma fetoso ma saisai mai i tane ma fafine. Ua ia tuuina atu foi i latou i le fale puipui.

Ua o atu foi i latou ua fa'asalalauina ma folafola atu le Talalelei ia Iesu Keriso. Ua alu atu foi Filipo o le tasi o tiakono e toa fitu na filifilia, ma tala'i le Talalelei i le aai o Samaria. E tó'atele ua talitonu ma talia le Talalelei ina ua fa'alogo ma va'ava'ai i fa'aailoga e tele ua faia e Filipo.

Ua ia tutuli i fafo temoni na ulufiaina tagata e tóatele, ua ia fa'amaloloina i e sa maua i le ma'i supa ma ē sa pipili. Ua matua tele ai lava le fiafia ma le olioli i lea aai.

A'o Simona, o le tasi tagata sa mua'i fai togafiti fa'ataulāitu i le aai o Samaria, ua ia fa'atupu le ofo tele o tagata i ana togafiti fa'ataulāitu. Ua tó'atele foi ua talitonu ia te ia ma manatu ai, o le mana tele o le Atua ua i lenei tagata. Peita'i, ua sili lo latou talitonu ia Filipino ma le Talalelei ua ia folafolaina i mea tau i le malo o le Atua ma le suafa o Iesu Keriso. Ua papatisoina foi i latou o tane atoa ma fafine. O Simona foi, ua talitonu ia; ua papatisoina foi o ia. Ua ia matuā ofo i fa'ailoga ma vavega ua faia e Filipino, ma ua ia mulimuli atu foi ia te ia.

Ua fa'alogo fo'i le au Aposetolo i Ierusalem, ua talia e Samaria le Talalelei, ona latou 'a'auina atu lea o Peteru ma Ioane.

Tamaiti! E ui lava i le mata'utia o sauaga na o'o i le au Kerisiano ma le Ekalesia i ia ona po, ae, e i ai le manatu, o le auala lea na saunia e le Atua ina ia fa'asalalauina ai tagata Kerisiano ma folafola atu le Talalelei ina ia fa'atalaleleina ai le lalolagi uma. E ese fo'i auala a le Atua. Ne'i o tatou manatu ua lē alofa ma le manatu mai o ia i ona tagata, e leai! O auala lava ia a le Atua ua na o ia na te silafia. E faia pea lona finagalo i lana pule faitalia ma lona lava taimi (God's timing). E telē le aoga o le sauaina o le Ekalesia ma ona tagata, aua ua vave ai ona salalau le Talalelei ia Iesu Keriso i isi nuu ma atunuu e ese mai i lo'o Iutaia ma Isaraelu.

E pei foi o Samoa nei, o tagata Kerisiano mai isi atunuu pei o Peretania, Tonga ma Tahiti na aumaia le Talalelei ua fa'atalaleleiina ai si o tatou atunuu.

GALUEGA FAATINO: Fetufaaiga e ala i fesili:

1. O le a le aoga o le sauaina o le au Kerisiano mo le Talalelei o atagia mai i le mata'upu sa faitauina?

Tali: Na vave ai ona fa'asalalau atu ma fa'ailoa le Talalelei i isi nuu ma le lalolagi uma ina ua sosola ma nonofo i isi nuu.

2. O ai le toalua o le toafitu lenei na filifilia, o lo'o iloga a lā galuega na fai? Fa'amatala mai.

Tali- O Setefano ma Filipino.

3. O Filipino na muamua tala’i ma folafola le finagalo o le Atua i le a’ai o Samaria, ma ua tóatele ua liliu ma talitonu ai i le Talalelei ia Iesu Keriso.
O Setefano o le ulua’i tagata lea na oti fa’amaturo (ofoina lona ola e oti mo le Talalelei ona o lona loto talitonu ma le fa’atuatuaga ia Iesu Keriso).
4. O ai Simona o loo taua i le tala?
Tali- O Simona le fai togafiti fa’ataulaitu. E nofo o ia i le aai o Samaria. E tóatele ua ofo i ana togafiti ma manatu ai, o le mana tele mai le Atua ua i lenei tagata. Na fa’alogo o ia i le tala’iga a Filipino i mea o le malo o le Atua. Ua talitonu ai ma ua papatisoina. Ua mulimuli atu foi o ia ia Filipino.

PESE: Pese ma Viiga – 119.

A’OA’OGA:

1. Ia tatou onosa’i pea sau mai is tagata ia i tatou.
2. Aua le tau i ma sui.
3. Tumau pea le talitonu ma le fa’atuatua ia Keriso Iesu.

.....

ASO SA: **30 SETEMA 2018**

MATAUPU: **‘UA NAUNAU MAI MAKETONIA MO LE TALALELEI’**

SINI: Ia a’oa’o tamaiti ia malamalama, o le isi lea atunuu e i lalo o le puleaga a le malō o Roma; A ua mana’omia e ona tagata le fia iloa ola i le Talalelei ia Iesu Keriso, e pei ona tala’iina e Paulo.

TUSI FAITAU: Galuega 16: 9- 15
FESOASOANI MO FAIAOGA:

Fai mai e ui a ina tele fita ma faigata na o’o ia Paulo i isi ana malaga, ae le’i mafai ai ona ia fa’afitia ia faigata, i lona naunau atu pea e fa’asopolia aai o nuu ese i le Talalelei a Iesu Keriso.

O lana malaga lona tolu lea na o ai ma Sila. Na la’ua maua ai Timoteo, o le tagata ua ta’uleleia i le aai o Lusa, aua o lona tina o le Iutaia, a’o lona tamā o le Eleni. Ona la papatisoina lea e tusa ma le tu faa-Iutaia. Ua latou o foi ma ia, e asia aai uma ua o’o i ai le Talalelei, ma tu’uina atu i ai iugafono a toea’iina ma Aposetolo mai Ierusalemata latou te tausia.

Ua latou ui ane i nisi o aai i le atu Asia, a ua vaioa i latou e le Agaga Paia ona tautala atu i se upu. Ua latou ui fa’atafatafa ane i nisi o aai ma o’o atu ai i Teroa. Na iloa e Paulo le fa’aaliga i le po, o le tasi tagata Maketonia ua fa’apea ane; ‘ina sau ia i Maketonia ma fesoasoani mai.’ Na iloa e i latou lea fa’aaliga ma sauni loa e o atu i Maketonia; aua ua manatu le Aposetolo, o le vala’au mai le Alii e folafola le Talalelei i lea aai manaia.

Ua sauni le malaga ma tu’uva’a atu loa mo lea fa’amoemoe lelei. Sa mua’i taunu’u i Filipi, o le aai muamua lea o Maketonia sa avea ma kolone a le malō o Roma. Sa taunu’u i le aai o Maketonia ma nonofo ai loa. E le’i i ai lava se isi sa fa’amoemoe i ai Paulo ma lana au malaga; Ua na o le Atua lava lo latou fa’amoemoega e tusa ma lo latou vala’auina. O le ala lea ua fai ai ma masani le o ane o i latou i le aso Sapati i tua o le aai i le auvai o le vaitafe, ma fai ai a latou tatalo. O le nofoaga ua fai mo latou e tatalo ai i le Atua. Ua nonofo i latou i lalo i lea aso ma a’oa’o atu ai i fafine sa iai.

O le toatele o nei tagata o fafine. Na fa’alogo ai le tasi fafine ua mata’u i le Atua. O Litia lona igoa, o le fa’atau ie pauli mai le nuu o Tuatira. O lona uiga, e lelei le tamaoaiga o Litia; Aua e lē taugofie le ie lea. E na o aiga tau tupu latou te fa’aaogaina, e fa’ailoa ai lo latou gafa tau tupu ma lo latou tamaoaiga. Ai o le ala lea na lē finagalo ai le Alii e tautala atu i latou i se upu i le atu Asia, ona o lenei agaga a maumau, ua tatau ai ona fa’aolaina lea agaga i se taimi vave lava. Lea na iloa i lea aso ina ua

tatalaina e le Alii lona loto ina ua ia faalogo i upu na tautala ai le Aposetolo o Paulo.

E le'i gata ai ia Litia le fa'aolataga. Fai mai na papatisoina o ia atoa ma lona aiga. O lona uiga, o Litia ma lona toalua, ma lana fanau atoa ai ma nisi tagata o lo'o nonofo ai, lea ua papatisoina fa'atasi i le fa'aolataga a Iesu Keriso. Fua ia o le Agaga Paia e loto atu i le finagalo o le Atua; ina ua ia aioi ane ina ia latou nonofo ma Paulo ma lana au malaga i lona fale. Ua fa'aaogaina e Litia lona tamao'aiga mai lana pisinisi, e fa'ateleina ai lona tamao'aiga fa'aleagaga; E ala i lona naunau ane ina ia o latou nonofo i lona fale. O le ata o le tagata ua naunau lona loto e fia talanoa pea i afioga paia a le Alii. Ua fia galue mo le Alii. E manaia ae fa'apea o tatou loto pei o Litia. O le a fai mo tatou le fale sa i Aso Sa uma. E lē toe misi se aoga Aso Sa, autalavou, o le fa'aaogaina foi o tatou leo mo le Alii, e ala i le aufaipese. O le fa'aailoga lena e iloa ai o tatou tagata, e naunau e fia iloa atili le finagalo alofa o le Atua.

GALUEGA FAATINO: Taliga Fesili

Fa'atalanoa tamaiti e ala i fesili o lo o mulimuli mai.

1. O le a le fa'aaliga na iloa e Paulo i le po i Teroa?
Tali: O le tagata Maketonia na fa'aailoa ane ia Paulo, ina ia sau e fesoasoani ia i latou i Maketonia.
2. Fa'amata o le a se fesoasoani o lo o mana'omia e Maketonia?
Tali: O le feau o le Talalelei/ Fa'aolataga a Iesu Keriso.
3. O fea tonu le nofoaga tatalo o Paulo ma Sila?
Tali: O tuāpa i le auvai o le vaitafe.
4. O le a se mafua'aga ua fai ai i le auvai o le vaitafe ia tapua'iga?
Tali: E lē taliaina e nuu ese le tala'iga a Paulo ia Iesu Keriso.
5. O le a se mafaufauga o lo o i tua o le naunau o Litia latou te nonofo fa'atasi ma Paulo ma Sila?
Tali: Fai lona fale e fai ai tapuaiga i le Atua.
6. O le a se uiga lelei o Litia ua mafai ai ona fa'aolaina lona aiga?

Tali: O le fa'atuatua ma talitonu i le fa'aolataga a Iesu Keriso.

A'OA'OGA:

1. Ia saili malō i le finagalo o le Atua.
2. Ia tatou naunau e saili le Alii ae lē o le tamaoaiga o le tino.
3. Ia fai Iesu ma o tatou malumalu tapua'i.

.....

MANATU TAIALA OKETOPA: “IA TU’U MAIA TAMAITI E O MAI IA TE AU.”

ASO SA: 28 OKETOPA 2018

MATAUPU: “O FAAILOGA VA’AIA O TAGATA O LE MALO O LE ATUA.” *(The identity of the people of God’s Kingdom)*

SINI : Ia malamalama tamaiti, o le loto maualalo ma le alofa, tasi ia fa’ailoga va’aia o tagata o le malo o le Atua.

TUSI FAITAU: Mareko 9: 33 – 37

FESOASOANI MO LE FAIAOGA:

E manatu ua manino ma malamalama lau susuga i le tala. O se tala fo’i ua tau so’o i ai le faitau ma tatou fa’alogo so’o o laugaina e le aufaigaluega. Ae ua na o ni nai manatu fa’atupu manatu mo lau susuga, aua le tau fa’apupulaina o le mata’upu o lenei Aso Sa.

O le vaega o le Tusi sa faitauina, o lo’o matua fa’amanino lelei ai e Iesu i lona auso’o fa’ailoga ma foliga va’aia o le tagata e tatau mo le malo o le Atua. Aua e le’i fa’anefu ia Iesu manatu ma mafaufauga o lona

auso'o, e pei ona latou fefinaua'i ai i le ala. Lea na o latou fesilisili ai po'o ai e sili i le malo o le Atua. O le ala lea o lona matua a'oa'o atu ia te i latou ina ia malamalama, ma ia aua ai ne'i toe tu'u fesili.

O lea la ua fetalai tu'usao le Alii i lona auso'o, "A fia muamua se tasi, ia fai o ia ma mulimuli i tagata uma. Afai foi e fia sili se tasi, ia fai o ia ma auauna a tagata uma. E le o fa'apea mai le Alii, e fai ma 'au'auna i se vaega o tagata, po'o tagata matutua, po'o ni matai, po'o ni tagata mauualuluga, leai. Ia fai ma 'au'auna a tagata uma, e aofia ai ma tagata le taualoa ma le fa'atauva. O lona uiga e aofia ai ma le pepe fa'atoa fanau mai. Ae o ai se isi e fia fai ma 'au'auna i se tamaitiiti ma le tagata fa'atauva? Po'o se tagata foi ua maualuga sona tulaga i le malo, po'o se isi foi e tele sona tamaoiga, e faigofie fa'apefea ona fai ma auauna a tagata uma?

Ae o le uiga tonu lea o le aumai e Iesu o le tamaitiiti ma fa'atu i o latou luma, e fai ma ata fa'ataitai o tagata o le malo o le Atua. O le finagalo o Iesu, ia aua nei mafaufau fa'amaualuluga le auso'o, i o latou tofiga po'o le fai ma so'o. Ae ao ona mafaufau le auso'o, e sili atu tamaiti nai lo latou. O le uiga o le manatu, ia lagonaina le loto mauualalo, ma ia ola mamā. O le tamaitiiti foi, o le a lava se mea e tuu atu i ai, na te taliaina lava ma le loto fa'afetai ma le fiafia. E ao foi la ona faapena i latou. E ao ona latou talia tagata uma ma le loto fiafia, tusa lava po'o tagata lē taualoa ma le fa'atauva'a. Aua o lo latou taliaina o tagata fa'atauva'a e pei o tamaiti i le loto fiafia ma le agaga fa'afetai, o lo latou taliaina lava lea o le malo o le Atua. O lo latou taliaina foi lea o Iesu, fa'atasi ai ma le Atua.

O lona uiga e matua taua le loto mauualalo ma le agamalu. E pei foi o Iesu, na ia fa'amaualalo o ia ia te Ia lava, ma fai ai o ia ma auauna a tagata uma, e ala i lona soifua atoatoa na Ia ofoina mai, e maliu ma toe tu manumalo, ina ia maua e tagata uma ona manuia e fa'avavau, e ala i le salamō ma le faa'tuatua fa'amaoni. Ma ua ave'a ai o Ia ma Alii Silisili o lona malo, e fa'alogoma usita'i i ai tagata uma ia te Ia. AMENE

GALUEGA FA'ATINO:

Tusi se ata o le tagata, ona tusi lea o ni 'aū i so'o se vaega o le tino o le tagata. A mae'a ona tusi ai lea i 'aū nei o ni mea o lo'o ta'ua i le tala, e iloa ai o fa'aailoga ia o le tagata o le malo o le Atua.

Tali mo le faiaoga: auauna a tagata uma, mulimuli i tagata uma, loto mauualalo, talia tagata mauualalo ma le fa'atauavaa, loto mama, ma isi.

PESE: 379 (Pese ma Viiga)

A'OA'OGA:

1. A fia avea oe ma tagata o le malo o le Atua, e ao ona e amio lelei ma amio Atua, e fa'apaleina ai oe.

.....

**MANATU TAIALA NOVEMA: “O LE ATUA MA
TAULAGA”** (*God and
Sacrifices*)

ASO SA: 04 NOVEMA2018

**MATAUPU: “OU TE MANAO I LE ALOFA MA LE
AMIOTONU”** (*To love mercy and act justly*)

SINI: Ia a'oa'oina tamaiti ina ia latou iloa o le ola faitaulaga mo le Alii, o le fa'atino o le alofa ma fai le amiotonu.

TUSI FAITAU: Mika 6: 6 - 8

FESOASOANI MO LE FAIAOGA:

O Mika e sau mai i le nu'u o Moresete, pe tusa ma le luasefulu maila i matu i sisifo o Ierusalem. O le uiga o le igoa o Mika, “O ai e tutusa ma le Atua?” E le o ta'ua ni ona tupu'aga, ae na fai o ia ma perofeta i le tausaga 742 – 687 TLM. O lana feau fa'a-perofeta e aofia ai Isarael ma Iuta, ma Samaria.

O le isi la lenei vaega o le feau a Mika mo le nuu o le Atua. Aua la, ua mafuli tagata i le fai o le agasala ma le fa'amoemoe, a uma ona o lea e ave taulaga mo agasala, e fa'amagalo ai o latou sese. Peita'i, o lea ua

fa'amalamalama e Mika i tagata le sese i sini o lo latou talitonuga lea. O le Atua e le se Atua e fa'amalieina lona finagalo i ni taulaga. Aemaise lava ia i latou e tele le tamao'aiga ma maualuluga o latou tulaga i le malo. Ua latou fa'aaogaina tagata vaivai ma le le taualoa e saili ai lo latou manuia i le tino.

O ta'ita'i foi, ua latou faia fa'amasinoga amioletonu, ma ua le tusa lea ma le finagalo o le Atua. Ua pologa tagata lautele ona o amioga a i latou nei. Ae o le uiga la lea o le feau a le perofeta, o le ta'u atu i tagata ia, e le o le finagalo lea o le Atua. O upu la e pei ona tatou faitauina, o lo'o matua manino mai ai le aotelega o le feau a le perofeta mo le nuu o le Atua. E foliga mai i upu a le perofeta, o lo'o tautala o ia ia te ia lava. Lea e pei ona fai mai, *"Ou te alu atu ea ma ni ā i luma o le Alii, ou te ifo atu ma ni ā i le Atua maualuga? Ou te alu atu ea i ona luma ma taulaga mu, ma tamai povi e tasi lo latou tausaga? E fiafia ea le Alii i afe o mamoe poa, ma manomano o alia o tafe suauu? Ou te tuuina atu ea la'u ulumatua e sui a'i le agasala a lo'u agaga?"*

E foliga mai i upu ia a le perofeta, o le itu'aiga ola lea o lo'o ola ai tagata, ma le ituaiga mafaufauga lea o lo'o mafaufau ia i latou. A agasala, ona ave lea o le taulaga e fa'amagalalo ai agasala. Ona toe fa'aaau ai foi lava lea o le ola agasala. Ma ua foliga mai ai ua ta'umāmāina ai le fa'amasinoga amiotonu a le Atua. Lea la ua fa'aילו atu e Mika, leai, e le o le taulaga e fiafia i ai le Alii. Tusa lava pe e te faitaulaga i le Alii i lou atalii ulumatua, e le mafai lava ona fa'amalieina ai le finagalo o le Atua. Leaga e le se Atua e ta'ita'iina fa'a-ia-matau lona finagalo.

Ae faigofie lava le finagalo o le Atua. Pau a le mea e fai, *"Ia fai le amiotonu, ia naunau i le alofa, ma ia feoa'i ma Ia ma le loto fa'amaualalo"*. Pau a lea, e leai se isi mea. E le tau tigaina fua e fai ni taulaga. I latou o lo'o fia fa'aolaina moni, ia fa'aילו lo latou fa'atuatua ia latou galuega. Aua le faia le fa'amasinoga amioletonu, e afaina ai le soifua auuuna o isi mo le Atua. Ia fai mea uma i le alofa. Ia alofa i le Atua, ma alofa i le uso. E le na o le faimai e alofa, ae leai se fa'atinoga, leai ni fua va'aia o le alofa. Ia iloa ona fa'amaualalo ma ta'utino mea ua fa'aletonu ai, ae le o le fia sa'o ma lafilafi solo i fa'aupuga.

O la tatou uo o Iesu, o ia lava le fa'aaao sili mo tatou i aso uma. Auā o ia o le fa'amasino amiotonu, na ia faatino mea uma i lona alofa, seia o'o lava ina fai o ia ma taulaga Silisili mo le lavea'iina o i tatou tagata agasala.

Uiga o Upu ma Fuaitau:

i) alia o tafe suaau: o lona uiga e pei se vaiatafe (river) le tele o le suaau.

ii) manomano: tele ua le mafai ona faitau.

GALUEGA FAATINO:

Faaliliu le parakalafa lea i le faa-Samoa.

“With what shall I come before the Lord, and bow myself God on high? Shall I come before Him with burnt offerings, with calves a year old? Will the Lord pleased with thousands of rams, with ten thousands of rivers of oil? Shall I give my firstborn for my transgression, the fruit of my body for the sin of my soul? He has told you , O mortal, what is good; and what does the Lord require of you but to do justice, and to love kindness, and to walk humbly with your God”.

NB: A uma ona faaliliu le parakalafa lena, ona fai lea i tamaiti e a’o fa’atauloto. Ma e fautuaina foi lau susuga ina ia tulituliloa le homework lena a tamaiti i le Aso Sa o lumanai.

A’OA’OGA:

1. Fa’ailoa lou fa’atuatua i au fa’atinoga o aso uma, ae le na o upu.
2. E finagalo le Atua ia tatou amiolelei, ae le o le ola fa’afoliga.

MANUIA LE ASO SA.

.....

ASO SA: 11 NOVEMA 2018

MATAUPU : AVE MEA A LE ATUA I LE ATUA

SINI: Ia malamalama tamaiti, o mea uma lava e patino i le Atua, e aofia ai ma le tagata.

TUSI FAITAU: Mareko 12: 13 – 17

FESOASOANI MO FAIAOGA:

E le se mata'upu fou lenei mata'upu. Ae le ave'eseina ai lona taua, i le fai pea lea ma fa'amanatu i le fanau ma i tatou foi, i lo tatou va feagai ai ma lo tatou Atua. E ao lava ona malamalama le tagata, i fa'amanuiaga o lo'o sapi ai, ma lana tali atu i le Atua mo ia fa'amanuiaga. E ao ona iloa e le tagata ona vivi'i ma fa'afetai i le Atua mo mea uma ua ia fo'ai mai ona o lona alofa.

O le au faresaio ma le au Herotiano o fa'apotopotoga uma ia oni vaega o tagata Iutaia. I latou ua nonofo lava latou ma faimai o latou o ta'ita'i o le nuu o Iutaia. E 'ese'ese vaega ia e lua, ma o latou talitonuga ma a latou matafaioi. Ae tasi lava le mea e tutusa ai latou, o le taumafai lea e sa'ili ni auuala e fa'aleaga ai le galuega a Iesu.

Le ala la lea o lo latou omai fa'atasi i le taimi e tasi, e fesili atu ia Iesu e uiga i le fai, ma le le faia o le lafoga ia Kaisara le Emeperoa o le malo o Roma. Ua manatu i latou, a tali mai Iesu e tatau ona fai, o le a le fiafia le toatele o tagata ia te Ia, auā e le faia tagata i le lafoga lea. Ae a fai mai Iesu e aua le faia, o le a faigofie loa ona latou molia Iesu i lona tete'e i tulafono a Roma. Peita'i, o le poto i le mafaufau o le tagata, o le vale lea i le finagalo o le Atua. Auā o lea ua o atu ma lo latou manatu o le a latou maua ai Iesu i le mea lea, ae na matuā fa'ateia i latou i le tali a Iesu. "O mea a Kaisara, avatu ia ia Kaisara, ao mea a le Atua, avatu i le Atua.

O le uiga o le fetalaiga a Iesu, ia ave tupe a Kaisara ia Kaisara. Aua o le tenari o lo'o i ai i luga le fa'atusa o Kaisara. Ae o le tagata lava ia na faia i le fa'atusa o le Atua, ia ofo atu mo le Atua. O lona uiga, e o'o lava ia Kaisara le Emeperoa o le malo o Roma, e ao ona ifo ma auauna atu i le Atua. Aua o tagata uma lava na faia i le fa'atusa o le Atua, e ao ona vivi'i ma tapua'i i le Atua o le na faia o ia.

E pei foi o Samoa, o lea lava e ao lafoga, mo le atiina e o le atunuu, ina ia manuia ona tagata lautele. Ae a o'o loa i taimi o lotu, e ao i tagata uma ona o e vivii ma faafetai i le Atua. E le gata i lea, e ui ina tatou ave tupe i le malo mo lona atiina e, ae o le fa'aaliga o lo tatou fa'atuatua i le

Atua, o lea tatou te avatu ai mea uma lava fa'atasi ma o tatou tagata, e tautua ma auuuna ai ia te Ia.

Manatua foi o Iesu e le i faapea na o le a'oa'o atu lana mea na fai, ae sa ia fa'atino foi i lona soifua galue i le lalolagi. E pei ona fa'amauina i le Mataio e 17:27, o lo'o fa'atonu ai e Iesu Peteru ina ia alu i le vai e aumai le tupe i le gutu o le i'a e fai ai ā lā lafoga. Ae o le fa'ataunu'uina o le feau na Ia afio mai ai i le lalolagi, sa ia usitai lava i le finagalo o lona Tamā, ma ia ofoina atu ai atoatoa lona lava soifua, e fa'ataunu'u ai le fa'aolataga mo le lalolagi, e tusa o le feau na auina mai ai o Ia e le Atua. E lē mo sona viiga, ae ina ia viia ai lona Tama oi le lagi.

Uiga o Upu:

- i) Tenari: o le tupe siliva a le malo o Roma, e tusa lona aofa'iga ma sene e sefulu i le vaitau o Kaisara. Na suia le igoa o lea tupe i le “pene”, (penny) i le tausaga e 735T.A.
- ii) Herotiano: O le fa'apopotoga o tagata Iutaia, ae le o Iutaia uma, i latou e fiafia i pulega ma tulafono a Herota, ae faa le fiafia i pulega a le malo o Roma. E eseese ma le au faresaio, ae tasi le mea e tutusa ai, ona o lo latou taumafai lea e tetee atu i a'oa'oga a Iesu.

GALUEGA FAATINO:

E manaia foi pe a vaevae le vasega i ni vaega se lua, ona o lea o vaega ta'itasi e sa'ili'ili i le Tusi Faitau, ma taumafai e ta'u mai po'o le a le feso'otaiga o le Tusi Faitau ma le mataupu. A maea ona fa'atoa fai lea o le fesoasoani a lau susuga i le faiaoga.

Ia saunia lava e lau susuga ni fesili e tulituliloa ai le mataupu.

A'OA'OGA:

1. Fa'a'ailoa lou ola vivii i le Atua i mea e te faia i aso uma.
2. Ave i le Atua mea e tataui i le Atua.

3. O le vi'iga ma fa'ane'etaga o ā le Atua ia.

.....

ASO SA: 18 NOVEMA

MATAUPU: FAITAUAGA MA LE LOTO FAAMAONI I LE ATUA (*Worship God with honor and with all hearts*)

SINI: Ia a'oa'oina le fanau ina ia malamalama, o le ola faitaulaga mo le Alii, e fai ma le loto fa'amaoni.

TUSI FAITAU: Isaia 29:13-16

FESOASOANI MO LE FAIAOGA:

O le olaga lea na ola ai le nuu o le Atua i ona po Isaia. E tula'i mai Isaia ua uma ona vaeluaina le malo o Isaraelu. O le malo i Matu ua i ai ituaiga e sefulu, ma le malo i Saute o lo'o i ai ituaiga e lua. O le malo la i Matu lea lava e igoa ia Isaraelu, a'o Sauté lea ua igoa ia Iuta.

O le feau la a le perofeta o Isaia, e fa'amamafa lea i le malo o Iuta. Aua pei o i latou ia o lea ua nonofo i Ieruselema le aai Paia, i le mea o lo'o tu ai le malumalu. O i latou foi, o lo'o latou fa'aauauiina pea le tapua'iga i lo latou Atua. O lo'o latou tausī pea lava foi sauniga uma, ma faigataulaga e pei ona sa i ai i le taimi o Mose.

Ae o le fa'afitauli la lea ua tupu nei, ua le o toe moni le ola tapua'i o tagata i le Atua. Ua na ona fa'atino o tapua'iga, ae o le olaga o lo'o ola ai, ua le tusa lava lea ma le finagalo o le Atua. Lea e pei ona faimai ai le perofeta, ua fetalai mai le Alii, "Ua fa'alatalata mai lenei nu'u ia te a'u i o latou laugutu, latou te vivi'i mai ia te au i o latou laugutu, a ua mamao lava o latou loto ia te a'u".

O le a le uiga o le fetalaiaga a le Alii? Ioe, ua na ona pepese ma taulagi viiga i le Atua i o latou laugutu, ae ua le i ai o latou loto ma o latou mafaufau. E ese lava le itulagi e fa'asaga i ai o latou mafaufau. Ua gaogaoi'i le ola tapuai. O le ala foi lea latou te faia ai amioga e le tusa ma le finagalo o le Atua.

O lea la ua fa'amasinoina e le Atua ona tagata i le ola fa'afoliga. Aua ua latou tapua'i i le Atua na o laugutu, ae ua le i ai o latou loto. Ua ta'a'ina lo latou ola tapua'i i o latou lava lagona, ae ua le fa'alogo i le fa'asinoga a le Agaga o le Atua. Ma ua le mafai e Iuta ona talia le tala'iga a le perofeta o Isaia. Ua pei se mea masani le osi o taulaga i le Atua, ae ua le tutusa ma fa'atinoga o le olaga o aso uma. Ua le 'ese ma se fale foi lea ua matagofie lona teuteuina mai i fafo i le va'aiga a tagata, a'o totonu ua na'o otaota ma lapisi o lo'o i ai.

Uiga o Upu:

- i) omea, (clay): o le ituaiga palapala lea e pei se pefu, e palu ona fai ai lea o mea taulima e pei o ipu, apa fafano, ma isi mea faapena.

GALUEGA FAATINO: TATALO FA'ATOESE.

Tusi sau tatalo fa'ato'ese i le Atua, ona o le lē moni o lou ola faitaulaga mo Ia, e ala lea i au fa'atinoga o aso uma. Lou ola le usiusita'i, le fa'amaoni i ou tiute fa'atamaitiiti aoga, lou fa'aaoga seseina o auala fa'atekonolosi i mea lē aogā, ae ua le maua ai se vi'iga o le Atua. Fa'atoese fo'i i le Atua, ona o le a'afia gofie o lou tama ma lou teine talavou i suiga televavae o le olaga ua o'o mai, ma ua le mafai ai ona tu'u atu atoa lou tagata e fa'alogo ma usita'i ai i le Atua.

A'OA'OGA:

1. O le ola faitaulaga mo le Ali'i, e afua mai i le loto ua talitonu atoatoa ia te Ia.
2. E le na o le upu ma le gutu, ae o le tagata atoa ia ofo atu i le Atua.

.....

**MATAUPU: AUA E TE FAITAU LAGA I LE ALII MA OU
LIMA E LEAI SE MEA**

SINI: Ia a’oa’oina le fanau ina ia malamalama i le taua o le ofo atu i le Atua o mea na ia foa’i mai mo tatou.

TUSI FAITAU: Teuteronomie 16: 16-17.

FESOASOANI MO LE FAIAOGA:

O le mata’upu lea e 16, o lo’o fa’atonu mai ai e le Atua lona nuu, i le faiga o le paseka ma isi sauniga ‘ese’ese e pei ona ia finagalo ai. O le fa’amoemoe maualuga lava o le Atua, ina ia fa’amanatu pea ia Isaraelu le fa’aolataga tele na Ia faia mo latou, a’o nofo pologa ai i Aikupito.

O le vaega la o le tusi na tatou faitauina, e amata mai i le fuai’upu e 13 e o’o i le fuai’upu e 16, o le fa’atonuga lea o le tausamiga o fale apitaga. O le tausamiga lea e tasi le vaiaso atoa e fai ai, pe a uma le seleselega. O le fa’amoemoe, ina ia fa’ataua i tagata le ave o ulua’i fua o galuega e fa’atino ai le tausamiga lea, ma ia tofua le tagata ma sana mea e ave mo lea tausamiga. O lona uiga ose tasi o tausamiga taua e tataua ona fa’ataua e tagata uma.

E tai fa’atolu ona fai i le tausaga, ma o tma tane uma latou te o atu e ofo atu mea ua i o latou lima i luma o le Ali’i. Faimai le fa’atonuga, e le tataua ona alu atu se tasi i luma o le Ali’i ma ni ona lima e le o i ai se mea. O le fa’amoemoe, ina ia aua ne’i manatu se tasi, o mea ua ia maua o ana lava mea ia. A ia taitasi ma iloa e Isaraelu, o a mea ua foa’i atu e le Ali’i, ia latou toe ofo atu i le Ali’i.

O tausaga uma lava la, e o atu ai tama tane uma o Isaraelu ma fa’apotopoto i le mea o i ai le fale fetafa’i, po’o le nofoaga mo tapua’iga, aua le fa’atinoga o tausamiga ia e tolu e pei ona taua. O le tausamiga o areto e le fa’afefeteina i le amataga o le tausaga, o le tausamiga o le vaiasosa po’o le tausamiga o uluai fua, e fitu vaiaso i le uma ai o le Paseka, i le ma le tausamiga o fale apitaga, e fai pe a tuanai le ono masina talu ona uma le paseka.

Fai mai la le faatonuga, ia aua nei iloa se tasi ua leai sana mea, ia taitasi le tagata e tusa ma mea ua ia te ia, e tusa ma le manuia ua foa'iina atu e le Atua ia te ia. O lona uiga, e matua taua lava le i ai o se mea e ofo atu mo le Ali'i.

O le taua o lenei mataupu mo tatou, o lo tatou iloa lea ona toe ofo atu i le Atua mea ua ia foa'i mai. Ina nei manatu ane se tasi o sona malosi ma sona potona ia maua ai manuia, ona galo lea o le Atua o le na fa'apogai i ia manuia. Ma le isi mea taua, o le iloa ai o le galulue fa'atasi o tagata uma. E lē o le tigaina o le isi, ae la e nofonofo le isi. Ae o le mea aupito sili ona taua, o lo tatou iloa lea ona fa'afo'i le fa'afetai i le Atua, ona o ana fa'amanuiaga mo lo tatou ola. O le a se mea itiiti ua e maua e te ofo atu i le Atua, aua nei galo, ia fai ina ia viia ai le suafa o le Atua.

Manatua, o lo tatou Ali'i o Iesu, na fa'amativaina lona soifua, ina ia tatou maua ona manuia e fa'avavau. Lea ua tatou sapi ai i ia manuia, aemaise o le ola e fa'avavau, pe afai tatou te fa'alogi ma usita'i i mea uma ua ia a'oa'o ma fa'atonu mai.

FA'ATINOGA O LE MATAUPU, O LE GALUEGA FA'ATINO FOILEA:

Manaia pe a vaevae le vasega ini vaega se tolu. O le vaega muamua latou te faitauina le Levitiko 23:4-24. Ona fa'amatala mai lea e i latou le fa'atonuga o le faiga o le paseka po'o le tausamiga o areto e le fa'afefeteina.

O le vaega lua, e faitau e latou le Levitiko 23:15-22. A uma ona su'esu'e le tusi faitau, ona omai lea e faamatala le fa'atonuga o le faiga o le tausamiga o ulua'i fua po'o le tausamiga o vaiasosa.

O le vaega lona tolu, latou te faitauina ma su'esu'e i ai i le Levitiko 23:33-44. A ma'ea ona latou su'esu'e i le tusi faitau, ona latou fa'amatala fo'i lea o le faiga o lea fo'i tausamiga ua taua, o le tausamiga o fale apitaga.

A mae'a loa le galuega lea, ona fa'atoa fai loa lea o le fesoasoani a lau susuga i le faiaoga, ma fesiligia ai ni a'oa'oga fou.

A'OA'OGA:

- 1, Fa’aaoga tatau le potu ma le atamai ua foa’i atu e le Ali’i ia te oe, e fai ai galuega lelei e viia ai le Alii.
2. Toe ofo atu i le Atua mea ua i ō tatou lima, e tusa o mea na ia foa’i mai.
3. O le ola usita’i ma fa’alogo, o le mea taua lea tatou te avatu i le Atua e vi’ia ai lona suafa.

.....

**MANATU TAIALA O TESEMA: O LE TALA O LE OLIOLI
TELE** *(The News of Great Joy)*

ASO SA 02 TESEMA 2018

MATAUPU: UA OSOOSO LE TAMA I LE MANAVA

SINI: Ia a’oa’oina tamaiti ina ia malamalama, o le osooso o le tama i le manava o Maria o le fa’aailoga o le olioli o le lalolagi uma ona o le fa’aolataga mai le Atua.

TUSI FAITAU: Luka 1: 39 – 45

FESOASOANI MO FAIAOGA:

O le tala masani le tala i le asiasiga a Maria i le fale o Elisapeta lona uso. Peita’i e le avea lea ma ala e ave’eseina ai le taua o le a’oa’o mai pea o lenei tala mo tatou. O lea ua tu lalata i ona po e fanau ai Elisapeta i lana tama muamua e pei ona lauiloa ai i lona suafa o Ioane le papatiso. O le o’o atu o le feau ia Maria le taupou, o le a to o ia ma ia fanauina se tama tane, ae o lana to foi e mai i le Agaga Paia, na afua ai ona alu Maria i le fale o Sakaria ma Elisapeta.

Fa’apea lava Maria, e le’i iloa e Sakaria ma Elisapeta lenei tala ofoofogia. Peita’i, fai mai na ona fa’alogo mai lava o Elisapeta i le ofo alofa atu o Maria, osooso loa le tama i lona manava. E matautia lea

mea. Aua fo'i o lea ua o'o lava i le pepe e le'i fanau mai, ua olioli ma fiafia i le tala ua o'o atu. O le talitonuga fa'afomai, a fiafia le tina ma'itaga, ua fiafia foi le pepe i lona manava. A fa'anoanoa foi pe ita, e fa'apena foi ona a'afia le tamaitiiti o lo'o ia tauaveina. E mafai ona tatou vaai foi i ai fa'apena i le mea lea ua tupu nei ia Elisapeta ma lana tama i lona manava. Aua o lea ua fiafia Elisapeta, o lona uiga e tatau foi ona fiafia le pepe o lo'o ia tauaveina.

Peitai, o le va'ai fa'amata'upu silisili i le osooso o le pepe i le manava o Elisapeta, o le fa'ailoga o le olioli ma le fiafia o mea uma i le Talalelei ua o'o mai i le lalolagi. O mea e le tatau ona tupu, ae ua fa'atupu e le Atua.. O mea e le mafaia e se tagata soifua ona fai, ae mafai e le Atua. Ae o le osooso foi o le pepe i le manava o Elisapeta, e mafai foi ona vaai i ai o le fa'ailoga lea o le tali leleia e Elisapeta ma lona aiga o le afio mai o le fa'aola. O le tala o le olioli ua o'o mai i le lalolagi.

GALUEGA FAATINO:

Fai se tusigasolo a tamaiti i le autu o le mataupu. E tatau ona tolu fuai'upu o le solo, ta'i ono laina i le fuai'upu. Ia atagia ai ma ni a'oa'oga fou i totonu o le solo.

PESE: *Osooso mai, pe a e fiafia i le Atua.*

A'OA'OGA:

1. Fa'afetai i le Atua ona o Iesu Keriso le pepe na ia aumaia le tala o le olioli i le lalolagi.

.....

ASO SA: 09 TESEMA 2018

MATAUPU: UA PEPESE AGELU LE PESE SILI ONA MALIE (*Angles sing the most harmonized song to hear*)

SINI: Ia a’oa’oina le fanau ina ia malamalama i le uiga o le fanau mai o Iesu i le lalolagi, ina ia maua e tagata uma le filemu moni.

TUSI FAITAU: Luka 2:8-20

FESOASOANI MO FAIAOGA:

O le fuaiupu e 13 e o’o i le 15 o lo’o fa’amatalaina ai le pese lea a agelu mai le lagi. O le tala i le fanau mai o lo tatou Ali’i o Iesu, e le ‘ose tala fou. O le mea ua leva ona uma ona tupu, ae o lo’o ola pea i loto ma agaga o tagata fa’atuatua ma tagata Kerisiano, ona o le tala o le manuia ma le filemu mo tagata uma.

Ua faitau lua afe ma ona tupu nei tausaga talu ona uma ona tupu o lenei mea ofoofogia, ae o lo’o fa’amanatuina pea i lea tausaga ma lea tausaga. O taimi uma foi e talanoa ai i le tala lenei i le soifua mai o Iesu, e taua ai lava le pese lea a agelu. Aisea? Aua foi o le pese ua logologoā. Ma e le uma le fia pese ai pea o le tagata fa’atuatua i le pese lea.

E pei ona tatou fa’alogoina so’o i totonu o falesa, ia aemaise lava le vaitau lenei o le Kerisimasi. O le upu amata lava o le pese, o lo’o fa’apea mai, “O le vi’iga”, e sau mai i le upu Latina o le “*Gloria*”. O lona uiga pe a fa’amatalaina o le “vivi’i”. O lona uiga, o le fa’aaliga o le loto vivi’i o le tagata i le Atua, i mea mamana ua ia faia, e pei foi ona i ai le soifua mai o le Mesia.

So’o se pese lava e malie i le fa’alogo, e tatau ona amata mai i upu le malie. Ia o’otia lagona o le tagata fa’alogologo. Ia fiafia foi ma fa’aosofia lona fia pese pea, ona o le malie o upu faatasi ai ma lona fati. Ae o le mea e sili ai ona malie se pese, ina ua vi’ia ai le suafa o le Atua. O le mea lea e sili ai ona malie le pese e pei ona taua i le tala, ona o le pese o lo’o fa’aalia ai le Silisili Ese o lo tatou Atua, ma le mamana o vavega o lona alofa tunoa, ua ia aumai ai Iesu Keriso e fai ma fa’aola mo le lalolagi agasala, ina ia maua e tagata uma lona filemu e faavavau.

GALUEGA FAATINO:

Vaevae le vasega pe ta’ito’alua pe ta’ito’atolu ia po’o le ta’ito’afa foi, e fua i le to’atele o le vasega. Ona ō lea o vaega ta’itasi e fatu se latou

pese, e fa'aaoga ai upu o lo'o i le fuai'upu e 14 o le Tusi Faitau. A ma'ea, toe fa'apopototo le vasega, ae auaua'i mai vaega e usu le latou pese. Ia fa'amasino pea lau susuga i le faiaoga. O se pese e te silafia e sili ona lelei, o le pese la lena e tatau ona usu uma e le vasega. Ae manaia foi pea uma ona ave lea e a'o i le aoga Aso Sa atoa.

A'OA'OGA:

1. Pese mai i le loto, e sili lea ona malie i le faalogo.
2. O le usita'i ma fa'alogo, o le pese sili lea ona malie i le Atua.

.....

ASO SA 16 TESEMA 2018.

MATAUPU: O LE NOFOAGA NA SOIFUA MAI AI LE TUPU

SINI: Ia a'oa'oina le fanau ina ia malamalama i le nofoaga na soifua mai ai le Tupu o Iesu.

TUSI FAITAU: Mataio 2:1 – 2

FESOASOANI MO LE FAIAOGA:

O Petele'ema o le igoa lea o le aai na soifua mai ai Iesu. O Petele'ema o se taulaga itiiti e tusa lona mamao ma le ono maila mai i le itu i matu o Ierusalem. O le igoa lava na iloa ai lea aai anamua o Efarata. O le igoa Petele'ema o lona uiga o le *“Fale o le falaoa” (house of bread)*, ona o se aai e tu ise nofoaga e lelei lona 'ele'ele, ma e lelei tele mo le totoina o fa'atoaga, ma ua feso'ota'i lelei ai ma lona igoa. O lona tulaga o luga o le mauga pe a ma le lua afe, lima selau futu lona maualuga. O lona tulaga la lea, ua avea ai lava Petele'ema ua pei o se taulaga ua fa'atuina i luga o le mauga.

E umi lava le tala fa'asolopito o Petele'ema. Ma o nisi nei o mea o lo'o ta'ua i le Tusi Paia, e ta'uta'ua ai le aai lenei. O le aai lenei o lo'o ta'oto ai le tina ia Rasela, le ava a Iakopo. (Kenese 48:7, 35:20). O le aai foi

lea na nofo ai le tinā o Ruta ina ua nonofo ma Poasa, (Ruta 1:22), o i foi na iloa atu ai e Ruta lona nu'u o Moapi, ui atu i le Ioritana. Ae o le mea sili ona ta'uta'ua ai lenei aai o Petele'ema, ona o le aai lea a Tavita lē sa fai ma Tupu ia Isaraelu, (1. Samuelu 16:1, 17:12, 20:6) o le nofoaga foi lea o lo'o i ai le vai na sa'ili i ai Tavita, ina ua sola o ia i le mauga ona o le saua o Saulo. (2 Samuelu 23: 14, 15)

O Petele'ema o le aai a Tavita, na manatu le au Iutaia o i o le a fanau mai ai se atalii ta'uta'ua o Tavita, se tasi o le a filifilia e le Atua, e afio mai i le lalolagi. Ma o lea lava na taunu'u.

O sina tala'aga pu'upu'u lēna mo le nuu o Petele'ema, le nuu na fanau ai le Mesia. Ae manatu nisi, o le fale o manu o lo'o ta'ua, e le o se fale, ae o le ana. E pei ona ta'ua, o le aai lea e tu i luga o le mauga, ma e tele la ni vaega o le mauga e maua ai nai ana. O ana la ia, e ave i ai e le au leoleo manu a latou manu e tu'u ai, e malupuipua mai ai i latou mai o latou fili. E fa'apea la, o le ana lea na fanau ai Iesu. A alu la le tagata i totonu o le ana lea, e ui atu i se faitoto'a maualalo lava, ma seiloga e to'otuli le tagata, ona fa'atoā mafai lea ona ulufale i totonu. E o'o mai la i le taimi lenei, o lo'o i ai pea lea ana, ma o ona luga a'e o lo'o fa'atuina ai le fale tapua'i o tagata nuu ese.

Ina ua afio mai le Atua mamalu i le lalolagi, na ia ui mai foi i le ana lea. E ui lava la ina tatou te le i vaai i ai i lea nofoaga, ae ua lava lo tatou faitau i le tala, e aumai ai se feau taua mo tatou. A tatou faitau lelei i le gafa o Iesu, o lo'o ta'ua i le Mataio 1, ona tatou vaai lea i le tala fa'asolopito o le nuu lenei e pei ona fa'amatalaina i le mataupu, ona manino lea ia i tatou, o Petele'ema, o le aai lava ua leva ona filifili e le Atua, e fai mona nuu e afio mai ai i le lalolagi.

Lua, fai mai a ulufale le tagata i le ana lea, e to'otuli i lalo ona fa'atoa mafai lea ona ofi i le faitoto'a. O lo'o aumai ai se feau mo tatou, i le auala tatou te ulufale atu ai i lana fa'aolataga, se'iloga ua tatou o ifo i lalo ma le loto maualalo, ona fa'atoa mafai lea ona tatou ulufale atu i ona manuia e fa'avavau. I le ma lenei, o le to'otuli ma ulufale atu i le ana, o le fa'ailoga o le vivii atu o le tagata i le Tupu o Tupu i le loto maualalo.

O lona uiga, o le nofoaga na soifua mai ai Iesu, o le nofoaga lava na filifilia e le Atua e Afio mai ai e ala ia Iesu Keriso, ina se'ia lagonaina e le tagata lona fa'atauva'a i luma o le Atua, ma ola ai i le maualalo lea e pei ona ia a'oa'o mai.

Manatua, o le Alii o Iesu na amata mai i le ana ina ua soifua mai, ae na toe fa'ai'u foi i le ana ina ua maliu aua le fa'aolataga mo le lalolagi agasala. O lona toe tu manumalo, na oo atu ai o Ia i lona mamalu faa-Tupu, ae ua avanoa ai le lagi mo tagata fa'atuatua uma.

GALUEGA FA'ATINO:

Manaia ae fa'atino e le vasega le tala fua i le fa'amatalaga o lo'o avatu i le mata'upu. A mae'a ona fa'atino, ona tali mai lea o fesili o lo'o i lalo.

1. O le a se taua o le ana i leoleo mamoe?

Tali: E tu'u ai mamoe e puipui mai ai i manu fe'ai.

2. Na fa'afelea ona ulufale tagata i totonu o le ana na soifua mai ai Iesu?

Tali: Se'iloga e to'otuli

3. O le a la se feau o lo'o aumai ai i lea ata?

Tali: Ia tatou lagonaina lo tatou fa'atauva'a pe a tatou o i luma o le Atua.

A'OA'OGA:

1. Ia tatou ola i le loto maualalo e pei o Iesu

2. O lalo lava e maua ai malo.

3. Fa'afetai i le Atua mo le pepe o Iesu.

MANUALE KERISIMAS MALE TAUSAGA FOU!